

পবিত্র ইঞ্জিল শরিফ তিহরা ছিপারা

আল-লুক

পরিচিতি

আল-লুক ছিপারাত নানান তালিম আছে, এরমাজর মূল তালিম অইলো, হজরত ইছা আল-মসীউ অইলা সারা জগতর হকল মানষর নাজাতর কাভারি। তাইন দুনিয়াত তশরিফ আনিয়া দেখাইলা, তাইন মানষরে কতো মায়া করইন। গরিব-দুখি, অনাথ-এতিম, ডাড়ী, নিরাশয় মানষরে তাইন মায়া করিয়া আশয় দেইন। দুনিয়ার মানষে যারারে এলামি বা তুচ্ছ করে, তাইন এরায়েও আদর করইন। হুরু হুরু নাবালিক হুরুতা, নিরাশয় বেটিন্তরে তাইন খুব আদর করইন। আল্লার যতো বন্দা আল্লার দরবার থাকি হরিয়া গেছেগি, তারারে তুকাইয়া আনিয়া হিরবার আল্লার বাদশাইত জাগা দিছইন। হজরত ইছা রুহুল্লার নামউ বিন-আদম, মানি আদমর আওলাদ, মানুষ ছুরতে আওয়া আল্লার খলিফা।

ই ছিপারার পয়লা রুকুত আছে আল-মসীয়ে দুনিয়াত তশরিফ আনরা, ইটা আল্লা পাকর খাছ মর্জি। হিরবার আখেরি রুকুত বয়ান করা অইছে, তাইন জিন্দা হালতে বেহেস্তুে তশরিফ নিছইন। ইটাও মাবুদর খাছ মর্জি, আর হারা দুনিয়ার মানষর লাগি খুশির খবর।

অউ ছিপারার বউত তালিম বাতাইল অইছে মিছাল বা কিছা দিয়া। ই তালিম, কেরামতি-মোজেজা, আর তবলিগর বয়ানদি বুজাইল অইছে, হজরত ইছাউ অইলা আস্তা দুনিয়ার মানষর লাগি আল্লাই রহমত। খালি তান উছিলায় হকল নমুনার গুনর মাফি পাওয়া যায়। তাইনউ আস্তা দুনিয়ার নাজাতর কাভারি।

আমরা অউ ছিপারার ১৯ রুকু ১০ আয়াতো দেখি, হজরত ইছায় কইরা, “অউ লাখান বে-পখি অকলরে তুকাইয়া বার করিয়া, তারারে বাচানির লাগিউ তো আমি বিন-আদম ই দুনিয়াত আইছি।”

লেখক পরিচিতি আর সময়

আল্লা পাকর হুকুমে অউ ছিপারা লেখছইন হজরত লুক (র:)। পবিত্র ইঞ্জিল শরিফ থাকি জানা যায়, হজরত লুকর পেশা আছিল হেকিমি ডাক্তর। তাইন হজরত ইছার সাহাবি হজরত পাউলুছর খেজমতো রইয়া নানান দেশর নানান জাতির গেছে আল্লার কালাম তবলিগ করতা। হজরত ইছা দুনিয়া থাকি বেহেস্তো তশরিফ নেওয়ার অনুমান ৩০ বছর বাদে অউ ছিপারা কিতাব আকারে লেখা অইছে। অউ আল-লুক ছিপারা অইলো হজরত লুকর লেখা পয়লা ছিপারা, বাদে তাইন সাহাবি-নামা নামর আরক ছিপারা লেখছইন।

এরমাজে আছে,

- (ক) ভূমিকা, হজরত এহিয়া আর হজরত ইছার জনম
আর পয়লা জিন্দেগি১:১-২:৫২ আয়াত
- (খ) আল্লার কাম করার লাগি হজরত ইছা জুইত অইলা ৩:১-৪:১৩
- (গ) গালিল জিলাত হজরত ইছার কেলামতি আর তবলিগ ... ৪:১৪-৯:৫০
- (ঘ) জেরুজালেম যাওয়ার পথে হজরত ইছা৯:৫১-১৯:২৭
- (ঙ) জেরুজালেম টাউনো হজরত ইছা ১৯:২৮-২১:৩৮
- (চ) হজরত ইছার দুখ-কষ্ট আর মউত২২-২৩ রুকু
- (ছ) মউতর বাদে জিন্দা অইলা হজরত ইছা ২৪ রুকু

১-২ মহামাইন্য থিওফিলাছ,

আপনার তো জানা আছে, আমরা মাজে যেতা যেতা ঘটিছে, ইতা যেরা পয়লা থাকিউ নিজর চউখে দেখছইন আর তবলিগও করছইন, এরার মুখর কথা হুনিয়া ভালামন্তে সমজিয়া হারি, বউত মুমিনে লেখাত লাগছইন।
 ৩ এরলাগি অখন আমিও আদি-অন্ত হক্কলতা তালাশ করিয়া, এক-এক করি লেখিয়া আপনারে জানানি খান ভালা মনো করলাম। ৪ অখন থাকি আপনে সমজিতা পারবা, আপনে আগে যেতা তালিম হুনছইন, ইতা এক্কেবারে ঠিক।

হজরত এহিয়া আর হজরত ইছার জনম আর পয়লা জিন্দেগি
 (১:৫-২:৫২)

হজরত এহিয়া (আ:) নবীর জন্মর গাইবি খবর

৫ রাজা হেরোদে যেবলা এহুদিয়া জিলা চালাইরা, অউ সময় জেরুজালেম টাউনো বায়তুল-মুকাদছর ইমাম অকলর মাজর একজনর নাম আছিল জাকারিয়া। তাইন বনি ইসরাইলর মুল ইমাম হারুন্নর খান্দানর আবিয়া দলর মানুষ। তান বিবির নাম এলিছাবেত, এইনও হারুন্নর বংশর মানুষ। ৬ এরা দুইও জনউ আল্লার নজরো কামিল দীনদার আছলা। মাবুদর হকল হুকুম-আহকাম ষোলআনা আদায় করতা। ৭ অইলে এরা আছলা নিআওলাদি, বিবি এলিছাবেত অইলা আটখুরা বেমারি। অউ হালতে দুইও জন মুরক্বি অইগেছইন।

৮ এরমাজে অইন্য দলর ইমামতির দিন শেষ অইয়া তান নিজর দলর ইমামতির বারি আইলো, তেউ জাকারিয়া আল্লার ঘরো ইমামতিত আছলা। ৯ ইমামতি কামর নিয়ম মাফিক লটারি মারিয়া তানে পছন্দ করা অইলো, যাতে তাইন বায়তুল-মুকাদছর পবিত্র হেরেম শরিফো হামাইয়া আগর-খুশবয় জালাইন। ১০ তাইন ভিতরে অতা জালাইরা, আর বারে বউত মানষে দোয়া-দুরুদ কররা।

১১ আখতাউ আগর-খুশবয় জালানি খানার ডাইনেদি আল্লার একজন ফিরিস্তায় তানরে দরশন দিলা। ১২ ফিরিস্তারে দেখিয়াউ তান দিল কাপিগেল, জানো ডর আইলো। ১৩ ফিরিস্তায় কইলা, “ও জাকারিয়া, ডরাইও না। হুনো, আল্লার দরবারো তুমার দোয়া কবুল অইছে। তুমার বিবি এলিছাবেতর ঘরো এক পুয়া অইবা, তুমি এন নাম রাখিও এহিয়া। ১৪ অউ পুতে তুমার জিন্দেগিত

বউত খুশি বাড়াইবা, তাইন জনম লওয়ায় আরো বউত জন খুশি অইবা।
 ১৫ এইন তো মাবুদর নজরো বউত বড় ইজ্জতি অইবা। জিন্দেগিয়ে কুনুদিনউ
 আংগুরর শরাব বা কুনুজাত নিশা খাইতা নয়। তান মার পেটো থাকতেউ
 পাক রুহে কামিল অইবা। ১৬ আর বনি ইসরাইলর বউত মানষরে তারার
 আল্লা-মাবুদর বায় ফিরাই আনবা। ১৭ তাইন ইলিয়াছ নবীর লাখান হিম্মত
 আর তাক্কতে মালিকর আগে অইয়া অইবা। অইয়া বাফ অকলর দিলরে
 আওলাদর বায়, আর নাফরমান অকলর দিলরে পরেজগারির বায় ফিরাইবা।
 অউ লাখান মাবুদর লাগি এক দল বন্দারে তাইন পুরাপুর তিয়ার করবা।”

১৮ ইতা হুনিয়া জাকারিয়ায় ফিরিস্তারে কইলা, “এর পরমান কিতা,
 আমি কেমনে একিন করতাম? আমি তো বুড়া অইগেছি, আমার বউও
 এক্কেরে মুরকিব অইগেছইন।”

১৯ ফিরিস্তায় কইলা, “আমি জিব্রাইল, আমি আল্লার ছামনে আজির
 থাকি। তুমার লগে বাতচিত করিয়া, অউ খুশ-খবরি তুমারে জানানির
 লাগিউ আল্লায় আমারে বেজিছইন। ২০ দেখিও, আমার কথা সময় মত
 ফলিবো। অইলে আমার মাত একিন না করায়, ইখান ফলিবার আগ পর্যন্ত
 তুমি বোবা বনিষিবায়, কুস্তা মাততায় পারতায় নয়।”

২১ ইবায় মানষে জাকারিয়ার লাগি বার চাইরা। বায়তুল-মুকাদ্দছর
 ভিতরর অউ পাক জাগাত তান দেরি অর দেখিয়া, তারা হকল চিন্তাত
 পড়িগেলা। ২২ বাদে জাকারিয়া বারইয়া অইলা, অইলে তাইন কুস্তাউ মাততা
 পারলা না। তাইন বোবা অইগেলা আর ইশারা-আশারায় বুজাইলা। ই হালত
 দেখিয়া মানষে বুজিলিলা, পাক জাগার ভিতরে তাইন কুনু দরশন পাইছইন।

২৩ ইমামতি কামর বারি শেষ অইয়া হরলে, তাইন নিজর বাড়িত গেলাগি।

২৪ এরবাদে তান বিবি এলিছাবেতর পেটো হুরুতা আইলো, এরদায়
 এলিছাবেত পাচ মাস বাড়ির বারে বারইলা না। ২৫ তাইন কইলা, “ইতা
 তো আল্লাই লিলা-খেলা। মানষর গেছে আমি যে খুটার ভাগি অইছি, অউ
 খুটার শরম হরানির লাগি তাইন আমার বায় খিয়াল করছইন।”

ইছা রুহুল্লার জন্মর গাইবি খবর

২৬-২৭ এলিছাবেতর পেটো যেবলা ছয় মাসর হুরুতা, অউ সময়
 গালিল জিলার নাছারত গাউত একজন আবিয়াতি সতী নারী আছলা,

এন নাম বিবি মরিয়ম। আল্লায় জিব্রাইল ফিরিস্তারে তান গেছে বেজিলা। তান বিয়া ঠিক অইছিল, বাদশা দাউদর খান্দানর ইউছুফ নামর একজনর লগে। ﴿২৮﴾ ফিরিস্তায় আইয়া বিবি মরিয়মরে কইলা, “আছছালামু আলাইকুম; আল্লা পাকে আপনারে রহমত করছইন, তাইন আপনার লগে আছইন।”

﴿২৯﴾ ইখান হুনিয়া মরিয়মর মন পেরেশান অইগেল। তাইন মনে মনে কইলা, ই ছালামর মানি কিতা? ﴿৩০﴾ ফিরিস্তায় কইলা, “ও মরিয়ম, আপনে ডরাইবা না, আল্লায় আপনারে রহমত করছইন। ﴿৩১﴾ হুনউক্কা, আপনার ঘরো এক পুয়া পয়দা অইবা, আপনে এন নাম রাখবা, ইছা। ﴿৩২﴾ তাইন বউত বড় ইজ্জতি অইবা। তানরে কওয়া অইবো ইবনুল্লা, আল্লাতালার খাছ মায়ার জন। আল্লা মাবুদে তান খান্দানর মুরক্বি বাদশা দাউদর গদি তানরে দিবা। ﴿৩৩﴾ তাইন দুনিয়া আখেরাতো বনি ইসরাইলর উপরে বাদশাই করবা, তান বাদশাই কুনুদিনউ ফুড়াইতো নায়।”

﴿৩৪﴾ তেউ বিবি মরিয়মে ফিরিস্তারে কইলা, “ইতা কিলান অইবো? আমার তো বিয়া-শাদিউ অইছেনা।” ﴿৩৫﴾ ফিরিস্তায় কইলা, “পাক রুহ আপনার উপরে নাজিল অইবা, আর আল্লার কুদরতি ছায়া আপনার উপরে আইবো। এরদায়উ আপনার ঘরো যে পাক আওলাদে জনম লইবা, তানরে ইবনুল্লা, মানি আল্লার খাছ মায়ার জন কইয়া ডাকা অইবো। ﴿৩৬﴾ হুনউক্কা, আপনার কুটুম বিবি এলিছাবেতর বেয়াপারে মানশে কইতা না নি, তান কুনু হুরুতাউ অইতা নায়? অইলে অখন তো অউ মুরক্বি বয়সো তান পেটোও ছয় মাসর পুয়া আছে। ﴿৩৭﴾ তে আল্লায় পারইন না, ইলা কুস্তাউ নাই।”

﴿৩৮﴾ মরিয়মে কইলা, “আমি তো আল্লার বান্দি; আপনার কথামতউ হকলতা ফলউক।” বাদে ফিরিস্তা তান গেছ থাকি বিদায় অইগেলা।

বিবি মরিয়ম বিবি এলিছাবেতর বাড়িত গেলা

﴿৩৯﴾ এরবাদে বিবি মরিয়ম উড়া-তাড়া করি, এহুদিয়া জিলার এক পাড়িয়া গাউত গেলা। ﴿৪০﴾ গিয়া হনো ইমাম জাকারিয়ার বাড়িত হামাইয়া, তান বিবি এলিছাবেতরে ছালাম করলা। ﴿৪১﴾ এলিছাবেতে মরিয়মর আওয়াজ হুনার লগে লগেউ, তান পেটর হুরুতা আখতা লড়িয়া উঠিলা। তাইন পাক রুহে কামিল অইয়া, ﴿৪২﴾ জুরে জুরে কইলা, “দুনিয়ার তামাম বেটিস্তর মাজে

তুমিউ কপালি, তুমার পেটর ছাবালও কপালি। ৪৩ আমার মুনিবর মা আমার ঘরো তশরিফ আনছইন, আমার অতো বড় কপাল কিলা অইলো? ৪৪ আমি তুমার আওয়াজ হুনোর লগে লগেউ, আমার পেটর গেদায়ও খুশিয়ে লড়িয়া উঠিছইন। ৪৫ তুমি তো কপালি বেটি, কারন মাবুদে তুমারে যেতা জানাইছইন, তুমি দিলে-জানে ইতা একিন করছো।”

৪৬ অউ বিবি মরিয়মে কইলা,

“আমার কলবে তারিফ করের আমার মাবুদর,

৪৭ বেহেস্তু খুশিয়ে ভরিগেছে আমার অন্তর,
তরাওরা চান্দ আইছইন, অভাগিনির ঘর।

৪৮ চউখ তুলিয়া চাইছইন দয়াল, কাংগাল বান্দির বায়,
এরদায়উ তামাম জাতিয়ে সাবাস সাবাস গায়,
বড় কপালি কইবা মোরে, যুগ-যুগান্তর।

৪৯ শক্তিমানে করলা মোরে অতো বড় কাম,
আমার লাগি অইছইন তাইন কুদরতি আছান,
তাইনউ তো ছুবহানাল্লা, পাক-পবিত্র তাইন।

৫০ যেরা তানে তাজিম করি রইন ডরাইয়া,
রহম করইন তাইন ইতারে নিজর জানিয়া,
ওয়ারিশে ওয়ারিশে রহম, তাইনউ বিলাইন।

৫১ তানউ কুদরতি আতে করছইন মহা কাম,
মনর গরিমায় যেতায় করে বড়াই শান,
ইতারে খেদাইয়া দিয়া, বৈতল বানাইছইন।

৫২ রাজা-বাদশাইন হকির অইলা গদি খুয়াইয়া,
হকির অকল বাদশা অইলা রহমত পাইয়া,
উচা-নীচা হকির-বাদশা, তাইনউ বানাইছইন।

৫৩ উপাসি কাংগালরে দিলা ভালা ভালা খানি,
ভুকাসির পেটো গেল দামি দানা-পানি,
ধনি জনরে খালি আতে, খেদাইয়া দিছইন।

৫৪ তাইন যেলা ওয়াদা করছলা ময়-মুরব্বির লগে,
অলাউ তো আছান করছইন বনি ইসরাইলরে,
বনি ইসরাইল অইলা আল্লার আপন গুলাম।

৫৫ ইব্রাহিমরে ইয়াদ রাখছইন রহম বরকত দিবা,
লগে তান খান্দানেও অউ দয়া পাইবা,
চিরকালিন অউ ওয়াদা মনো রাখিছইন॥”

৫৬ বিবি মরিয়ম তান কুটুম এলিছাবেতর গেছে তিন মাস রইলা, হেশে
তান নিজর বাড়িত গেলাগি।

হজরত এহিয়া (আ:) নবীর জনম

৫৭ বাদে মেয়াদ পুরা অইয়া হারলে এলিছাবেতর ঘরো এক পুয়া অইলা।

৫৮ মাবুদে তানরে অতো বড় রহম করছইন হুনিয়া, আরি-ফরি আর খেশ-
কুটুম অকল আইয়া তান লগে খুশি-বাসি করলা।

৫৯ ইহুদি অকলর রেওয়াজ মাফিক জন্মর আট দিনর দিন, পুয়ার
মহলমানি আর আকিকা করানির লাগি তারা হকল দলা অইলা। তারা
চাইলা, বাফর নামর লাখান পুয়ার নামও অউক। ৬০ অইলে মায় ইখান
মানলা না, তাইন কইলা, “না, এর নাম অইবো এহিয়া।” ৬১ তারা কইলা,
“তুমার খেশ-কুটুমর মাজে তো ইলা নাম কেউরর নাই।”

৬২ তেউ তারা ইশারায় পুয়ার বাফরে জিকাইলা, তাইন কুন নাম পছন্দ
করইন। ৬৩ জাকারিয়ায় তারার গেছ থাকি খাতা-কলম নিয়া লেখলা, “তার
নাম এহিয়া।”

অউ তারা হকল তাইজ্জুব অইগেলা। ৬৪ আর লগে লগেউ জাকারিয়ার
জবান খুলি গেল, তাইন মাত-কথা মাতিলা আর আল্লার শুকরিয়া আদায়
করলা। ৬৫ ইতা দেখিয়া আরি-ফরি হকলে ডরাই গেলা। এহুদিয়া জিলার
পাড়িয়া অঞ্চলের হকল মানষর মুখে মুখে অউ খবর রটিগেলো। ৬৬ যতো
মানষে ই ঘটনা হুনছিল, তারা হকলেউ মনে মনে চিন্তা করি কইলো, বড়
অইয়া হারলে ই পুয়া কিতা অইবো। কারন মাবুদর কুদরতি আত তান
উপরে আছিল।

হজরত জাকারিয়া (আ:) নবীর মুখো গাইবি খবর

৬৭ বাদে পুয়ার বাফ জাকারিয়া, পাক রুহে কামিল অইয়া অউ গাইবি
খবর কইলা,

৬৮ “শুকরিয়া জানাই আমি বন্দায় আল্লা মাবুদর,
আছান করছইন তাইন নিজে আপন ইসরাইলর,
খিয়াল করি করলা আজাদ নিজর গুলাম দল।

৬৯ আমরার লাগি পছন্দ করলা দাউদ খান্দানরে,
বল-তাক্কতি কাভারিরে আনলা অখান থনে,
দেখাইলায় দয়াল মোরে নাজাত কররা জন।

৭০ নবী অকলে জবানদি কইছলা বউত আগে,
তাইনউ কওয়াইছলা ইতা নবী অকলর মুখে,
তাক্কতি কাভারিউ অইবা দাউদ কুলর বল।

৭১ দুশমন অকলর কবজা থাকি তাইন বাচাইলা,
ঘিন-ইংসা কররা থাকি অখন ফানা দিলা,
আমরারে বাচাইলা আইয়া দয়াল মউলার জন।

৭২ বাচাইলা আমরারে খালি ময়-মুরব্বির খাতিরে,
কছম করা পাক ওয়াদা পুরানির নিয়তে,
ময়-মুরব্বিরে জবান দেওয়ায় আমরা বাচিলাম।

৭৩ কছম করি ওয়াদা করছলা দয়াল আল্লায়,
ইব্রাহিমরে জানাইলা তাইন নাজাতর উপায়,
ইব্রাহিম নবীউ অইলা আমরার আসল বাফ।

৭৪-৭৫ আমরা বাচাইতা করি মউলার অউ কহম,
দুশমন থাকি বাচার লাগি বাতাই দিলা নিয়ম,
জিন্দা যদি আছি আমরা নিচিন্তা রইতাম।

ডর খফ ছাড়া আমরা যানু করি এবাদত,
পরেজগার আর ছহি পথে থাকি নিরাপদ,
তান ছামনে রইয়া যাতে করি তান খেজমত।

৭৬ ওরে আমার মায়ার পুত এহিয়া বাবাজি,
তুমারে তো ডাকা অইবো আল্লাতালার নবী,
মুনিবর আগে রইয়া ছহি করবায় পথ।

৭৭ বাতাই দিবায় তুমি তান বন্দা অকলরে,
গুনা মাফির পথ চিনবা তুমার তালিমে,
বাতাইয়া দিবায় বাবা নাজাত পাওয়ার পথ।

৭৮ আমার আল্লার রহম আর হউ মহব্বতে,
বেহেস্তি নুরর এক সুরুজ অইবা উপরেতে,
আমরার উপরে অইয়া হারি রাখিবা নজর।

৭৯ মউত আর আন্দারির গাতো যেরা কাটায় দিন,
নুরর পথ দেখবা তারা করিয়া একিন,
আমরারেও শান্তির পথে চালাইবা অউ জন।

অউ হুজুর নাজিল অইয়া দেখাইবা কুদরত,
তাইনউ হউ ওয়াদা করা আল্লাই রহমত।”

৮০ বাদে এহিয়া আস্তে আস্তে বড় অইলা, লগে অইয়া তান রুহানি
বলও বাড়িলো। বনি ইসরাইলর ছামনে খুলামেলা জাইর অইবার আগ
পর্যন্ত, তাইন মরুভূমির মাজে দিন কাটাইলা।

হজরত ইছা আল-মসীর জনম

২ অউ সময় রোমান বাদশা আগস্ত কৈছরে হুকুম দিলা, তান আস্তা বাদশাইর হকল প্রজায় যারযির নাম লেখানির লাগি। ২ সিরিয়ার হাকিম কুরিনিয়াছর আমলো, অউ পয়লা বার মানুষ গনার লাগি নাম লেখাইল অইলো। ৩ তেউ নাম লেখানির লাগি হকল মানুষ যারযির বুনিয়াদি গাউত গেলা।

৪ অউ লাখান ইউছুফও নাম লেখানির লাগি গালিল জিলার নাছারত গাউ থাকি বাদশা দাউদর গাউত আইলা। তাইন তো দাউদর খান্দানর মানুষ। গাউর নাম বেখেলহাম, ইটা এহুদিয়া জিলাত। ৫ বিবি মরিয়মও অউ ইউছুফর লগে অইয়া নাম লেখানিত গেলা। অউ ইউসুফর লগেউ তান শাদি ঠিক অইছিল, আর তান পেটো অউ সময় হুরুতা আছিল। ৬ বেখেলহামো থাকতেউ মরিয়মর হুরুতা অইবার বিশেষ ধরলো। ৭ আর তান পয়লা পুয়ার জনম অইলো। অইলে হিনো কুনু মেহমান খানাত থাকার জাগা মিললো না, এরদায় মরিয়মে অউ হুরুতারে তেনাদি বেরাইয়া গোয়াল ঘরর খেরর গামলাত হুতাই থইলা।

ফিরিস্তা আর রাখাল অকল

৮ অউ বেখেলহাম গাউর কান্দাত বন্দর মাজে, মেড়ার রাখাল অকলে রাইতকুর বালা তারার মেড়া পারা দেওয়াত আছিল। ৯ আখতাউ আল্লার এক ফিরিস্তা তারার ছামনে আইয়া দরশন দিলা, আর মাবুদর নুরর তেজে চাইরো বায় ফর অইগেল। ইতা দেখিয়া রাখাল অকল ডরর চুটে বেদিশা বনিগেলা।

১০ অইলে ফিরিস্তায় তারারে কইলা, “তুমরা ডরাইও না। আমি তুমরার লাগি খুব খুশির খবর লইয়া আইছি। ই খুশ-খবরি দুনিয়ার তামাম মানষর লাগি। ১১ হুনো, তুমরার তরানেআলা আইজ দাউদর গাউত জনম লইছইন। তাইনউ আল-মসী, তাইনউ মালিক। ১২ তুমরা গিয়া এর পরমান দেখবায়, দেখবায় এক কাচা হুরুতারে তেনাদি বেরাইয়া, গোয়াল ঘরর খেরর গামলাত হুতাইয়া থওয়া অইছে।”

১৩ অউ সময় আখতাউ হউ ফিরিস্তার লগে আরো বউত ফিরিস্তারে দেখা গেল। এরা আল্লার জিকির-আজকার করি করি কইলা,

১৪ “আছমানো আল্লার লিলা-খেলা দেখা যাউক,
দুনিয়ার বুকুত তান পিয়ারা বন্দার শান্তি অউক।”

১৫ বাদে ফিরিস্তা অকল তারার গেছ থাকি আছমানো গিয়া হারলে, রাখাল অকলে একে-অইন্যরে কইলো, “আও, আমরা বেখেলহামো যাই। মাবুদে আমরায়ে যে খবর জানাইলা, অতা দেখিয়া আই।”

১৬ মাতি মাতি তারা জলদি করি গেলা, গিয়া মরিয়ম, ইউছুফ আর খেরর গামলাত হুতাইল অউ হুরুতারে পাইলা। ১৭ পাইয়া অউ হুরুতার বেয়াপারে তারারে যে খবর জানাইল অইছিল, ইতা তারা হকলরে কইলা।

১৮ তারার মাত হুনিয়া হকলেউ তাইজুব অইগেলা। ১৯ অইলে মরিয়মে হকলতা দিলর মাজে গাথিয়া রাখলা, আর মনে মনে চিন্তাত রইলা।

২০ ফিরিস্তা অকলে রাখাল অকলরে যেলা কইছলা, এরা ইতা দেখিয়া হুনিয়া আল্লার জিকির তারিফ করি করি ফিরত গেলাগি।

২১ বাদে জন্মর আট দিনর দিন আকিকা আর মছলমানি করানির বালা, তান নাম রাখা অইলো ইছা। মার পেটো আইবার আগেউ ফিরিস্তায় অউ নাম থইছলা।

গেদা ইছারে বায়তুল-মুকাদ্দছো আনলা

২২ এরমাজে মুছা নবীর শরিয়ত মাফিক তারার পাক-ছাফ অওয়ার সময় অইলো। তেউ ইছারে মাবুদর আতো সপিয়া দিবার নিয়তে, ইউছুফ আর মরিয়মে তানে লইয়া জেরুজালেম টাউনো আইলা। ২৩ মাবুদর শরিয়তর হুকুম আছিল, পরতেক জানদারর পয়লা পুয়ারে আল্লার নামে সপিয়া দিতে অইবো। ২৪ এরলগে, এক জুড়া ডুপি পাখি বা পারোর দুইটা বাইচ্চা কুরবানি দিতে অইবো, শরিয়তর অউ হুকুম মাফিক তারা কুরবানি দেওয়াত আইলা।

২৫ অউ সময় জেরুজালেম টাউনো ছামাউন নামর একজন আল্লারাইয়া বুজুর্গ আছলা, তাইন পাক রুহে কামিল। তাইন মনে মনে বার চাওয়াত আছলা, আল্লায় কুন সময় বনি ইসরাইলরে শান্তি দিবা। ২৬ পাক রুহ তান

লগে আছিল, অউ রুহে তানরে বাতাইছলা, তান মউতর আগেউ আল্লার ওয়াদা করা আল-মসীয়ে তাইন দেখবা। ২৭ পাক রুহর ইশারায় ছামাউন অউ দিন বায়তুল-মুকাদছো আজির অইলা। ইছার মা-বাবেফেও শরিয়তর হুকুম আদায় করার নিয়তে, গেদা ইছারে লইয়া অনো আইলা। ২৮ অউ কামিল বুজুর্গ ছামাউনে ইছারে কুলো লইয়া আল্লার শুকরিয়া আদায় করলা। তাইন কইলা,

- ২৯ “ও মালিক, তুমার জবান মাফিক
তুমার ই গুলামরে অখন শান্তিয়ে বিদায় দেও।
৩০-৩১ আদম জাতিরে তরানির লাগি,
তামাম মানষর চউখর ছামনে,
তুমি যে উছিল কাইম করছো হউ আল-মসীয়ে
আমার নিজ চউখে দেখিয়া গেলাম।
৩২ তুমার খাছ প্রজা বনি ইসরাইলর গৌরব তো এইনউ,
বাদ-বাকি তামাম জাতিরেও পথ দেখানির নুর।”

৩৩ ছামাউনে ইছার বেয়াপারে অউ যেতা কইলা, ইতা হুনিয়া ইছার মা-বাবেফ তাইজ্জুব অইগেলা। ৩৪ ছামাউনে তারারে দোয়া দিলা, তাইন ইছার মা মরিয়মরে কইলা, “হুনো, আল্লা পাকর খিয়াল অইলো, অউ হুরুতর দরুন বনি ইসরাইলর বউত জনে নাজাত হাছিল করবা, আর বউত জন লান্নতি অইবা। তাইন অউ লাখান এক নিশানা, তান বিপক্ষে বউতেউ মাতিবো। ৩৫ অতা থাকি তারার দিলর হাল-হকিকত বুজা যাইবো। আর হুনো, তলোয়ারে কাটিলে যেলা অয়, তুমার দিলোও অলা দুখর সেল হামাইবো।”

৩৬ অউ সময় হান্না নামর একজন বেটি মানুষও আছিল, তাইন আল্লার নবী। তান বাফর নাম পানুয়েল, আর খান্দানর নাম আশির। তান বউত বয়স অইগেছে, সাত বছর জামাইর ঘর করিয়া হারি, ৩৭ চৌরাশি বছর পর্যন্ত ডাড়ি হালতে আছিল। তাইন বায়তুল-মুকাদছর ভিতরে রোজা রাখতা আর দোয়া করতা। এবাদত-বন্দেগির মাজে রাইত-দিন কাটাইতা, বারে বারইতা না। ৩৮ ঠিক অউ সময় তাইনও অনো আইয়া আল্লার শুকরিয়া আদায় করলা। আর যেরার দিলো অউ আশা আছিল,

আল্লা পাকে জেরুজালেমেরে আজাদ করবা, তারার লগেও তাইন ইছার বেয়াপারে বাতচিত করলা।

৳ মরিয়ম আর ইউছুফে মাবুদর শরিয়ত মাফিক হকল কাম শেষ করিয়া হারলে, তারার বসত বাড়ি গালিল জিলার নাছারত গাউত গেলাগি।

৳ নাবালিক ইছার বয়স বাড়িলো, এরলগে তাইন শরিলর বল আর ইলিম-আখলেও মজবুত অইলা। আল্লার রহমত তো তান লগে আছিল।

বারো বছরর হজরত ইছা জেরুজালেম কাবা শরিফো

৳ ইহুদি অকলর আজাদি ইদর সময় আইলে ইছার মা-বাবা পরতি বছরউ জেরুজালেমো যাইতা। ৳ ইছার বয়স য়েবলা বারো বছর, অউ সময়ও হউ রেওয়াজ মাফিক তারা জেরুজালেমো আইলা। ৳ ইদ শেষ অইয়া হারলে তারা বাড়িত রওয়ানা দিলা, অইলে ইছা অউ সময় ই দলর লগে না গিয়া জেরুজালেমো রইগেলা। তান মা-বাবা ইখান টের পাইলা না। ৳ ইছাও দলর ভিতরে আছইন মনো করিয়া তারা একদিনর পথ আগুয়াই গেলা। গিয়া তারার খেশ-কুটুম আর লগর মানষর গেছে তালাশ করিয়া তানরে পাইলা না। ৳ না পাইয়া তানরে তুকাই-তুকাই হিরবার জেরুজালেমো আইলা। ৳ তিন দিন তালাশ করিয়া তানরে বায়তুল-মুকাদছো পাইলা। তারা দেখলা, তাইন মৌলানা অকলর লগে বইয়া তারার বয়ান হুনরা, আর নানান মুছলা জিকাইরা। ৳ আর যতো মানষে তান মাত হুনলা, তারা হকলেউ তান আখলদারি বাতচিত হুনিয়া তাইজুব বনিগেলা। ৳ তান মা-বাবাও তানরে দেখিয়া এক্কেরে চমকিগেলা। মায় তানরে জিকাইলা, “পুতরে, তুমি আমরার লগে ইতা করলায় কেনে? আমি আর তুমার বাবা কত পেরেশান অইয়া তুমারে তুকাইরাম।” ৳ ইছায় জুয়াপ দিলা, “তুমিতাইন কেনে আমারে তুকাইরায়? জানো না নি, আমি তো আমার গাইবি বাফর ঘরোউ রইতে অইবো?” ৳ তান মা-বাবা ই মাতর কুনু ভেদ বুজলা না। ৳ বাদে তাইন বারইয়া মা-বাবা লগে অইয়া নাছারতো গেলা, আর তারার কথামত চললা। অইলে তান মায় ইতা হকলতা দিলো গাথিয়া রাখলা।

৳ এরমাজে আল্লার মহব্বত, মানষর মায়া, বয়স আর ইলিম-আখলে তাইন আস্তে আস্তে বড় অইলা।

আল্লাহর কাম করার লাগি হজরত ইছা জুইত অইলা
(৩:১-৪:১৩)

হজরত এহিয়া নবীর তবলিগ

৩

রোমান বাদশা তিবিরিয় কৈছরর বাদশাইর পনরো বছর চলের। অউ সময় পত্তীয় পিলাত আছলা তান অধীনর এহুদিয়া জিলার হাকিম, আর হেরোদ আছলা গালিল জিলার রাজা, হেরোদর ভাই ফিলিফ আছলা যিতুরিয়া আর তাখুনিতি জিলার রাজা, আর লুসানিয়াছ আছলা অবিলিনি জিলার রাজা। এরা হকলউ আছলা রোমান বাদশার অধীনে। ৩ অউ আমলর ইহুদি জাতির পরধান ইমাম আছলা, ইমাম হানন আর কায়াফা। ঠিক অউ সময় জাকারিয়ার পুত এহিয়ার গেছে মরুভুমি এলাকাত আল্লায় তান কালাম নাজিল করলা। ৪ তেউ এহিয়া নবীয়ে জর্দান গঙ্গর কান্দা-কাছার হকল খানো গিয়া তবলিগ করলা। কইলা, গুনা থাকি মাফি পাওয়ার লাগি তোবা করিয়া তরিকার গোছল করা জরুর। ৫ এহিয়া নবীর বেয়াপারে ইশায়া নবীর কিতাবো যেলা লেখা আছিল, তাইন অউলা করলা। লেখা আছে,

মরুভুমির মাজে একজনে এলান কররা,

তুমরা মালিকর পথ ছহি করো,

তান চলার রাস্তা অকল সিদা করো।

৬ পাড়িয়া হকল নীচা জাগা ভরাট অইবো,

উচা-নীচা টিল্লাইন হমান করা অইবো।

তেড়া-বেকা হকল পথ সুজা অইবো,

গাত-গাড়া হকলতা হমান করা অইবো।

৭ আর দুনিয়ার মানষরে তরানির লাগি

আল্লায় নাজাতর যে উছিল করছইন

তামাম মানষেউ ইতা দেখবা।

৮ এহিয়া নবীর তবলিগ হুনিয়া তোবার গোছল করার নিয়তে যেরা আইলো, তাইন এরায়ে কইলা, “ও হাফর বাইচ্চাইন, আছমানি গজব

আইওর দেখিয়া জান বাচানির পথ তুমরারে খেগিয়ে বাতাই দিলো?

৮ হাছাউ যুদি তুমরা তৌবা করিয়া থাকো, তে এর ফলও দেখাও। মনে মনে কইওনা, তুমরা ইব্রাহিমর আওলাদ। হুনো, আমি কইরাম, আল্লায় চাইলে তো অউ পাথর অকল থাকিউ ইব্রাহিমর আওলাদ বানাইতা পারবা।

৯ গাছর গুড়িত তো কুড়াল লাগাইলউ আছে। যে গাছো ভালা ফল ধরে না, ই গাছ কাটিয়া আগুনিত ফলাইল অইবো।”

১০ ইতা হুনিয়া মানষে এহিয়ারে জিকাইলা, “তে আমরা কিতা করতাম?” ১১ তাইন কইলা, “কেউরর যুদি দুইটা কোর্তা থাকে, তে যার নাই তারে একটা দেউক। যার ঘরো ধান-চাউল আছে, হে-ও অউলা বিলাউক।”

১২ খাজনা তুলরা কয়জন তশিলদারে তৌবার গোছল করাত আইয়া জিকাইলা, “মুরশিদ, আমরা কিতা করতাম?” ১৩ তাইন কইলা, “নিয়ম থাকি বেশি টেকা আদায় করিও না।”

১৪ কয়জন সিপাইয়েও জিকাইলা, “হুজুর, তে আমরা কিতা করতাম?” তাইন কইলা, “কেউররে জুর-জুলুম করিয়া বা ফান্দো ফলাইয়া কুন্তা আদায় করিও না। যারঘির বেতনে খুশি রইও।”

১৫ মানষে মনে মনে আল-মসীর লাগি বার চাওয়াত আছিল, এহিয়ারে দেখিয়া তারা খুব আশা করলো, এইনউ মনোলয় আল-মসী। ১৬ অইলে এহিয়ারে তারারে কইলা, “আমি খালি পানিদি তৌবার গোছল করাইয়ার, তে আমার বাদে যেইন তশরিফ আনরা, তাইন আমা থাকিও তাক্কত আলা। তান পাওর জুতার ফিতা গেছা খুলার জুকাও আমি নায়। তাইন অইলে পাক রুহ আর আগুইন দিয়া তুমরারে গোছল করাইবা। ১৭ তান কুলা তো তান আতোউ আছে, মাড়া দেওয়া ধান অউ কুলাদি উয়াইয়া হারি ধান নিয়া উগারো তুলবা, আর ছুছারে অমন আগুনিত ফলাই জলাইবা, যে আগুইন কনুদিন নিভে না।”

১৮ অউ লাখান আরো বউত নছিয়ত করিয়া এহিয়ারে মানষর গেছে খুশ-খবরি তবলিগ করলা। ১৯ অইলে রাজা হেরোদে বউত নমুনর খারাপ কাম করায়, আর তার ভাইর বউ হেরোদিয়ারে হাংগা করায়, এহিয়ারে তারে দুষি সাইবস্তো করলা। ২০ এরদায় হে তার হকল কু-কামর লগে এওখানও বাড়াইলো, হে নবী এহিয়ারে জেলো হরাইলিলো।

হজরত ইছায় পাক গোছল করলা

❦ এহিয়া নবী জেলো হামানির আগে, তান গেছে আইয়া যেবলা বউত মানষে তৌবার গোছল কররা, অউ সময় ইছাও অনো আইয়া তারার লগে গোছল করলা। গোছলর বাদে ইছায় যেবলা দোয়া কররা, আখতাউ আল্লার আরশর দুয়ার খুলি গেল, ❦ আর পাক রুহ পারোর ছুরত ধরিয়া তান উপরে নাজিল অইলা। লগে লগে বেহেস্তি অউ আওয়াজও হুনা গেল, “তুমিউ আমার খাছ মায়ার জন, তুমার উপরে আমি খুব খুশি।”

হজরত ইছা আল-মসীর খান্দানর পরিচয়

❦ অনুমান তিশ বছর বয়সর কালো ইছায় তবলিগ কাম শুরু করলা। মানষে জানতা তাইন ইউছুফর পুয়া। ইউছুফর ময়-মুরকিব অইলা,

- ❦ আলি, মাখাত, লেবি, মালকি, ইয়ান্নাই, ইউছুফ,
 - ❦ মাখাতিয়া, আমোজ, নাউম, ইছলি, নাগ্লাই,
 - ❦ মাহাত, মাখাতিয়া, শিমীয়, ইউসেখ, ইহুদা,
 - ❦ ইউহান্নান, রীসা, জেরবাবিল, সালতিয়েল, নীরি,
 - ❦ মালকি, আদি, কাছাম, ইলমাদাম, ইয়ের,
 - ❦ ইউছা, এলিয়েজের, ইউরিম, মাখাত, লেবি,
 - ❦ ছামাউন, এহুদা, ইউছুফ, ইউনান, ইলিয়াকিম,
 - ❦ মালিয়া, মান্না, মাখাতা, নাথান, দাউদ নবী,
 - ❦ ইয়াস, উবায়েদ, বোয়াজ, সেলিম, নাহিশ,
 - ❦ আমিনাদাব, আদমিন, আরনী, হাছির, ফিরোজ, এহুদা,
 - ❦ ইয়াকুব নবী, ইসহাক নবী, ইব্রাহিম নবী, তারেখ, নাহুর,
 - ❦ সারুজ, রাউ, ফালেজ, আবের, শালেখ,
 - ❦ কিনান, আফাঁকছাদ, সাম, নুহ নবী, লামাক,
 - ❦ মাতুশালাখ, ইদ্রিছ নবী, ইয়ারেদ, মাহলাইল, কেনান,
 - ❦ ইনোস, শিস নবী, আদম,
- আল্লা পাক।

হজরত ইছারে ইবলিছ-শয়তানে পরিক্ষা করলো

৪ ইছা পাক রুহে কামিল অইয়া, জর্দান গাঙ্গো থাকি উঠিয়া মরুভুমিত গেলগি। গিয়া পাক রুহর ইশারায় একলাগা চাল্লিশ দিন মরুভুমিত ঘুরিলা। ৩ আর ইবলিছ আইয়া তানরে পরিক্ষা চলাইলো। অউ চাল্লিশ দিন একলাগারে রোজা আছলা, কুনুজাত খানা খাইছইন না। এরবাদে তান পেটো ভুক লাগলো।

৩ তেউ ইবলিছে তানরে কইলো, “তুমি যুদি ইবনুল্লা, আল্লার খাছ মাযার জন অও, তে অউ পাথররে কওনা রুটি অইযিতো।” ৪ ইছায় জুয়াপ দিলা, “আল্লার কালামো বাতাইল অইছে, খালি রুটি খাইলেউ মানুষ বাচে না।” ৫ বাদে ইবলিছে তানরে খুব উচা এক জাগাত লইয়া গেল, নিয়া হারি এক পলকে দুনিয়ার তামাম মুলুক তানরে দেখাইলো আর কইলো, ৬ “ই তামাম মুলুকর বাদশাই আর জাক-জমক আমি তুমারে দিলাইমু। ইতা হক্কলতার মালিকানা আমারে দেওয়া অইছে। আমি যারে খুশি তারে দিতাম পারি; ৭ খালি তুমি আমারে সহইজদা করিলাও, তেউ ই হক্কলতা তুমার অইযিবো।” ৮ ইছায় তারে কইলা, “আল্লার কালামো আছে, তুমি খালি আপন আল্লা মাবুদরে সহইজদা করবায়, খালি তান এবাদত করবায়।” ৯ তেউ হে ইছারে লইয়া জেরুজালেম টাউনো গেল, গিয়া পবিত্র কাবা ঘর বায়তুল-মুকাদ্দছর মিনারার উপরে তানে উবা করিয়া কইলো, “তুমি যুদি ইবনুল্লা, আল্লার খাছ মাযার জন অও, তে দেখিছইন, অন থাকি ফাল দিয়া লামাত পড়ো। ১০ কিতাবো তো লেখা আছে,

আল্লায় তান ফিরিস্তা অকলরে হুকুম দিবা,

আর তারা তুমারে বাচইবা।

১১ তারা নিজর আতদি তুমারে ধরিলিবা,

যাতে তুমার পাওত কুনু পাথরর চুট না লাগে।”

১২ ইছায় তারে কইলা, “কিতাবো লেখা আছে, তুমি তুমার আল্লা মাবুদরে পরিক্ষা করাত লাগিও না।”

১৩ ইবলিছে তার হক্কল নমুনার পরিক্ষা শেষ করিয়া, আপাততো তান গেছ থাকি হরিয়া গেলগি।

গালিল জিলাত হজরত ইছাৰ কেৰামতি আৰ তবলিগ
(৪:১৪-৯:৫০)

নিজৰ গাউত হজরত ইছা

১৪ বাদে পাক ৰুহৰ কুদরতে ইছা গালিল এলাকাত গেলা, গিয়া হারলে তান নাম চাইরোবায় রটিগেল। ১৫ তাইন হনর মছিদো-মছিদো গিয়া বয়ান তালিম দিলা, তেউ হকল মানষে তান তারিফ করলো।

১৬ আৰ ইছা হউ নাছারত গাউত আইলা, যে গাউত তাইন হুরু থাকি বড় অইছইন। অনো আইয়া তাইন নিজর নিয়ম মাফিক জুম্মাবারে মছিদো গিয়া খুতবা পড়াত উবাইলা। ১৭ ইশায়া নবীর ছহিফাখান তান আতো দেওয়া অইলো। তাইন কিতাব খুলিয়া অউ আয়াত বার করলা, যে আয়াতো লেখা আছে,

১৮ আমার দিলো মাবুদর ৰুহ বসত করইন,
তাইনউ আমারে খেলাফতি দিয়া বেজিছইন,
গরিব অকলর গেছে খুশ-খবরি জানানির লাগি।
আৰ বন্দি অকলর গেছে আজাদির কথা,
আন্দা অকলর গেছে চউখে দেখার কথা,
যেৱার উপরে জুলুম অর তারারে বাচানির কথা
এলান করার লাগি বেজিছইন।

১৯ আৰ অউ কথা এলান করার লাগিও বেজিছইন,
অখন মাবুদর রহমত দেখানির সময় অইগেছে।

২০ খুতবা তিলাওত করিয়া হারলে, তাইন কিতাবখান আটাইয়া মছিদর মতল্লীর আতো দিয়া বইলা, মছিদর হকল মানষে তান বায় খিয়ান ধরি চাই রইছে। ২১ তাইন কইলা, “আছমানি কিতাবর ই আয়াত খানাইন, আইজ আপনারা তুনار লগে লগেউ ফলিগেল।” ২২ হকল মানষে তান তারিফ করলো, তান মুখ থাকি অতো সুন্দর বয়ান হুনিয়া তাইজ্জুব অইগেল। তারা কইলো, “এইন ইউছুফর পুয়া নায়নি বা?”

২৩ এরমাজে ইছায় তারারে কইলা, “আপনারা নিচয় আমারে অউ ছিল্লেখ হুনাইবা, ডাক্তর-সাব, নিজর বেমার শিফা করো। কফরনাহুমো বুলে বউত কেরামতি-মোজেজা দেখাইছো, তে অখন নিজর গাউতও অতা দেখাও না। ২৪ হুনউক্কা, আমি আপনাইত্তরে হক কথা কইরাম, কুনু নবীরেউ তান নিজর গাউর মানষে মানইন না। ২৫ আর ইখানও হাছা কথা, ইলিয়াছ নবীর জমানাত একলাগা সাড়ে তিন বছর কুনু মেঘ অইছিল না, আস্তা দেশো বেজুইতা নিদান আছিল। হউ সময় তো ইসরাইল দেশো বউত ডাড়ি বেটিন আছলা, ২৬ অইলে ইলিয়াছ নবীরে এরা কেউরর গেছে না বেজিয়া, খালি সিদন দেশর সারিফত গাউর এক ডাড়ি বেটির গেছে বেজা অইছিল। ২৭ আর আল-ইয়াছা নবীর আমলো ইসরাইল দেশো বউত পচা-কুঠ বেমারি আছলা, অইলে এরা কেউররে ভালা না করিয়া, খালি সিরিয়া দেশর নামানরে ভালা করা অইছিল।”

২৮ ইখান হুনিয়াউ মছিদর সব মানুষ গুছায় আগুইন অইগেলা। ২৯ তারা উঠিয়া তানরে ঠেলিয়া খেদাইয়া গাউর বারে লইয়া গেল, গিয়া গাউর কোনার খাড়া টিল্লার উপরে নিয়া, ধাক্কাদি তলে ফালাইতো চাইলো। ৩০ অইলে ভিড়র মাজ খনে তাইন আটিয়া হরিয়া গেলোগি।

আল-মসীয়ে বউত বেমারির শিফা করলা

৩১ বাদে ইছা গালিল এলাকার কফরনাহুম টাউনো গেলা, গিয়া জুম্মাবারে মানষরে ওয়াজ নছিয়ত করলা। ৩২ তান ওয়াজ হুনিয়া মানুষ তাইজ্জুব অইগেলা, তাইন তো পুরা হিন্মত আলা জনর লাখান তালিম দিতা।

৩৩ হউ মছিদো জিনর আছর আলা এক বেটা আছিল। হে জুরে জুরে চিল্লাইয়া কইল, ৩৪ “ও নাছারতর ইছা, আমারর গেছে কেনে আইছইন? আমাররে বিনাশ করাত আইছইন নি? আমি জানি আপনে কে, আপনেউ আল্লার হউ পাক-পবিত্র জন।” ৩৫ ইছায় তারে ধামকি দিয়া কইলা, “চুপ, এর ভিতর থাকি বারই যা।” জিনে লগে লগেউ তারে আছাড় মারি হকলর মাজখানো ফালাইয়া, কুনুজাত খেতি না করিয়া ছাড়িয়া গেলোগি। ৩৬ ইতা দেখিয়া মানুষ তাইজ্জুব বনিয়া মাতা-মাতি লাগাইলা, “ইতা কিতা দেখলাম? তাইন হিন্মত আর খেমতা খাটাইয়া জিন অকলরে হুকুম দেইন, তারাও দেখি বারইয়া যায়গি।” ৩৭ বাদে হিনর হকল জাগাত ইছার কেরামতির খবর রটিগেল।

৬৮ মছিদ থাকি বারইয়া তাইন সাইমনর বাড়িত গেলা। সাইমনর হড়ির খুব বেশি তাপ উঠছিল, এরদায় হকলে ইছারে খুব মিনত করলা। ৬৯ তাইন সাইমনর হড়ির কান্দাত উবাইয়া তাপরে ধমক দিলা। ধমকর লগে লগেউ তাপে ছাড়িদিলা। বেটিয়ে উঠিয়া তারার মেহমান দারিত লাগলা।

৭০ হাইঞ্জা বালা মানষে বউত জাতর বেমারিরে লইয়া ইছার গেছে আইলা। ইছায় তারা হকলর গতরো আতাই দিয়া বেমার ভালা করলা।

৭১ জিনর আছর আলাও বউত বেমারি আছলা, তারাও ভালা আইলা। জিন অকলে জুরে জুরে চিল্লাইয়া কইলা, “আপনেউ ইবনুল্লা, আল্লার খাছ মায়ার জন।” আইলে তাইন ইতারে ধামকি দিয়া মুখ বন্দ করলা। তারার তো জানা আছিল, তাইনউ আল্লার ওয়াদা করা হউ আল-মসী।

৭২ বিয়ানে উঠিয়া হারি, ইছা হি গাউ ছাড়িয়া এক নিরাই জাগাত আইলা। মানষে তানরে তুকাই তুকাই তান ধারো আইলো, আইয়া মিনত কাজ্জি করলো যাতে তাইন তারার গেছে রইন। ৭৩ আইলে তাইন জুয়াপ দিলা, “আমি আরো বউত জাগাত গিয়া আল্লার বাদশাইর খুশ-খবরি তবলিগ করা জরুর, অউ কামর লাগিউ আল্লায় আমারে বেজিছইন।” ৭৪ বাদে তাইন আস্তা ইহুদি দেশর মছিদাইন্তো গিয়া তবলিগ করলা।

গাইবি মাছ পাইয়া ইমান আনা

এক দিন ইছা গালিল আওরর পারো উবা আছলা, অউ সময় বউত মানুষ আল্লার কালাম হুনর লাগি তান কান্দাত আইয়া ঠেলাঠেলি লাগাইলা। ৭৫ ইছায় দেখলা, আওরর কিনারো দুখান জালুয়া নাও লাগাইল। নাও থাকি লামিয়া জালুয়া অকলে তারার জাল ধইরা। ৭৬ ইছা গিয়া সাইমন নামর এক জালুয়ার নাওয়ো উঠিয়া তারে কইলা, নাওখান ভাসাইয়া কিছু পানিত নিবার লাগি। কইয়া তাইন নাওয়ো বইয়া মানষরে ওয়াজ নছিয়ত করাত লাগলা।

৭৭ নছিয়ত বাদে তাইন জালুয়া সাইমনরে কইলা, “নাওখান গইন পানিত নেও আর জাল ফালাও।” ৭৮ সাইমনে কইলা, “হুজুর, আস্তা রাইত কষ্ট করিয়াও কুনু মাছ পাইছি না, তা-ও আপনার কথায় জাল ফালাইরাম।”

৭৯ জাল ফালানির বাদে অতো বেশি মাছ জালো হমাইলা, মাছর ঠেলায় জাল ফারিযিবার দশা। ৮০ অউ তারা সাইয্যর লাগি লগর নাওর

জালুয়ারে ডাক দিলা। তারা আইয়া মাছ ধরিয়া নাও ভরিলিলা, জালো অতো মাছ হামাইছিল যেন, মাছর ভারে দুইও নাও ডুবুডুবু অইগেল।

৫ ইতা দেখিয়া, সাইমন-পিতরে ইছার পাওয়ো পড়িয়া কইলা, “হুজুর, আমি তো গুনাগার মানুষ, আমার গেছ থাকি তশরিফ খান নেউক্কাগি।”

৬ কারন, অতো মাছ দেখিয়া সাইমন-পিতর আর তান লগর হক্কেলে তাইজ্জুব বনিগেলা। ৭ সাইমনর লগর জালুয়া জিবুদিয়ার দুইও পুয়া ইয়াকুব আর হাম্মানেও ইতা দেখিয়া তাইজ্জুব অইলা। তেউ ইছায় সাইমনরে কইলা, “ডরাইও না, অখন থাকি আর মাছ নায়, তুমি আল্লার নামে মানুষ ধরবায়।” ৮ বাদে তারা নাও লইয়া কিনারাত আইলা, আর হক্কেলতা থইয়া ইছার লগে রওয়ানা অইগেলা।

নাপাক পচা-কুষ্ঠ বেমারিরে ভালা করা

৯ একবার ইছা এক গাউত গেলা। হউ গাউর এক বেটার আস্তা গতর জুড়ি নাপাক পচা-কুষ্ঠ বেমার আছিল। ইছারে দেখিয়াউ হে তান পাওয়ো পড়িয়া মিনত কাজ্জি লাগাইলো, “হুজুর, আপনার মনে চাইলে তো আমারে অউ নাপাক বেমার থাকি ভালা করতা পারবা।” ১০ ইছায় আত বাড়াইয়া তারে ছইয়া কইলা, “অয়, আমিও চাইরাম, তুমি পাক-ছাফ অও।” কওয়ার লগে লগেউ তার বেমার কমিগেল।

১১ ভালা অইয়া হরলে ইছায় তারে হুকুম দিলা, “ইতা আর কেউররে হুনাইও না, তুমি গিয়া খালি ইমাম ছাবরে দেখাও। মুছা নবীর শরিয়ত মাফিক পাক-ছাফ অওয়ার লাগি যেলা কুরবানি করা জরুর, অউ কুরবানি দিলেউ মানষে জানিলিবা, তুমি ভালা অইছো।” ১২ অইলে ইছার খবর চাইরোবায় রটিগেল। এরদায় তান মুখর বুলি হুনার লাগি আর বেমারি অকল ভালা অওয়ার নিয়তে, বউত মানুষ তান গেছে আইলা। ১৩ অইলে তাইন কুনু না কুনু নিরাই জাগাত গিয়া হামেশা দোয়া করতা।

গুনা মাফ করার খেমতা হজরত ইছার আছে

১৪ একদিন ইছা তালিম দেওয়াত আছলা, অউ মজলিছো আলিম অকল আর ফরিশি মজহবর বউত মোল্লাইন বওয়াত আছলা। তারা জেরুজালেম

টাউন, গালিল আর এহুদিয়া জিলার নানান গাউয়াইন থাকি আইছইন। ইছার মাজে মাবুদর কুদরতি বল আছিল, অউ বলেউ বেমারি অকলরে শিফা করতা।

১৮ এরমাজে কয়জন মানষে একজন অবশ বেমারিরে পলোদি বইয়া লইয়া আইলা। তারা চাইলা তারে নিয়া ঘরর ভিতরে ইছার ছামনে থইতা।

১৯ অইলে ভিড়র লাগি ঘরো হামানির পথ পাইলা না। অউ তারা চালর উপরে উঠিয়া, চালর ছানি খুলিয়া পলো সুদ্ধা বেমারিরে ইছার ছামনে মানষর মাজখানো লামাই দিলা। ২০ তারার ইমানর বল দেখিয়া ইছায় কইলা, “ভাইরে, তুমার গুনা মাফ করি দিলাম।”

২১ ইখান হুনিয়া আলিম অকলে আর ফরিশি দলর মোল্লাইন্তে মনে মনে কইলা, “ই মানুষগু খেগু, হে অলা শিরিকি করের? খালি আল্লা ছাড়া আর কেউ গুনা মাফ করতো পারে নি?” ২২ তারার দিলর চিন্তা ইছায় বুজিলিলা, বুজিয়া কইলা, “আপনারা কেনে ইলা চিন্তা কররা?

২৩ আমি কুনখান কওয়া সুজা, তুমার গুনা মাফ করি দিলাম? বা তুমি উঠিয়া আটিয়া তুমার বিছনা লইয়া বাড়িত যাওগি? কুনখান সুজা? ২৪ তে অখন আপনারা পরমান দেখউক্কা, ই দুনিয়াত গুনা মাফির খেমতা আমি বিন-আদমর আছে।” অখান কইয়াউ তাইন বেমারি বেটারে কইলা, “ওবা, আমি তুমারে কইরাম, উঠো, তুমার খেতা-বালিশ লইয়া বাড়িত যাওগি।”

২৫ কইতেউ হি বেমারি বেটা হকলর ছামনে উবাইয়া, তার খেতা-বালিশ লইয়া আল্লার তারিফ করি করি নিজর বাড়িত গেলোগি। ২৬ ইতা দেখিয়া হকল তাইজুব বনিয়া, আল্লার তারিফ করি ডরাই ডরাই কইলা, “আইজ ইতা কিজাত কেলামতি কাম দেখলাম।”

আল-মসীয়ে লেবিরে দাওত দিলা

২৭ বাদে ইছা বারে গেলা, গিয়া তশিল অফিসো লেবি নামর এক খাজনা তুলরারে বওয়াত দেখলা। দেখিয়া তারে কইলা, “আও, আমার উম্মত অও।” ২৮ দাওত হুনিয়াউ লেবিয়ৈ তান হকলতা ফালাইয়া ইছার লগে অইয়া রওয়ানা দিলাইলা।

২৯ বাদে লেবিয়ৈ তান নিজর বাড়িত ইছার লাগি বড় এক খাওয়া-দাওয়ার বেবস্তা করলা। তারার লগে বউত ঘুষখুর খাজনা তুলরা আর

আরো মানুষ খাওয়াত বইলা। ۞ তেউ ফরিশি আর তারার দলর আলিম অকলে নাখুশ অইয়া ইছার সাগরিদ অকলরে কইলা, “তুমরা খাজনা তুলরা টগবাজ আর নাফরমান অকলর বাড়িত খানা-পিনা খাও কেনে?” ۞ ইছায় তারারে জুয়াপ দিলা, “ভালা মানষর লাগি তো ডাক্তরর জরুর নাই, অইলে বেমারি অকলর লাগি জরুর আছে। ۞ তে আমিও পরেজগার অকলরে দাওত দেওয়াত আইছি না, খালি গুনাগার অকলরে দাওত দেওয়াত আইছি, যাতে তারা তৌবা করইন।”

পুরান তালিম থাকি হজরত ইছার তালিম ভালা

۞ বাদে হউ আলিম আর ফরিশি অকলে কইলা, “এহিয়ার শিষ্য অকলে হামেশা রোজা রাখইন, দোয়া করইন, আর ফরিশির শিষ্য অকলেও অলা করইন, তে আপনার শিষ্য অকলে কুনু সময়উ খানি বাদ দেইন না কেনে?”

۞ ইছায় জুয়াপ দিলা, “নশা লগে থাকলে লগর বৈরাতিরে কুনু উপাস রাখা যায় নি? ۞ অইলে অমন এক দিন আইবো, যেবলা নশারে তারার গেছ থাকি নেওয়া অইযিব। হউ সময় তারা রোজা রাখবা।” ۞ ইছায় তারারে তালিম দিবার লাগি অউ মিছাল হুনাইলা, কইলা, “নয়া কোর্তার টুকরা ছিড়িয়া, কেউ পুরান কোর্তাত তালি দেয় না। ইলা করলে তো নয়াটাও নষ্ট আইবো, আর নয়া কাপড়র তালি তো পুরান কাপড়র লগে মিলতোও নায়। ۞ পুরান চামড়ার থলিত কেউ তাজা আংপুরর রস ভরে না। ভরলে অউ তাজা রসর ফাফে থলি ফাটিয়া রস আর থলি দুইওতা বরবাদ অয়। ۞ তাজা রস নয়া থলিত থইতে অয়। ۞ আর আংপুরর পুরান রস খাইয়া হারলে, কুনু মানষে নয়া রস খাইতো চায় না। তারা কইন, পুরানতাউ মজা।”

জুম্মাবারর বেয়াপারে তালিম

۞ এক জুম্মাবারে ইছা গম খেতর আইলেদি আটিয়া যাইরা। অউ সময় তান সাগরিদ অকলে গমর ছড়া ছিড়িয়া আতো ঘষি-ঘষি খাইরা। ۞ ইতা দেখিয়া ফরিশি মজহবর কয়জনে কইলা, “মুছা নবীর শরিয়ত মাফিক তো জুম্মাবারে যেকুনু কাম করা হারাম, তে তুমরা ই খানর ছড়া ছিড়িয়ায় কেনে?” ۞ ইছায় জুয়াপ দিলা, “তে দাউদ নবী আর তান

লগর হকলর যেবলা ভুক লাগছিল, হি সময় তারা কিতা করছলা, ইতা আপনারা পড়ছইন না নি? ৪ তাইন নিজে আল্লার ঘরো হামাইয়া পবিত্র রুটি খাইছলা, আর তান লগর অকলরেও খাওয়াইছলা। আসলে খালি ইমাম অকল ছাড়া আর কেউ ই রুটি খাওয়া জাইজ আছিল না। ৫ বাদে ইছায় তারারে কইলা, “হুনো, আমি বিন-আদমউ জুম্মাবারর মালিক।”

৬ আরক জুম্মাবারে ইছা মছিদো গিয়া ওয়াজ নছিয়ত করাত আছলা। হনো এক বেমারি বেটা আছিল, তার ডাইনর আত বেমারে হুকাই গেছে।

৭ মৌলানা আর ফরিশি দলর মানষে ইছারে ফান্দো ফালাইতা করি ভানা তুকানিত আছলা। তারা দেখতা চাইলা, জুম্মার দিন তাইন কেউররে ভালা করইন নি, করলে তানরে দুষি বানাইতা পারবা। ৮ ইছায়ও তারার দিলর কুমতলব বুজিলিলা। বুজিয়া তাইন হুকনা আত আলা বেটারে কইলা, “ওবা, তুমি আইয়া হকলর ছামনে উবাওছইন।” তেউ বেটা আইয়া উবাইলো।

৯ ইছায় তারারে জিকাইলা, “আমি আপনাইন্তরে এখান কথা জিকাইরাম, জুম্মাবারে কুন কাম করা জাইজ, ভালা কাম না বাদ কাম? জান বাচানি, না জানর বিনাশ করা?”

১০ বাদে তাইন চাইরো গালার হকলর বায় চাইয়া হউ বেটারে কইলা, “তুমার আতখান বাড়াও।” বেটায় তার আত বাড়াইলো, আর পুরাপুর ভালা অইগেল। ১১ ইতা দেখিয়া হউ মোল্লা অকলর খুব গুছা উঠলো। তারা পরামিশ চলাইলা, ইছারে কেমনে থামাইল যায়।

বারোজন খাছ সাহাবি

১২ বাদে ইছা দোয়া করার লাগি এক পাড়ো উঠিলা, আর আস্তা রাইত আল্লার গেছে দোয়া করলা। ১৩ বিয়ানি বালা তান সাগরিদ অকলরে ডাকিয়া কান্দাত আনলা, এরার মাজর বারো জনরে পছন্দ করিয়া, তান খাছ সাহাবি বানাইলা। ১৪ অউ বারো জন অইলা,

সাইমন - ইছায় এন নয়্য নাম দিলা পিতর,

সাইমনর ভাই আন্দ্রিয়াছ,

ইয়াকুব, হন্নান,

ফিলিফ, বর্থলময়,

১৫ মথি, থুমাছ,

আলফির পুয়া ইয়াকুব,
 মুক্তিযোদ্ধা সাইমন,
 ১৬ ইয়াকুবর পুয়া এহুদা,
 আর ইহুদা ইস্কারিয়াত - অউ ইহুদায় বাদে বেইমানি করছিল।

পাড়র পেটো হজরত ইছার তালিম

১৭ এরমাজে ইছায় তান সাহাবি অকলরে লইয়া উপরে থাকি লামিয়া
 পাড়র পেটো হমান এক জাগাত আইয়া উবাইলা। হিনো তান বউত উম্মত
 দলা অইছলা, জেরুজালেম টাউন আর এহুদিয়া জিলা থাকি, দরিয়র
 পারর সোর আর সিদন এলাকা থাকিও দল বান্দি-বান্দি মানুষ আইছলা।

১৮ তারা তান বয়ান হুনর খিয়ালে আর বেমার থাকি শিফা অওয়ার নিয়তে
 আইলা। আর যারার উপরে জিনর আছর আছিল, তারাও ভালা অইলা।

১৯ হকল মানষেউ তানরে আত দিয়া ছইতো চাইলো, কারন তান ভিতর
 থাকি কুদরতি শক্তি বারনিয়ে, এরা হকলর বেমার কমছিল।

২০ তেউ ইছায় আপন সাগরিদ অকলর বায় চাইয়া কইলা,

“তুমরা যেরা গরিব তুমরাউ কপালি,
 আল্লার বাদশাই তো তুমরার লাগিউ।

২১ তুমরা যতো জনর পেটো ভুক আছে,
 তুমরাউ কপালি,
 তুমরা পেট ভরিয়া খাইবায়।

তুমরা যেরা কান্দিরায় তুমরাউ কপালি,
 বাদে তো আসিবায়।

২২ “তুমরাউ কপালি, যেবলা বিন-আদমর দায় মানষে তুমরারে ঘিন্নায়,
 গাউ থাকি বাছিয়া একঘরি করে, বদনাম গায়, আর তুমরার নাম হুনলে
 মুখর থু ফালায়। ২৩ ইলা করলে তুমরা খুশি অইও, ফুর্তিয়ে নাচিও,
 কারন বেহেস্তো তুমরা বউত বড় পুরুস্কার পাইবায়। জানো নি, অউ
 নাফরমান অকলর বাফ-দাদাইন্তেও আল্লার নবী অকলর উপরে অলা
 জুলুম করতা।

- ২৪ “হায়রে ধনি অকল,
তুমরার সুখ তো দুনিয়াতউ কামাইলিরায়।
- ২৫ হায়রে পেট ভরিয়া খাওরা অকল,
তুমরাও ভুকে ছটফট করবায়।
হায়রে হায় যেরা অখন আসিরায়,
তুমরা কান্দা-কাটি আর আহাজারি করবায়।
- ২৬ হায়রে হায়, মানষে য়েবলা তুমরার সুনাম গায়,
জানো নি, অতা মানষর বাফ-দাদাইন্তেও
আগর আমলর ভণ্ড নবী অকলর
অলা সুনাম গাইতো।

২৭ “তুমরা যতোজন আমার তরিকায় চলতায় চাও, আমি তুমরারে কইরাম, তুমরা যারযির দুশমনরেও মহস্বত করিও। যেরা তুমরারে যিন্নায়, তুমরা তারার ভালাই করিও। ২৮ যেরা তুমরার লাগি লান্নত মাংগে, তুমরা তারার লাগি রহমত চাইও। আর যেরা তুমরার বদনাম করে, তুমরা তারার লাগি দোয়া করিও। ২৯ য়ে তুমার এক গালো চড় মারে, তারে আরক গাল পাতিয়া দিও। য়ে তুমার চাদ্দর কাড়িয়া নিতো চায়, তারে কোর্তাও খুলিয়া দিও। ৩০ যারা তুমার গেছে চায়, তারারে দিও। কেউ তুমার কুন্ চিজ নিলেগি, তার গেছে আর ফিরত চাইও না। ৩১ হুনো, তুমরা মানষর গেছ থাকি য়েলাখান বেবহার পাইতায় চাও, তুমরাও হকলর লগে অউ লাখান বেবহার করো।

৩২ “যারা তুমরারে মায়া করে, তুমরা যুদি খালি তারারেউ মায়া করো, তে তুমরা বাহবা পাইতায় কিলা? ইলা তো নাফরমান অকলেও একে-অইন্যরে মায়া করে। ৩৩ আর যারা তুমরার ভালাই করে, তুমরা যুদি খালি তারার ভালাই করো, তে বাহবা পাইবায় কিলা? নাফরমান অকলেও তো ইলা করে। ৩৪ য়ে মানষর গেছ থাকি তুমরা করজো পাইবার আশা আছে, তুমরা যুদি খালি তারেউ করজো দেও, তে কিলা বাহবা পাইবায়? নাফরমান অকলেও একে-অইন্যরে ইলা করজো দেয়, হে আশা করে বিপদো পড়লে হে-ও হন থাকি করজো পাইবো। ৩৫ তে আমি তুমরারে কইরাম, তুমরা যারযির দুশমনরেও মায়া করিও, তারার ভালাই করিও। বদলা পাওয়ার আশা না করিয়া করজো দিও, তেউ তুমরার লাগি বড়

বখশিশ আছে। তুমরা আল্লা পাকর আওলাদ বনবায়। তাইন তো নিমক-হারাম আর খারাপ মানষরেও দয়া করইন। ৩৬ তুমরার নিরাকার বাফ যেলা দয়াল, তুমরাও অলান দয়াল অও।

৩৭ “মানষর বিচার করিও না, তেউ তুমরাও বিচারর দাড়ে পড়তায় নায়। কেউররে দুষি সাইবস্তো করিও না, তেউ তুমরাও দুষি অইতায় নায়। মাফ করিয়া দিও, তেউ তুমরাও মাফি পাইবায়। ৩৮ দান-খয়রাত দেও, তেউ তুমরারেও দেওয়া অইবো। মানষে জাতাই-জাতাই ভরিয়া আনিয়া তুমরার গাটিত বান্দিয়া দিবা। তুমরা যেলা মাপিয়া দিবায়, তুমরার লাগিও অলা মাপা অইবো।”

৩৯ বাদে ইছায় তারারে অউ কিছা হুনাইলা, “এক আন্দায় কুনু আরক আন্দারে পথ দেখাইতো পারে নি? তে দুইওজনউ গাতো পড়তো নায় নি? ৪০ সাগরিদ উস্তাদ থাকি বড় নায়, অইলে যে সাগরিদে পুরাপুর তালিম লয়, হে-ও উস্তাদর লাখান বনিয়ায়। ৪১ তুমার ভাইর চখুত গুড়া হামাইছে অখানউ দেখরায়, অইলে নিজর চউখো গাছর চেলি আছে ইতা দেখরায় না? ৪২ তুমার চখুত চেলি হামাইছে ইখান না চাইয়া তুমার ভাইরে কিলা কইবায়, ভাইছাব, তুমার চউখো যে গুড়া পড়ছে, আও, অগু বার করিয়া দেই। তুমার নিজর চখুর চেলিউ তো দেখরায় না। ও ভন্ড, পয়লা তুমার নিজর চউখ থাকি চেলি হরাও, তেউ ভাইর চউখ থাকি গুড়া বার করাত লাগলে ভালা করি দেখতায় পারবায়। ৪৩ ভালা গাছে তো মন্দ ফল ধরে না, আর মন্দ গাছে ভালা ফল ধরে না। ৪৪ ফল দেখিয়া গাছ চিনা যায়। মানষে তো রিফুজি লত থাকি বরই পাড়ে না, বা ছুতরা গাছ থাকি আংপুর পাড়ে না। ৪৫ ভালা মানষর দিলর নেক ভাভার থাকি ভালাই বারয়, আর বদ মানষর বদ দিল থাকি বদউ বারয়। মানষর দিলর ভাভারো যেতা জমা আছে, অতা থাকিউ তো জবানর বুলি বারয়।

৪৬ “তুমরা কেনে আমারে খালি হুজুর হুজুর কইরায়, অথচ আমি যেতা কই, ইতা মানো না? ৪৭ আমার কান্দাত আইয়া আমার বয়ান হুনিয়া যে জনে আমল করে, হে কার লাখান, আমি তুমরারে কইরাম। ৪৮ হে অউ মানষর লাখান, যে ঘর বানানির নিয়তে গইন করি মাটি খুদিয়া মজবুত করি ঘরর খুটি বানাইলো, বাদে বইন্যা আইলো আর পানির ফুতে অউ ঘররে ঠেলিলো, অইলে ইখান লড়াইতো পারলো না, ইখান তো মজবুত করি বানাইল। ৪৯ আর আমার বয়ান হুনিয়া যে জনে আমল না করে, হে অউ লাখান মানুষ, যেগিয়ে

গাত না খুদিয়া খালি নরম মাটির উপরে ঘর বানাইলো, বাদে বানর ফুতর থাকায় তার ঘর পড়িয়া ভাংগিয়া চুরমার অইগেল।”

বিদেশি ছুবেদারর গুলামর শিফা

৭ ইছায় তান বয়ান শেষ করিয়া মানষর গেছ থাকি বিদায় লইয়া কফরনাহুম টাউনো গেলাগি। ২ হিনো রোমান সিপাইর এক ছুবেদারর গুলাম বেমার পড়িয়া মরার পথি অইগেছিল, ছুবেদার ছাবে ই গুলামরে খুব মায়া করতা। ৩ তাইন ইছার খবর হুনিয়া কয়জন ইহুদি মুরব্বিরে ইছার গেছে পাঠাইলা, তান গুলামগুরে ভালা করতা সুপারিশর লাগি। ৪ মুরব্বি অকল আইয়া ইছারে মিনত কাজ্জি করি কইলা, “ছাব, যে জনে আমরারে আপনার গেছে পাঠাইছইন তান গুলামর লাগি মিনত করতাম, এইন আসলেও দয়া পাওয়ার লাখ। ৫ তাইন বিদেশি অইলেও আমরার ইহুদি জাতিরে খুব মায়া করইন। আমরার মছিদ খানও তাইন বানাই দিছইন।”

৬ ইছা তারার লগে আইয়া রওয়ানা দিলা, তাইন ছুবেদারর বাড়ির কান্দাত আইতেউ ছুবেদারে নিজর দুস্ত অকলরে পাঠাইয়া জানাইলা, “হুজুরে আর কষ্ট করইন না যানু, আপনার মতো জনে আমার বাড়িত তশরিফ আনরা, আমি তো ইতার লাখ নায়। ৭ আপনার ছামনে উবানির যোইগ্যও আমি নায়, এরদায় আমি আইরাম না। তে আপনে খালি জবানদি কইলেউ, আমার গুলামর বেমার শিফা অইযিবো। ৮ আপনে তো বুজরা, আমি আমার কামাভারর হুকুমে চলি, অউলা আমার সিপাই অকলও আমার হুকুমে চলইন। আমি এরা একজনরে আও কইলে আয়, যাও কইলে যায়, আমার গুলামরে অউ কাম করো কইলে, হে করে। তে আপনেও অলা খালি মুখদি কইলেউ, হক্কলতায় মানবো।”

৯ ইখান হুনিয়া ইছা এক্কেরে তাইজ্জুব বনিগেলা, দলে-দলে যতো মানুষ তান খরে আইয়া আওয়াত আছিল, এরার বায় ফিরিয়া কইলা, “আমি তুমরারে কইরাম, ই ছুবেদার তো বিধর্মী রোমান মানুষ, অইলে আমার বনি ইসরাইলর মাজেও তো অতো মজবুত ইমানদার আমি কনুখানো দেখছি না।” ১০ হাছাউ ছুবেদারে যারারে পাঠাইছলা, তারা ঘরো আইয়া দেখলা, হি গুলামর বেমার কমিগেছে।

হজরত ইছায় মুর্দারে জিন্দা করলা

১১ খুড়া কয় দিন বাদে ইছায় তান সাগরিদ অকল আর আরো বউত মানুষ লইয়া নায়িন নামর এক গাউত আইলা। ১২ তাইন যেবলা হউ গাউত আইয়া হামাইরা, অউ সময় মানষে খরারো করি এক মইয়ত লইয়া যাইরা। ই মইয়ত আছিল এক ডাড়ি বেটির একমাত্র পুয়া। গাউর বউত মানুষ অউ খরারর লগে আছিল। ১৩ অউ ডাড়ি বেটিরে দেখিয়া ইছার দিলো দয়া হমাইলো, তাইন কইলা, “ওগো, কান্দিও না।” ১৪ কইয়া তাইন খরারর কান্দাত গিয়া খরারো ছইলা, তেউ মইয়ত বইয়া নেওরা বেটাইন উবাই গেলা। ইছায় কইলা, “ও বেটা, আমি কইরাম, তুমি উঠো।”

১৫ তেউ হি মুর্দা বেটা উঠিয়া বইগেল, বইয়া মাত-কথা মাতিলো। ইছায় তারে তার মার আতো সমজাই দিলা। ১৬ ইতা দেখিয়া হকলর ভিতরে ডর হমাইগেল। তারা কইলা, “ছুবহানালা, একজন মহান নবীয়ে আমরার মাজে তশরিফ আনছইন, আল্লায় মেহেরবানি করিয়া তান বন্দা অকলর বায় চউখ ফিরাইছইন।”

১৭ ইছার অউ কেলামতির কথা আস্তা এহুদিয়া জিলাত আর আশ-পাশ হকল জাগাত মশুর আইগেল।

হজরত ইছার দরবারো এহিয়া নবীর সাগরিদ

১৮ এহিয়া নবীর সাগরিদ অকল গিয়া অউ হকলতা এহিয়ারে জানাইলা। ১৯ অউ এহিয়ায় তান দুইজন সাগরিদরে ইছার গেছে পাঠাইলা। তারা আইয়া ইছারে কইতা, “হুজুরে কইছইন আমরা জানিয়া যাইতাম, যেইন তশরিফ আনার কথা, আপনেউ হেইন নি? না আমরা আর কেউরর লাগি বার চাইতাম?” ২০ তেউ দুইও সাগরিদ আইয়া ইছারে কইলা, “এহিয়া নবীয়ে আমরা পাঠাইছইন, আপনারে জিকাইতাম, যেইন তশরিফ আনার কথা, আপনেউ হেইন নি? না আমরা আর কেউরর লাগি বার চাইতাম?”

২১ ঠিক অউ সময় ইছায় বউত মানষরে বেমার-আজার আর জিন-ভুতর আছর থাকি ভালা করলা। বউত আন্দারেও দেখার খেমতা দিলা। ২২ অতা করিয়া হারলে এহিয়ার দুইও সাগরিদরে ইছায় কইলা, “তুমরা

যাওগি, তুমরা অনো আইয়া নিজর চউখে যেতা দেখলায় আর হুনলায়, অতা গিয়া এহিয়ারে জানাও। তানরে কইও, আন্দায়ও চউখে দেখরা, লেংড়া অকলে আটিরা, পচা-কুষ্ঠ বেমারি ভালা অইরা, খালুয়ায়ও হুনরা, মুর্দা মানুষ জিন্দা অইরা, আর গরিব অকলর গেছেও আল্লাই খুশ-খবরি তবলিগ করা অর। ﴿২৩﴾ আর এরাউ কপালি মানুষ, আমার বেয়াপারে যেরার দিলো কুনু বাধা না পায়।”

﴿২৪﴾ এহিয়ার সাগরিদ অকল গিয়া হারলে, এহিয়ার বেয়াপারে ইছায় মানষরে কইলা, “তুমরা মরুভূমিত কিতা দেখাত গেছলায়? বাতাসে লড়ে-ছড়ে অতা খাগড়া-বন দেখাত গেছলায় নি? ﴿২৫﴾ না, কিতা দেখাত গেছলায়? সুন্দর কাপড় ফিন্নো কুনু মানষরে নি? যেরা দামি দামি কাপড় ফিন্দিয়া জাক-জমক করে, আর সুখিতা দিন কাটায়, তারা তো রাজ বাড়িত থাকইন। ﴿২৬﴾ তে তুমরা কিতা দেখাত গেছলায়? কুনু নবীরে দেখাত গেছলায় নি? অয়, হাছাউ আমি তুমরারে কইরাম, ই এহিয়া তো খালি নবী নায়, নবী থাকিও বড় জন। ﴿২৭﴾ এইন তো হউ জন, যেন কথা আছমানি কিতাবো লেখা আছে,

হুনো, তুমার আগে বেজিয়ার আমি
আমার পেগাম্বর,
এইন গিয়া ঠিক-ঠাক করবা
তুমার চলার পথ।

﴿২৮﴾ তে আমি তুমরারে কইরাম, আস্তা দুনিয়ার কুনু আদমউ এহিয়া থাকি বড় নায়। অইলে আল্লার বাদশাইর হকল থাকি হুরু জনও, এহিয়া থাকি মহান।”

﴿২৯﴾ সমাজর হকল ধরনর আম-মানষে আর ঘুশখুর খাজনা তুলরা অকলেও এহিয়ার তবলিগ হুনলা, তারা তৌবার গোছল করিয়া আল্লা পাকরে হক-ইনছাফ কারি হিসাবে মানলা। ﴿৩০﴾ অইলে ফরিশি দলর মানষে আর মৌলানা অকলে এহিয়ার গেছে তৌবার গোছল না করিয়া, তারার বেয়াপারে আল্লা পাকর যে খিয়াল আছিল, ইটারে কুনু দাম দিলো না।

﴿৩১﴾ তেউ ইছায় হিরবার কইলা, “কওছাইন, অখন ই জমানার মানষরে আমি কিতার লগে তুলনা করতাম? তারা কার লাখান? ﴿৩২﴾ তারা তো অমন হুরুতার লাখান, যেতায় বাজারো বইয়া একে-অইন্যরে ডাকিয়া কয়,

বাশি তো বাজাইলাম দুস্ত তুমরার লাগিয়া,
তুমরা কেউ নাচিলায় না বাশি হুনিয়া।
মাতুমর জারি-গান গাইলাম আমরা সবে,
কান্দিলায় না তুমরা কেউ মাতুমর সুরে।

তে এহিয়া নবী আইয়া হারি ভাত-রুটি আর আংগুরর শরবত না খাওয়ায়, তুমরা কইলায় তানরে ভুতে ধরিলিছে। আর বিন-আদম আইয়া খানা-পিনা কররা দেখিয়া তুমরা কইরায়, দেখরায়নি, ই বেটা তো পেটুয়া আর মদখুর। হে ঘুষখুর খাজনা তুলরা আর নাফরমান মানষর লগে দুস্তি করে। তা-ও আখল খাটাইয়া যেরা চলে, তারার চাল-চলন থাকিউ পরমান মিলে, আখলউ অইলো খাটি-নিখুত চিজ।”

খবিছ বেটির গুনা মাফ

ফরিশি দলর একজন মানষে ইছারে তান বাড়িত খানির দাওত দিলা, ইছা অউ বাড়িত গিয়া খানিত বইলা। অইলে অউ গাউত এক খবিছ বেটি আছিল। ইছা অনো দাওতো আইছইন হুনিয়া হউ খবিছ বেটিয়ে দামি এক পাথরর বৈয়ামো করি আতর লইয়া অনো আইলো। আইয়া ইছার পিছন গালাবায় তান পাওর কান্দাত উবাইয়া, কান্দিয়া চউখর পানিদি তান পাওর পাতা ভিজাইলিলো। বাদে তাইর মাথার চুলদি পাও ফুছিয়া দিলো পাওর মাজে হুংগা দিতে দিতে আতর মাখাইলো।

ইতা দেখিয়া ইছারে যেইন দাওত দিছলা, এইন মনে মনে কইলা, “ই বেটা কুনু নবী অইলে তো এমনেউ বুজলোঅনে ই বেটি খেগু, ইগু কতবড় খবিছ গুনাগার বেটি।” ইছায় তারে কইলা, “সাইমন, তুমার লগে আমার কিছু কথা আছে।” সাইমনে কইলা, “কউক্লা হুজুর।”

ইছায় তানরে কইলা, “মনে করো, এক মাজনর গেছ থাকি দুইজন মানষে কিছু টেকা করজ নিছিল, একজনে পাচশো, আরক জনে পঞ্চগশ দিনার। তারার কেউররউ তাক্কত আছিল না ই টেকা ফিরত দেওয়া, তেউ মাজনে এরা দুইও জনরে মাফ করি দিলাইলা। অখন কওছাইন, এরা কুন জনে মাজনরে বেশি ভাল পাইবো?” সাইমনে কইলা, “আমার মনে কয়, যার বেশি টেকা মাফ দেওয়া অইছে।” ইছায় কইলা, “তুমি ঠিকউ কইছো।”

৪৪ তেউ ইছায় অউ বেটির বায় চাইয়া কইলা, “সাইমন, অউ বেটিগুর বায় খিয়াল করো আর হুনো, আমি তুমার ঘরো আইয়া হারলে তুমি তো আমারে পাও ধোয়ারও পানি দিছো না, অইলে তাইর চউখর পানিদি আমার পাও ভিজাইয়া, মাথার চুলদি ফুছিয়া দিছে। ৪৫ তুমি তো আমার লগে আইঞ্জা করি ধরিয়া হুংগা দিছো না, অইলে দেখরায়নি আমি তুমার বাড়িত হামানির বাদ অনেউ তাই আমার পাওত হুংগা দেওয়াতউ আছে।

৪৬ তুমি কুনুজাত তাজিম করি আমারে আগুয়াই আনছো নি? অইলে তাই আমার পাওত আতর ঢালিয়া তাজিম করছে। ৪৭ তে আমি তুমারে কইরাম, তাই বেশি মায়া করছে করি বুজা যার, তাই বড় গুনাগার অইলেও গুনার মাফি পাইছে। যার থুড়া গুনা মাফ করা অয়, হে থুড়া মায়া করে।”

৪৮ বাদে ইছায় বেটিরে কইলা, “ওগো, তুমার তামাম গুনা মাফ করা অইছে।” ৪৯ যারা ইছার লগে খানিত বইছলা তারা মনে মনে কইলা, “এইন কে, যেইন গুনাও মাফ করিলাইন?”

৫০ ইছায় হি বেটিরে কইলা, “ও বেটি, তুমার ইমানর বলেউ তুমি নাজাত পাইলায়, অখন শান্তি অইয়া বাড়িত যাও।”

হজরত ইছার খেজমতো বেটি মানুষ

৮ বাদে ইছায় অউ বারোজন সাহাবিরে লইয়া গাউয়ে গাউয়ে, টাউনে টাউনে, ঘুরিয়া আল্লার বাদশাইর তবলিগ করাত রইলা। ১ তারার লগে কয়জন বেটিনও আছিল। অউ বেটিন জিনর আছর আর বউত জাতর বেমার থাকি ভালা অইয়া তান লগ ধরছলা, এরার নাম অইলো, মগদিলিনী মরিয়ম, এন গেছ থাকি সাতগু জিন ছাড়াইল অইছিল, ২ রাজা হেরোদর উজির কুজাইর বউ সোহানা, সুসানা আর আরো বউত বেটিন আছিল। অউ বেটিস্তে তারার নিজর ছামানা দিয়া ইছা আর তান সাগরিদ অকলর খরচ-পাতি চলাইতা।

গিরন্তি কামর লগে ইমানর তুলনা

৩ বাদে যেবলা নানান জাগা থাকি বউত মানুষ আইয়া ইছার গেছে দলা অইলা, অউ সময় তাইন এক কিচ্ছা হুনাইলা। ৪ তাইন কইলা, “এক

গিরন্তে ধানর জালা বাইন দেওয়াত গেল। গিয়া বাইন দেওয়ার বাল্য কিছু জালা আইলর মাজে পড়িগেল, মানষে পাওদি উড়িয়া ই জালা নষ্ট করিল্লো, আর পাখিস্তেও আইয়া খাইলিলো। ৬ গিরন্তর কিছু জালা হুকনা-শক্ত মাটির উপরে পড়লো, ইতায় আলি অইলেও হেশে রস না পাইয়া হুকাইয়া মরিগেল। ৭ কিছু জালা বন-জংলার মাজে পড়লো, ই জালায় আলি ফুটলেও ইতারে বন-জংলায় জাতিয়া ধরলো। ৮ অইলে কিছু জালা ভালা জমিনো পড়লো, ই জালায় ভালা ধান অইলো, আর একশো গুন বেশি ধান ধরলো।”

অউ কিছা কইয়াউ তাইন জুরে জুরে কইলা, “যার কান আছে, হে হুনউক।”

৯ সাগরিদ অকলে আরজ করলা, “হুজুর, ই কিছার মানি কিতা?”

১০ তাইন কইলা, “আল্লার বাদশাইর গোপন রহইস্য জানার সুযোগ খালি তুমরারে দেওয়া অইছে, অইলে বাকি মানষর গেছে তো ইতা কিছার লাখান কইরাম, যাতে তারা দেখিয়াও না দেখে, হুনিয়াও না বুজে।

১১ “তে ই কিছার মানি অইলো, ই ধানর জালা অইলো আল্লার কালাম।

১২ আইলর মাজে পড়া জালাদি বুজাইল অইছে, যেরা আল্লার কালাম হুনে, বাদে ইবলিছে আইয়া তারার দিল থাকি ইতা কাড়িয়া নেয়গি। ইবলিছে চায় না মানষে ইমান আনিয়া নাজাত হাছিল করউক। ১৩ আর হুকনা-শক্ত মাটির উপরে পড়া জালাদি বুজাইল অইছে, যারা ই কালাম বেশ খুশি আইয়া হুনে, অইলে কালামে তারার দিলো ভালামন্তে জড় করে না। এরদায় ই ইমান থুড়া কয়দিন টিকে, কনু পরিষ্কাত পড়লেউ তারার ইমান খুয়াইলায়।

১৪ বন-জংলাত পড়া জালাদি বুজাইল অইছে, যেরা ইমানর দাওত হুনে, অইলে দুনিয়াবি ধান্দাত পড়িয়া ধন-ছামানার লালছ, আর আরাম-আইশর বায় চাইয়া ইতা ফাউরিলায়। এরদায় তারার জিন্দেগিত কনু ভালা ফল ধরে না। ১৫ ভালা জমিনো পড়া জালাদি বুজাইল অইছে, যেরা হক আর ছহি দিলে আল্লার কালাম হুনে, হুনিয়া নিজর দিলো ভালামন্তে গাথিয়া রাখে, আর ইমানে মজবুত রইয়া জিন্দেগিত ভালা ফল ধরে।

১৬ “কনু মানষে লেম জালাইয়া হারি চকির তলে থয়নি বা টুকরিদি গুরিলায় নি? নিচয় না, তারা গাছার উপরে থয়, যাতে ঘরর ভিতরে ফর দেখা যায়। ১৭ তে ইলা গাইবি কুস্তাউ নাই যেতা জাহির অইতো নায়। ইলা লুকাইলও কুস্তা নাই যেতা কেউ হুনতো নায় বা জানতো নায়। ১৮ এরদায়

তুমরা কিলা হুনরায় খিয়াল করিও, যার আছে তারে আরো দেওয়া অইবো, আর যার নাই, তার যেতা আছে বলিয়া হে মনে করের, অতাও নেওয়া অইযিবো।”

হজরত ইছার মা ভাই কে

ঐ এরমাজে ইছার মা আর ভাইয়াইন তান গেছে আইয়া আজিলা, অইলে ভিড়র লাগি তারা কাছাত আইতা পারলা না। ঐ তেউ একজন মানষে আইয়া ইছারে কইলা, “আপনার মা আর ভাইয়াইন আপনার লগে দেখা করাত আইয়া বারে উবাই রইছইন।” ঐ ইছায় জুয়াপ দিলা, “আমার মা-ভাই তো এরাউ, যেরা আল্লার কালাম হুনইন আর আমল করইন।”

হজরত ইছায় আওরর তুফান বন্দ করলা

ঐ একদিন ইছা আর তান সাহাবি অকল গিয়া নাওয়ো উঠলা, উঠিয়া তাইন সাহাবি অকলরে কইলা, “আও, আমরা আওরর হপারো যাই।” তেউ সাহাবি অকলে নাও ভাসাইলা। ঐ নাও চলতির মাজে ইছা ঘুমাই গেলা। আখতাউ আওরর মাজে অমন তুফান আইলো, তুফানে নাওত পানি হামাইয়া ভরিয়ার, তারা দেখলা বড় মছিবত আইছে। ঐ সাহাবি অকল ইছার ধারো গিয়া তানে হজাগ করিয়া কইলা, “হুজুর, হুজুর, আমরা নু মরিযিরাম।” ইছা উঠিয়া পানির ঢেউ আর বাতাসরে ধামকি দিলা। লগে লগেউ ঢেউ আর তুফান থামিয়া হকলতা থির অইগেল। ঐ ইছায় তারারে কইলা, “অউ অতানি তুমরার ইমান?” তারা ডরাইয়া তাইজ্জুব অইয়া একে-অইন্যরে কইলা, “এইন আসলে কে, দেখরায়নি বাতাসে আর পানিয়েও তান হুকুম মানে?”

জিনে ধরা বেমারিরে ভালা করা

ঐ ইছায় তান সাহাবি অকল লইয়া গালিল আওর পারইয়া জেরাসিনি এলাকাত গেলা। ঐ গিয়া হারি তাইন নাও থাকি লামলা, অউ সময় হউ গাউর জিনর আছর আলা এক বেটা তান গেছে আইলো। জিনর পালে

আছর করায় হে বউত দিন ধরি লেমটা আর কুনু বাড়ি-ঘরো রইতো না, খালি কবরস্থানো রইতো। ২৮ ইছারে দেখিয়াউ হে চিল্লাইয়া উঠলো, তান ছামনে পড়িয়া জুরে জুরে কইলো, “ও আল্লার খাছ মায়ার জন, আপনে কেনে আমার ইনো তশরিফ আনলা? মেহেরবানি করি আমারে ছাতাইন না যানু।”

২৯ ইখান কওয়ার কারণ অইলো, ইছায় হি জিনরে হুকুম দিছলা অউ বেটারে ছাড়িয়া যাওয়ার লাগি। ই জিনে তারে বউত দিন থাকি আছর করছিল, বেটারে ডাঙা-বেড়ি আর শিকলদি বান্দিয়া রাখলেও, হে ইতা ছিড়িলিতো, হউ জিনে তারে নিরাই জাগাত নিতোগি। ৩০ ইছায় তারে জিকাইলা, “তোর নাম কিতা?” হে কইলো, “ফৌজ পাল” কারণ তারা বউত জিন একলগে আছিল। ৩১ তেউ হি ফৌজ পালে ইছারে মিনত কাজ্জি করিয়া কইলা, তাইন যানু তারারে রসাতলে না গাড়াইন।

৩২ হিনো পাড়র এক গালাত বড় এক শূয়রর পাল আছিল। ফৌজ পালে তানরে মিনত করিয়া কইলা, তারারে হউ শূয়রর ভিতরে হামানির ইজাজত দিতা। তাইন ইজাজত দিলা। ৩৩ অউ তারা হি বেটারে ছাড়িয়া শূয়রর ভিতরে গিয়া হামাইলো, এতে শূয়রর পাল পাড়র ঢালেদি দৌড়িয়া গিয়া আওরর পানিত বুড়িয়া মরলা।

৩৪ ইতা দেখিয়া শূয়রর রাখাল অকল দৌড়িয়া গিয়া টাউনো আর গাউয়ে গাউয়ে খবর দিলো। ৩৫ খবর পাইয়া চাইরোবায় থনে মানুষ আইলা, আইয়া দেখলা, যে বেটার লগ থাকি ফৌজ পাল বারইয়া গেছইন, হে পুরাপুর ভালা অইয়া কাপড়-চুপড় ফিন্দিয়া ইছার পাওর কান্দাত বইরইছে। দেখিয়া তারা চমকি গেলা। ৩৬ আর অউ ঘটনা ঘটিতে যেরা দেখছিল, তারা হকল মানষরে হুনাইলা, ই বেটা কিলা ভালা অইছে। ৩৭ হুনিয়া জেরাসিনি এলাকার হকল মানুষ ডরাইগেলা। ডরর চুটে তারা ইছারে মিনত কাজ্জি করিয়া কইলা, তাইন তারার গেছ থাকি তশরিফ নিতাগি। তেউ ইছা নাওয়ো উঠিয়া হিরবার গালিলো আইলা। ৩৮ অইলে যে বেটারে জিনে ধরছিল, হে আরজ করলো তান লগে রইবার লাগি। ইছায় তারে অখান কইয়া বাড়িত পাঠাই দিলা, ৩৯ কইলা, “তুমি তুমার বাড়িত যাও, আর আল্লায় তুমার লাগি যে কুদরতি কাম করছইন, অতা গিয়া কও।” তেউ হে গেলগি, গিয়া টাউনর হকল মানষরে জানাইলো, ইছায় তার লাগি অতো বড় কাম করছইন।

এক মরা পুড়ি আর বেমারি বেটি

৪০ ইছা গালিলো আইয়া হারলে হিনর মানষে খুশি অইয়া তানরে কবুল করলা, তারা তান লাগি বার চাওয়াত আছিল। ৪১ অউ সময় যায়ীর নামে মছিদ কমিটির এক মতল্লী আইয়া ইছার পাওয়ো পড়িয়া মিনত লাগাইলা, হুজুরে তান বাড়িত নিবার লাগি। ৪২ কারন তান একমাত্র পুড়ি ছরখাতো আছিল, পুড়ির বয়স বারো বছর। ইছা যেবলা অউ বাড়িত যাইবার লাগি রওয়ানা দিলা, মানষে আইয়া তান চাইরোবায় ভিড় করিয়া ঠেলাঠেলি লাগাইলা।

৪৩ ভিড়র মাজে এক বেটি মানুষও আছলা, এইন বারো বছর ধরিয়া মাসিক বেমারি। তান হকল ধন-ছামানা ডাক্তরর তলে খুয়াইয়াও ভালা অইতা পারছইন না। ৪৪ তাইন ইছার খরেদি আইয়া ইছার চাদ্দরর কুনাত ছওয়ার লগে লগেউ তান বেমার কমিগেল। ৪৫ তেউ ইছায় জিকাইলা, “আমারে কে ছইলো?” কেউ স্বীকার না করায় পিতর আর তান লগর মানষে ইছারে কইলা, “হুজুর, আপনার চাইরোবায় কত মানষে ঠেলাঠেলি করিয়া আপনার গা’ত লাগের।” ৪৬ অইলে ইছায় কইলা, “কেউ আমারে ছইছে, কারন আমি বুজরাম, আমার ভিতর থাকি গাইবি বল বারইছে।” ৪৭ অউ বেটিয়ে যেবলা দেখলো ধরা পড়িগেছে, তাই কাপি কাপি ইছার ছামনে আইয়া তান পাওয়ো পড়িয়া হকলর ছামনেউ কইলো, কেনে তাই ইছারে ছইছিল আর কিলান লগে লগেউ ভালা অইগেছে। ৪৮ ইছায় বেটিরে কইলা, “মাই গো, তুমি একিন করছো করি ভালা অইছো। অখন শান্তিয়ে বাড়িত যাও।”

৪৯ ইছায় অতা মাতিরা, অমন সময় মছিদর মতল্লীর বাড়ি থাকি খবরিয়া আইয়া তানরে কইলো, “ছাব, আপনার পুড়ি দুনিয়া থাকি গেছইনগি, তে হুজুরে আর কষ্ট দিবার কাম নাই।” ৫০ ইখান হুনিয়া ইছায় কইলা, “ডরাইও না, খালি একিন করো। দেখবায়নে, তাই ভালা অইষিবো।” ৫১ ইছা হউ বাড়িত গেলা, গিয়া পিতর, হান্নান, ইয়াকুব আর পুড়ির মা-বাবাফ ছাড়া অইন্য কেউররে ঘরর ভিতরে হামাইতে দিলা না। ৫২ হকলে যেবলা পুড়ির লাগি কান্দা-কাটি আর আহাজারি কররা, অউ সময় ইছায় কইলা, “কান্দিও নারে, তাই তো মরছে না, ঘুমার।” ৫৩ ইখান হুনিয়া তারা

তানরে ছিড়াইলা। তারা হকলেউ জানতো পুড়ি মরি গেছে। ৫৪ তেউ ইছায় পুড়ির আতো ধরিয়া ডাক দিলা, “মাই গো, উঠো।” ৫৫ লগে লগেউ পুড়ির জান ফিরত আইলো। তাই উঠিয়া বইগেল। ইছায় কইলা, পুড়িরে কুন্তা খাইবার দিতা। ৫৬ পুড়ির মা-বাফ এক্কেরে তাইজ্জুব বনিগেলা। বাদে ইছায় কইলা, “হুনো, ইতা কেউররে হুনাইও না।”

বারোজন সাহাবিরে তবলিগো পাঠাইলা

৯ বাদে ইছায় হউ বারোজন সাহাবিরে এখানো দলা করলা, তারারে হকল জাতর জিন-ভুত ছাড়া নি, বেমারিরে ভালা করার ইজাজত আর খেমতা দিলা। ১ বাদে তাইন আল্লার বাদশাইর তবলিগ আর বেমারিস্তরে শিফা করাত এরােরে পাঠাইলা। ২ তাইন কইলা, “তুমরা পথর লাগি লাঠি, গাইট-বুছকি, খানি-খুরাকি, টেকা-পয়সা, বা দুইটা কোর্তাও লগে নিও না। ৩ কনু গাউত গেলে তুমরা যে বাড়িত হামাইবায়, অউ বাড়িতউ রইও, আর অন থাকি হিরবার বিদায় অইও। ৪ মানষে যুদি তুমরারে জাগা না দেইন, তে হন থাকি বারইবার আগে তুমরার পাওর ধুইল ফুছিয়া ফালাইও, অউ ধুইলেউ তারার বিপক্ষে সাক্ষি দিব।” ৫ সাহাবি অকল রওয়ানা অইয়া গাউয়ে গাউয়ে গিয়া, আল্লার খুশ-খবরি তবলিগ আর বেমারিস্তরে শিফা করাত লাগলা।

৬ রাজা হেরোদে ইছার অউ কাম-কাজর খবর হুনিয়া খুব ঘাবড়ি গেলা। কনু কনু মানষে তানরে কইলা, এহিয়া নবী হিরবার জিন্দা অইয়া উঠি গেছইন। ৭ আর কনু কনু জনে কইলা, ইলিয়াছ নবীয়ে দরশন দিছইন। হিরবার কেউ কেউ কইলো, পুরানা জমানার কনু নবী জিন্দা অইয়া আইছইন। ৮ তেউ হেরোদে কইলা, “আমি নিজেউ তো এহিয়ার মাথা কাটাইছি, তে অউ যেতা হুনরাম, এইন আসলে কে?” এরদায় হেরোদে ইছারে দেখার খিয়াল অইলো।

পাচ আজার মানষর গাইবি খানি

৯ ইছায় যে বারোজন সাহাবিরে তবলিগো পাঠাইছলা, তারা ফিরিয়া আইলা। আইয়া তানরে জানাইলা, তবলিগি সফরো কিতা কিতা করছইন, অউ তাইন এরােরে লইয়া খুব নিরিবিলি হালতে বায়ত-ছয়দা নামর এক গাউত গেলা। ১০ অইলে মানষে ই খবর হুনিয়া দলে-দলে ইছার খরে-

অইয়া রওয়ানা দিলাইলা। তাইন এরায়ে খুশি মনে কবুল করলা। তারার গেছে আল্লার বাদশাইর বয়ানি তবলিগ করলা, আর যেতা বেমারির বেমার শিফা অওয়া জরুর আছিল, তাইন এরায়ে শিফা করলা।

১২ হইঞ্জা বালা হউ বারো জন সাহাবি আইয়া ইছারে কইলা, “হুজুর, আমরা যে জাগাত আছি, ইখান খুব নিরিবিলি জাগা। তে অতা মানষরে বিদায় দিলাউক্কা, তারা ধারো-কাছর গাউত গিয়া রাইতকুর থাকা-খাওয়ার বেবস্তা করউক।” ১৩ ইছায় জুয়াপ দিলা, “তুমরা তারারে খানা খাওয়াও।” তারা কইলা, “আমরার গেছে তো খালি পাচখান রুটি, দুইটা বিরান মাছ আছে, আর কুস্তা নাই। তে আমরা বাজারো গিয়া এরার লাগি খানা লইয়া আনতাম নি?” ১৪ ইছায় কইলা, “এরায়ে পঞ্চাশ-জন, পঞ্চাশ-জন করি বওয়াই দেও।” ইনো খালি বেটা মানুষউ আছলা পাচ আজারর লাখান। ১৫ তেউ সাহাবি অকলে তারারে বওয়াইলা। ১৬ ইছায় অউ পাচখান রুটি আর দুইও মাছ লইয়া আছমানর বায় চাইয়া আল্লার শুরিয়া আদায় করলা। বাদে রুটি আর মাছ টুকরা-টুকরা করি ভাংগিয়া, সাহাবি অকলর আতো দিয়া কইলা বাটিয়া দিলাইতা। ১৭ অউ খানায় হকল মানষে পেট ভরিয়া খাইলা। খাইয়া হারলে যেতা গুড়া-গাড়া রইছিল অতা দলা করলে বারো টুকরি ভরিগেল।

হজরত ইছার মউতর আগাম খবর

১৮ একদিন ইছা এক নিরাই জাগাত দোয়া করাত বইলা, খালি সাহাবি অকল তান লগে আছলা। তাইন এরায়ে জিকাইলা, “কওছাইন, মানষে কিতা মনো করইন, আমি কে?” ১৯ তারা জুয়াপ দিলা, “কুন্ কুন্ মানষে কইন, আপনে এহিয়া নবী। কুন্ জনে কইন ইলিয়াছ নবী, আর কেউ কেউ কয় বউত আগর জমানার কুন্ নবী হিরবার জিন্দা অইয়া উঠিছইন।” ২০ ইছায় এরায়ে জিকাইলা, “অইলে তুমরা কিতা মনো করো, আমি কে?” সাহাবি পিতরে কইলা, “আপনেউ আল্লার ওয়াদা করা হউ আল-মসী।” ২১ ইছায় তারারে কইলা, “খবরদার! ইতা আর কেউররে হুন্ আইও না।”

২২ বাদে তাইন কইলা, “আমি বিন-আদমে বউত কষ্ট সহ্য করা লাগবো। সমাজর মুরবি অকলে, বড় ইমাম, আর মৌলানা অকলে আমারে এলা করবা। আমারে কাতল করা অইবো, অইলে মউতর তিন দিনর দিন আমার হিরবার জিন্দা অইয়া উঠা জরুর।”

তাইন এরা হকলরে কইলা, “আমার তরিকায় কেউ জিন্দেগি কাটাইতে চাইলে, হে তার নিজর খুশিয়ে চলা বাদ দেউক। তার আপন দুখ-কষ্টর সলিব পরতেক দিন বইয়া লইয়া আমার খরে খরে আউক। যে মানষে নিজর জান বাচাইতো চায়, হে তার হাছারর জিন্দেগি খুয়াইবো। অইলে যে জনে আমার লাগি নিজর জান কুরবানি দেয়, হে হাছারর জিন্দেগি পাইবো। কুনু মানুশ যদি আস্তা দুনিয়ার মালিক বনিয়াও তার হাছারর জিন্দেগি মানি আখের খুয়াইলায়, তে তার কুনু ফায়দা অইলো নি? হুনউক্কা, কেউ যদি আমার লাগি বা আমার তালিমর লাগিয়া মুখ লুকায়, তে আমি বিন-আদম য়েবলা আমার নিজর, পবিত্র ফিরিস্তা অকলর আর গাইবি বাফর শান-তজল্লিয়ে দুনিয়াত হিরবার আইমু, অউ সময় আমিও এরাে দেখলে মুখ লুকাইমু। আমি তুমরাে হাছা কথা কইরাম, অউ মজলিছো অউলা কয়জন মানুশ আজির আছইন, আল্লার বাদশাই না দেখিয়া এরাে মউত অইতো নায়।”

হজরত ইছার নুরানি ছুরত

অউ তালিমর একদ হাণ্ডা বাদে, ইছা দোয়া করার লাগি তান সাহাবি পিতর, হান্নান, আর ইয়াকুবরে লইয়া এক টিল্লার উপরে উঠলা। তাইন দোয়া করার অমন সময় আখতাউ তান মুখর রংগ বদলিগেল, তান ফিল্লর কাপড়-চুপড় ধলা চক-চকা অইগেল। অউ সময় দেখা গেল, দুইজন মানষে আইয়া তান লগে বাতচিত কররা, এরাে একজন অইলা মুছা নবী, দুহরা জন ইলিয়াছ নবী। তারা আল্লাই জালাল আর শানে দেখা দিলা। জেরুজালেম সফরর কালো ইছা যেন আল্লার মর্জি মাফিক মউতর মুখা-মুখি অইরা, অউ বেয়াপারেউ তারা বাতচিত করলা।

সাহাবি পিতর আর তান লগর অকল বেমালামু ঘুমো আছলা। আখতাউ ঘুম ভাংগি যাওয়ায় তারা ইছার জালাল-শান দেখলা, আর তান কান্দাত উবা অউ দুইও জনরেও দেখলা। হউ দুইওজন য়েবলা ইছার গেছ থাকি রওয়ানা দিলাইরা, অউ সময় পিতরে কইলা, “হুজুর, আমরাও তো অনো আছি, খুব ভালা অইছে, তে এককাম করিলাই, আমরা অনো তিনখান ডেরা বানাইলাই, এখন আপনার, এখন ইলিয়াছ নবী, আর এখন মুছা নবীর লাগি।” পিতরে যেন কিতা কইরা, ইতা তাইন নিজেউ বুজলা না।

পিতরে অতা মাতিরা, অউ সময় আখতাউ মেঘর কালনি আইয়া তারারে গুরিলিলো। তারা কালনির আওড়ে হামানির বাদে সাহাবি অকল ডরাই গেলা। আর কালনির ভিতর থাকি অউ আওয়াজ আইলো, “এইনউ আমার খাছ মায়ার জন, তুমরা এন কথা মানো।”

ই আওয়াজর বাদেউ দেখা গেল, ইছা হনো একলা উবাই রইছইন। সাহাবি অকল নিরাই অইগেলা, তারা যেতা দেখছিলো অউ সময় ইতা আর কেউররে হুনাইলা না।

জিনর আছর আলা পুয়া

বাদর দিন ইছা আর সাহাবি অকল পাড়র টিল্লা থাকি লামিয়া আইলে, বউত মানুষ তান লগে দেখা করাত আইয়া ভিড় বান্দিলা। অউ ভিড়র মাজর একজনে চিল্লাইয়া কইলো, “হুজুর, আমার পুয়াগুর বায় খিয়াল করউক্কা, অগু আমার একমাত্র আওলাদ।” তারে একটা জিনে ধরে, ইগিয়ে তারে ছাড়তো চায় না, হে আখতাউ চিক দিয়া উঠে আর মাটিত পড়িয়া ছাটিয়ায়। তার মুখেদি ফেনা বারয়, হেশে তারে আছাড়িয়া আধ-মরা করি ফালাই থইয়া যায়। আমি আপনার সাহাবি অকলর গেছে মিনত-কাজ্জি করছলাম অগুতারে খেদাইবার লাগি, অইলে তারা পারছইন না।”

ইছায় কইলা, “ও বেইমান আর নাফরমানর জাত, আমি আর কতদিন তুমরার লগে রইমু, তুমরার ছাতানি সহিয়া করমু? দেখিছইন, তুমার পুয়ারে অনো আনো।” বেটায় পুয়ারে লইয়া আগুয়ার, অউ সময় জিন্নাতে তারে মাটিত ফালাইয়া জাতিয়া ধরলো, হে হুতিয়া ছাটিয়ানি লাগাইলো। তেউ ইছায় জিন্নাতরে ধামকি দিলা, তাইন অউ পুয়ারে ভালা করিয়া তার বাফর আতো সমজাই দিলা। আল্লার কুদরতি লিলা-খেলা দেখিয়া হকল মানুষ তাইজ্জুব অইগেলা।

দুছরা বার তান মউতর আগাম খবর

ইছার কেরামতি কাম-কাজ দেখিয়া হকলে তাইজ্জুব বনিয়া চিন্তা কররা, অউ সময় তাইন সাহাবি অকলরে কইলা, “আমার কথা খানাইন তুমরা মন

দিয়া হুনো, আমি বিন-আদমরে তো মানষর আতো ধরাই দেওয়া অইবো।”

৪৫ সাহাবি অকলে ই মাতর কুনু মানি বুজলা না। আল্লায় তারার গেছে ইখান গাইব রাখলা, যাতে তারা না বুজইন। আর অউ বেয়াপারে ইছারেও কুন্তা জিকাইতে তারার সাওস অইলো না।

বড় কে?

৪৬ সাহাবি অকলর মাজে কে হকল থাকি বড়, অতা লইয়া তারা তর্কা-তর্কি কররা, ৪৭ এরমাজে ইছায় তারার দিলর ভাব বুজিলিলা। তাইন এক নাবালিক হুরুতরে কান্দাত আনিয়া কইলা, ৪৮ “যে জনে আমার লাগি অউ হুরুতার লাখান কুনু ছাবালরে কবুল করে, হে আমারেউ কবুল করে। আর আমারে যে কবুল করে, হে খালি আমারে নায়, আমারে যেইন বেজিছইন তানরেও কবুল করলো। তুমরার মাজে যে জন হকল থাকি হুরু, হে-উ হকল থাকি বড়।”

৪৯ বাদে সাহাবি হান্নানে কইলা, “হুজুর, আমরা দেখলাম আপনার নাম লইয়া একজনে ভুত ছাড়ার। দেখিয়া আমরা তারে মানা করছি, হে তো আমারর তরিকার নায়।” ৫০ ইছায় তানরে কইলা, “আর মানা করিও না, যে তুমরার বিপক্ষে নায়, হে তো পক্ষেউ আছে।”

জেরুজালেম যাওয়ার পথে হজরত ইছা

(৯:৫১-১৯:২৭)

হজরত ইছা জেরুজালেমর বায় রওয়ানা

৫১ ইছায় বেহেস্তো তশরিফ নিবার দিন ঘনাইয়া আইলো, অউ তাইন জেরুজালেমো যাইতা করি নিয়ত করলা। ৫২ তান আগে অইয়া খবরিয়া অকল পাঠাইলা। তারা আগে গিয়া হকলতা জুইত-জাইত করার খিয়ালে শমরিয়া জাতির এক গাউত গিয়া হামাইলা। ৫৩ অইলে হি গাউর মানষে যেবলা হুনলা, ইছা জেরুজালেম যাইতা, হুনিয়া তারা তানরে আশ্রয় দিলো না। ৫৪ এরদায় তান সাহাবি ইয়াকুব আর হান্নানে কইলা, “হুজুর, ইলিয়াছ নবীর লাখান আমরাও অখন আরজ করতাম নি, আহমানি আগুইন লামিয়া

অতারে বিনাশ করিলাউক?” ৫৫ ইছায় তারার বায় ফিরিয়া ধামকি দিয়া কইলা, “তুমরা জানো না নি তুমরা কুন লাখান রুহর গড়া? আমারে কুন বেজা অইছেনি মানষর বিনাশ করতাম? আমারে তো বেজা অইছে মানষর জান বাচাইতাম।” ৫৬ অখান কইয়া এরা আরক গাউত গেলাগি।

৫৭ তারা যেবলা পথেদি যাইরা, অউ সময় এক বেটা আইয়া ইছারে কইলো, “ছাব, আপনে যেখানো যাইবা, আমিও আপনার লগে হনো যাইমু।”

৫৮ ইছায় তারে কইলা, “বাবারে, হিয়ালর গাত আছে, পাখিস্তর বাদা আছে, অইলে আমি বিন-আদমর মাথা গুজর কুনু ঠাই নাই।” ৫৯ বাদে ইছায় আরক জনরে দেখলা, দেখিয়া তারে কইলা, “ওবা, আমার লগে চলো।” হে জুয়াপ দিলো, “হুজুর, আমার বাফর মউতর বাদে তানরে মাটি দিয়া হারলে আমি আইমু।”

৬০ ইছায় তারে কইলা, “মরা অকলে তারার মরারে মাটি দেউক, তুমি আইয়া আল্লার বাদশাইর দাওত দেও।” ৬১ আরো একজনে কইলো, “হুজুর, আমি আপনার লগে যাইমু, তে আমার বাড়িত গিয়া বিদায় লইয়া আই।” ৬২ ইছায় তারে কইলা, “লাংলর খুটিত ধরিয়া যেগুয়ে খরেদি ফিরিয়া চায়, হে আল্লার বাদশাইর লাখ নায়।”

সত্তাইর জন সাগরিদরে তবলিগো পাঠাইলা

১০ বাদে হজরত ইছায় আরো সত্তাইরজন সাগরিদরে তবলিগো পাঠাইতা করি পছন্দ করলা। তাইন নিজে যেতা টাউন বা গাউয়াইন্তো যাওয়ার ইরাদা করছিলো, হনো যাইবার আগে এরায়ে দুইজন দুইজন করিয়া পাঠাইলা।

১১ পাঠানির বালা এরায়ে কইলা, “হুনো, জমিনো তো ফসল বউত আছে, অইলে কামলা খুব কম। এরলাগি জমিনর মালিকর গেছে দোয়া করো, তান ফসল তুলার লাগি তাইন কামলা পাঠাইবা।” ১২ তুমরা অখন রওয়ানা অইয়াও। খিয়াল রাখিও, বাঘর পালর মাজে মেড়া-বাইচার লাখান আমি তুমরারে পাঠাইলাম। ১৩ তুমরা যাওয়ার কালো টেকার থলি, গাইট-বুছকি, পাওর জুতা ইতা কুত্তাউ লগে নিওনা, আর পথর মাজে কেউররে ছালামও করিও না। ১৪ যে বাড়িত গিয়া হামাইবায়, হামাইয়াউ কইও, আছছালামু আলাইকুম। ১৫ ছালাম লওয়ার জুকা কেউ হিনো থাকলে, তুমরার ছালাম তার উপরে বর্তিবে, আর ইলা কেউ না

থাকলে, তুম্রার ছালাম তুম্রার গেছেউ ফিরত আইবো। ﴿৭﴾ পয়লা যে বাড়িত হামাইবায়, হউ বাড়িতউ রইও। ই বাড়ি ছাড়িয়া দুছরা বাড়িত যাইও না। তারা যেতা দেইন অতা খাইও, কারন কামলায় তার বেতন পাওয়ার য়েইগ্য।

﴿৮﴾ “যেবলা কুন্না গাউত যাইবায়, হিনর মানষে তুমরারে কবুল করিয়া, তারা যেতা খাইতে দেইন, অতাউ খাইও। ﴿৯﴾ তারার বেমারি অকলর বেমার ভালা করিও। তারারে কইও, আল্লার বাদশাই তো তুমরার ধারো আইছে। ﴿১০﴾ অইলে কুন্না গাউত গেলে হনর মানষে যুদি তুমরারে কবুল না করইন, তে গাউত আটি আটি অখান কইও, ﴿১১﴾ হবা, তুমরার গাউর যে ধুইল আমরার পাওত লাগছে, ইতা আমরা ফুছিয়া ফালাই দিরাম, অউ ধুইলেউ তুমরার বিপক্ষে সাক্ষি দিব। অইলে মনো রাখিও, আল্লার বাদশাই কান্দাত আইছে। ﴿১২﴾ আমি তুমরারে কইরাম, কিয়ামতর দিন লান্নতি ছাদুম টাউনর দশা থাকি, হি গাউর দশা আরো কঠিন অইবো।

﴿১৩﴾ “হায়রে বায়ত-ছয়দা আর খুরাছিন গাউ, তুমরা তো লান্নতি। তুমরার মাজে যেতা কুদরতি কাম দেখাইল অইছে, ইতা সোর আর সিদন এলাকাত দেখাইল অইলে, তারা কাতর অইয়া তৌবা করলোঅনে। ﴿১৪﴾ আসলে কিয়ামতর দিন সোর আর সিদন এলাকার দশা থাকিও, তুমরার দশা বউত কঠিন অইবো। ﴿১৫﴾ আর ও কফরনাহুম টাউন, তুমি বলে উচা অইয়া আছমানো গিয়া লাগতায়? না, পারতায় নায়! তুমারে পাতালো লামাইল অইবো।

﴿১৬﴾ “তুমরা মনো রাখিও, যেরা তুমরার কথা মানে, তারা আসলে আমার কথাউ মানে। আর যেরা তুমরারে মানে না, তারা আমারেও মানে না। যেরা আমারে মানে না, তারা আসলে হউ আল্লারেও মানে না, যেইন আমারে বেজিছইন।”

﴿১৭﴾ বাদে হি সওইরজন সাগরিদে তবলিগ করিয়া খুব খুশ মিজাজে ফিরত আইলা। আইয়া কইলা, “হুজুর, আপনার নাম হুনলে জিন-ভুতেও আমার কথা মানে।” ﴿১৮﴾ ইছায় তারারে কইলা, “হুনো, আমি দেখছি, ইবলিছ-শয়তান মেঘর জিলকির লাখান বেহেস্তু থাকি পড়িয়ার। ﴿১৯﴾ তে আমি তুমরারে হাফ-বিচ্ছুর উপরেদি আটার খেমতা দিছি, আর তুমরার দুশমন, ইবলিছর হকল শক্তির উপরে তুমরারে খেমতা দিছি। কুন্না জাত কুন্না য়েউ তুমরার খেতি করতো পারতো নায়। ﴿২০﴾ আর জিন-ভুতে তুমরার

কথা হুনের দেখিয়া খুশি না অইয়া, বরং বেহেস্তি খাতাত তুমরার নাম লেখা অইছে করিউ খুশি করো।”

২১ অউ সময় ইছাও পাক রুহর বলে খুশি অইয়া কইলা, “ও গাইবি বাবা, তুমিউ তো আছমান-জমিনর মালিক। আমি তুমার শুকরিয়া আদায় কররাম, কারন তুমি আখলদার-বুদ্ধিমান অকলর গেছে ইতা জাইর না করিয়া, বেবুজ-হুরুতার লাখান মানষর গেছে জাহির করছো। বাবা, আসলে তো ইতা হকলতাউ তুমার মর্জি। ২২ আমার গাইবি বাবায় হকলতাউ আমার আতো সপি দিছইন। বাফ ছাড়া দুছরা কেউ জানে না অউ পুত কে, আর পুত ছাড়া দুছরা কেউ জানে না অউ বাফ কে। পুতে বাফরে যার গেছে জাহির করার খিয়াল অয়, খালি হে-উ বাফর পরিচয় পায়।”

২৩ বাদে তাইন সাগরিদ অকলর বায় ফিরিয়া কানে-কানে কইলা, “তুমরা যেতা যেতা দেখছো, ইতা দেখার সুযোগ যার অয়, হে-উ নেক-কপালি। ২৪ আমি তুমরারে কইরাম, তুমরা যেতা দেখরায়, ইতা বউত নবীয়ে আর রাজা বাদশায় দেখার আশা করলেও, দেখার কপাল অইছে না। তুমরা যেতা হুনরায়, ইতা তারা হুনতে চাইলেও হুনর কপাল অইছে না।”

হকল থাকি বড় হুকুম

২৫ একবার এক আলিম ছাব ইছার গেছে আইলা। আইয়া তানরে পরিষ্কা করার লাগি জিকাইলা, “হুজুর, কিতা কাম করলে আমি বেহেস্ত পাইমু?” ২৬ ইছায় কইলা, “মুছা নবীর কিতাবো কিতা লেখা আছে? আপনে কিতা পাইছইন?” ২৭ আলিমে জুয়াপ দিলা, “লেখা আছে,

তুমি তুমার আস্তা দিল দিয়া, জান দিয়া,
হকল বল-শক্তি দিয়া,
তুমার ষোলআনা মন দিয়া,
তুমার আল্লা মাবুদরে মহব্বত করবায়।

আর,

তুমার আরি-ফরিরে নিজর লাখান মায়া করবায়।”

২৮ ইছায় তানরে কইলা, “আপনে ঠিক কথা কইছইন। তে আপনেও অউলা করউক্কা, তেউ বেহেস্ত পাইবা।”

২৯ অউ আলিমে নিজর দাম বাড়ানির লাগি ইছারে কইলা, “আইছা, তে আমার আরি-ফরি কে?”

৩০ ইছায় কইলা, “তুনউক্কা, একজন মানুষ জেরুজালেম থাকি যিরিহো টাউনো যাওয়াত আছিল। পথো ডাকাইতে পাইয়া তার কাপড়-চুপড় হকলতা কাড়িয়া নিয়া, তারে মারিয়া আধ-মরা করি ফালাই থইয়া গেলগি। ৩১ বাদে এক ইমাম-ছাব অউ পথেদি যাইরা, তাইন অউ বেটারে দেখিয়া গালাবায় হরিয়া গেলগি। ৩২ অউ লাখান লেবির খান্দানর এক খাদিম-ছাবও অউ পথেদি আইলা, তাইনও এরে দেখিয়া গালাবায় গেলগি। ৩৩ হেশে শমরিয়া জাতির এক বেটা অউ পথেদি আইলো, হে বিধমী জাতির অইলেও এর হালত দেখিয়া তার দিলো দরদ হমাইলো। ৩৪ অউ হে এর জখমর উপরে তেল আর আংগুরর রস মালিশ করিয়া পট্টি বান্দিয়া দিলো। বাদে তার নিজর গাধার উপরে তুলিয়া, এক মুছাফির খানাত নিয়া তার যতন করলো। ৩৫ বাদর দিন অউ শমরিয় বেটায় মুছাফির খানার মালিকর আতো দুইটা দিনার দিয়া কইলো, অউ মানুষগুর যতন করবা। এর বেশি খরচ অইলেও, আমি আইয়া দিমু।

৩৬ “তে আলিম ছাব, আপনার কিতা মনো অয়, অউ তিন জনর মাজে কুন জন, ডাকাইতর আতো পিটা খাওরা বেটার আরি-ফরি?” ৩৭ আলিমে কইলা, “যে মানষে তারে দরদ করলো হে-উ তো।” তেউ ইছায় কইলা, “তে আপনেও গিয়া অউলা করউক্কা।”

বিবি মার্খা আর তান বইন

৩৮ বাদে ইছা আর তান সাহাবি অকল আটি আটি এক গাউত গেলা। হউ গাউর এক বেটি মানষে খুশি অইয়া ইছারে তান বাড়িত নিয়া মেহমানদারি করলা। অউ বেটির নাম মার্খা। ৩৯ বেটির এক বইনর নাম অইলো মরিয়ম, এইন হুজুরর পাওর কান্দাত বইয়া নছিয়ত হুনরা। ৪০ আর মার্খা গিয়া রান্দা-বাড়া আর খাতির-যতন করাত পেরেশানিত রইলা। এরমাজে মার্খা আইয়া হুজুর ইছারে কইলা, “হুজুর, দেখরানি আমার বইনে হকল কাম-কাজ একলা আমার উপরে থইয়া অনো আইছে? তে আপনে কউক্কা, আমারে সাইয্য করতো।” ৪১ হুজুরে কইলা, “মার্খা, তুমি বউত বেয়াপারে চিন্তা

করিয়া পেরেশান অইগেছ। ৪২ হুনো, আসলে একটা বেয়াপারউ খালি জরুর আছে। তুমার বইন মরিয়মে হউ জরুরি বেয়াপাররে পছন্দ করছে। ইতা তো তাইর গেছ থাকি কাড়িয়া নেওয়া যাইতো নায়া।”

দোয়া করার কায়দা-কানুন

১১ একদিন হুজুর ইছায় কুনু এক জাগাত দোয়া করাত আছলা। দোয়া শেষ অইয়া হারলে তান এক সাহাবিয়ে কইলা, “হুজুর, এহিয়া নবীয়ে তো তান সাহাবিরে দোয়া করা হিকাইতা, তে আপনেও আমরারে দোয়া করা হিকাউক্লা।” ৩ ইছায় এরারে কইলা, “দোয়া করার সময় তুমরা অউলা কইও,

ও আছমানি বাবা, তুমার নাম পবিত্র কইয়া মানা অউক,
দুনিয়াত তুমার বাদশাই কাইম অউক।

- ৩ আমরার পরতেক দিনর রিজেক পরতিদিন যুগাই দিও;
৪ বাবা, আমরার তামাম গুনারে মাফ করিয়া দিলাও,
যেলা আমরাও মাফি দিলাইছি আমরার অপরাধি অকলরে;
আর পরিক্ষা থাকি হেফাজত করো আমরাে।”

৫ বাদে ইছায় তারারে কইলা, “ধরিলাও, আধা রাইতকুর বালা তুমরার কুনু দুস্তর বাড়িত গিয়া কইলায়, দুস্ত, আমারে তিনখান রুটি করজ দেও। ৬ আমার এক বন্ধু পথেদি যাওয়ার-বালা আখতাউ আমার বাড়িত উঠছইন। অখন তানে কিতা খাওয়াইতাম, আমার ঘরো তো কুস্তা নাই। ৭ তেউ দুস্তে ঘরো খনে জুয়াপ দিলা, আমি দরজা বন্দ করিয়া আমার হুরুতাইন লইয়া হুতিরইছি, আমারে কষ্ট দিও না। অখন উঠিয়া কুস্তা দিতাম পারতাম নায়া। ৮ অইলে আমি কইরাম, অউ দুস্তে উঠিয়া বন্ধু হিসাবে কুস্তা দিতে না চাইলেও, তুমি বার-বার মিনত করলে হে উঠবোউ। উঠিয়া তুমি যেতা চাইরায়, ইতা ঠিকউ দিব।

৯ “তে আমি তুমরারে কইরাম, তুমরা চাও, তেউ দেওয়া অইবো। তালাশ করো, তেউ পাইবায়। দুয়ারো ঠুকা দেও, তুমরার লাগি দুয়ার খুলা অইবো। ১০ যারা চায়, তারাউ তো পায়। যে তালাশ করে হে পায়।

যে দুয়ারো ঠুকা দেয়, তার লাগি দুয়ার খুলা অয়। ১১ তুমরার মাজে ইলা কুনু বাফ আছেনি, যার পুতে রুটি চাইলে তারে মাটি দিব, মাছ চাইলে হাফ দিব, ১২ বা এন্ডা চাইলে বিছা দিব? ১৩ তে তুমরা নাফরমান অইয়াও যুদি তুমরার হুরুতাইনরে ভালা ভালা চিজ দিতায় জানো, তে যারা বেহেস্তি বাফর গেছে চাইব, তাইন নিচয় তারারে পাক রুহ দান করবাউ।”

হজরত ইছায় কুন বলে কেরামতি দেখাইন

১৪ একদিন এক বেটার লগ থাকিয়া ইছায় এক বোবা জিন্নাত ছাড়াইলা। জিন্নাতে ছাড়ার বাদে হি বেটার জবান খুলি গেল, মাত-কথা মাতিলো। ইতা দেখিয়া মানুষ তাইজ্জুব বনিগেলা। ১৫ অইলে কুনু কুনু মানষে কইলো, “ই বেটায় জিনর বাদশা বেল-সবুলর বলে জিন ছাড়াই।” ১৬ আরো কয়েক জনে তানরে পরিক্ষা করার নিয়তে, তান আতর কুনু কেরামতি দেখতো চাইলো। ১৭ ইছায় তারার দিলর ভাব বুজিলিলা। বুজিয়া কইলা, “কুনু রাইজ্য নিজে নিজে ভাগ অইগেলে, ই রাইজ্য বিনাশ অইয়ায়। অউলা কুনু পরিবারো য়েবলা বিবাদ লাগি যায়, ই পরিবারও আর টিকে না। ১৮ তে জিন্নাত যুদি তার নিজর বিপক্ষে লাগি যায়, তাইলে তার রাইজ্য কেমনে টিকবো? তুমরা তো কইরায়, আমি বেল-সবুলর বলে জিন্নাত ছাড়াই। ১৯ খুব ভালা কথা, আমি যুদি বেল-সবুলর বলে জিন্নাত ছাড়াই, তে তুমরার মানষে কিতাদি ছাড়াই? তুমরার মাতর বিচার তুমরার মানষেউ করবো। ২০ অইলে আমি যুদি আল্লাই কুদরতে জিন্নাত ছাড়াই, তে তো আল্লার বাদশাই তুমরার নজদিক আইছে।

২১ “হুনো, কুনু বল আলা মানষে অস্ত্র-শস্ত্র লইয়া তার বাড়ি পাহারা দিলে, তার ছামানা নিরাপদ থাকে। ২২ অইলে তার থাকি জবরদস্ত আরক জন আইয়া হামলা করিয়া তারে আরাইলিলে, হে যেতা অস্ত্র-শস্ত্রর বড়াই করছিল, ই অস্ত্রও কাড়িয়া নিবোগি। তার হকল মাল-ছামানাও লুটিয়া নিয়া বাটিলিবো।

২৩ “তে যে জন আমার পক্ষে নায়, হে তো আমার বিপক্ষ। যে আমার অইয়া কাম না করে, হে তো আমার বিরুদ্ধে কাম করে।

২৪ “কুনু জিনে য়েবলা এক বেমারির লগ ছাড়িয়া যায়গি, গিয়া বসত করার লাগি মরুভূমিত ঘুরা-ঘুরি করে। বাদে কুনুখানো রইবার জাগা

না পাইয়া মনে মনে কয়, দুঃ! আমি যেন থাকি আইছি অনোট হিরবার যাইগি। ﴿২৫﴾ ফিরত আইয়া হারি দেখে, হি জাগা সুন্দর করি হাজাই-পাড়াই থওয়া। ﴿২৬﴾ অউ হে গিয়া তার থাকি আরো বদ সাতগু জিন লগে করি আনে। আনিয়া অনো হামাইয়া বাসা বানায়। এরদায় অউ বেমারির দশা পয়লা থাকি হেশে আরো খারাপ অয়।”

﴿২৭﴾ ইছায় অতা বয়ান কররা, আখতাউ ভিড়র মাজ থাকি এক বেটিয়ে জুরে জুরে কইলো, “হুজুর, যে মায় আপনারে পেটো লইছইন আর দুখ খাওয়াইছইন, এইন বড় কপালি মা।” ﴿২৮﴾ ইছায় কইলা, “ইখান হাছা কথা, অইলে এর চাইতেও বড় কপালি তারা, যারা আল্লার কালাম হুনে, হুনিয়া অলা আমল করে।”

হজরত ইউনুছ নবীর আলামত

﴿২৯﴾ বাদে আরো বউত মানুষ হজরত ইছার গেছে আইলা। তাইন এরারে কইলা, “ই জমানার মানুষ তো নাফরমান। তারা খালি কেলামতি তুকায, অইলে ইউনুছ নবীর আলামত ছাড়া দুছরা কুনু কেলামতি তারারে দেখাইল অইতো নায। ﴿৩০﴾ ইউনুছ নবী নিজে নিজেউ যেলা নিনভ টাউনর মানষর গেছে এক আলামত অইছলা, বিন-আদমও অউলা ই জমানার মানষর গেছে নিজেউ আলামত অইবা। ﴿৩১﴾ রোজ কিয়ামতর দিন দউকনর দেশর রানী উঠিয়া অউ জমানার মানষর দুষ জাইর করবা। কারন বাদশা সুলাইমানর আখলর কথা হুনার নিয়তে তাইন হুনিয়ার হেশ মাথা থাকি আইছলা। অইলে অখন তো সুলাইমান থাকিও আরো মহান একজন অনো আছইন। ﴿৩২﴾ কিয়ামতর দিন নিনভ টাউনর মুর্দা অকল উঠিয়া ই জমানার মানষর দুষ জাইর করবা। কারন ইউনুছ নবীর তবলিগ হুনিয়া তারা তৌবা করছিল। অইলে অখন তো ইউনুছ থাকিও আরো মহান একজন ইনো আছইন, তা-ও মানষে তৌবা করে ন।

চউখ ভালা যার, দিল ভালা তার

﴿৩৩﴾ “কনু মানষে তো লেম জালাইয়া হারি চকির তলে বা টুকরির তলে থয় না, বরং গাছার উপরেউ থয়, যাতে ঘরর মানষে ফর দেখে। ﴿৩৪﴾ তুমার চউখউ

অইলো তুমার কায়ার বাস্তি। চউখ যুদি ভালা অয়, তে তুমার আস্তা শরিলো ফর অইবো। আর চউখ খারাপ অইলে, তুমার শরিলও আন্দারিত রইবো। ৩৫ তে খিয়াল রাখিও, তুমার দিলো যে নুর আছে, ইতা আন্দাইর অইয়ার কি না? ৩৬ তুমার আস্তা শরিলো যুদি ফর থাকে, কুনু অংগ আন্দাইর না থাকে, তে লেমে যেলা তার নিজর তেজে তুমারে ফর দেয়, অউলা ই নুরেও তুমার আস্তা শরিলরে ফর করিলিবো।”

দিলরে পাক-পাকিজা রাখা জরুর

৩৭ ইছায় বয়ান কররা অউ সময় ফরিশি দলর একজনে তানরে খাইবার দাওত দিলা। তাইন গিয়া এন ঘরর ভিতরে খানিত বইলা। ৩৮ ফরিশিয়ে দেখলা, খাওয়াত বইবার কালো ইছায় ইহুদি নিয়ম মাফিক আত ধইছইন না, অউ তাইন তাইজ্জুব বনিগেলা।

৩৯ তেউ ইছায় তানরে কইলা, “হুনউক্কা, আপনারা ফরিশি অকলে তো বাসন-বর্তনর বাইর গালা খুব সুন্দর করইন, অইলে আপনারার ভিতরে তো নাফরমানি আর লালছে ভরা। ৪০ ও বেআখলর দল, যেইন বারগালা বানাইছইন, তাইনউ কিতা ভিতরগালাও বানাইছইন না নি? ৪১ এরলাগি আপনারার ভিতরে যেতা আছে, অতা আগে আল্লার ওয়াস্তে লিল্লা-হদকা দেউক্কা। তেউ দেখবানে, আপনারার হকলতাউ পাক-ছাফ অইযিব।

৪২ “হায়রে ফরিশি অকল, লান্নত তুমরারে, তুমরা খালি তেজপাতা, পদিনা পাতা আর হক্কল হাগ-তরকারির দশ বাটর এক বাট আল্লার নামে যকাত দেও, অইলে আল্লার মহব্বত আর হক ইনছাফর বায় তুমরার কুনু খিয়ালউ নাই। আসলে অউ পয়লাতা মানার লগে লগে বাদরতাও আমল করা ফরজ। ৪৩ ও লান্নতি ফরিশি অকল! মছিদো হামাইয়া ছামনর কাতারো বওয়া, আর বাজার-আটো গিয়া ছালাম পাইতে তুমরা খুব পছন্দ করো। ৪৪ লান্নত তুমরার উপরে, তুমরা অইলায় অ-চিনা কয়বরর লাখান। মানষে না চিনিয়া এর উপরেদি আটা-ফিরা করে।”

৪৫ ইখান হুনিয়া একজন আলিমে ইছারে কইলা, “হুজুর, অখান কইয়া তো আপনে আমরারেও বেইজ্জত কররা।” ৪৬ ইছায় কইলা, “নিচয়, আপনারাও লান্নতি, আপনারা মানষর কান্দো ভার বোঝাই করিয়া দেইন, অইলে তারার আছানর লাগি আংগলটাও লাড়ইন না।

৪৭ “হায়রে লান্নতি অকল, তুমরা নবী অকলর রওজারে সুন্দর করিয়া পাক্কা করো, অইলে তুমরার ময়-মুরব্বিয়েউ তো এরায়ে কাতল করছলা।

৪৮ অতা দেখিয়াউ বুজা যায়, তুমরা তুমরার ময়-মুরব্বির কামর সান্ধি অইরায়, তুমরাও অলা অইরায়। তারা নবী অকলরে কাতল করছিল, আর তুমরা হউ নবীর রওজারে পাক্কা কররায়। ৪৯ এরদায় আল্লা পাকেও তান নিজর মর্জিয়ে কইলা, আমি তারার গেছে আমার নবী-রছুল বেজিমু, এরায়ে কেউররে তারা জুলুম করবো, আর কেউররে কাতল করবো।

৫০ এতে দুনিয়ার পয়লা থাকি অখন পর্যন্ত যতো নবীরে কাতল করা অইছে, এরা হক্কলর দায়ি অইবা অউ জমানার মানুশ। ৫১ হুনউক্কা, আমি আপনাইন্তরে কইরাম, পয়লা আদমর পুত হাবিলর খুন থাকি শুরু করিয়া, নবী জাকারিয়ার খুন পর্যন্ত হক্কল লউর সাজা অউ জমানার মানুশর গেছ থাকি আদায় করা অইবো। নবী জাকারিয়ারে তো জেরুজালেমর পবিত্র কাবা শরিফর কুরবানি খানা, আর খাছ পাক জাগার মাজখানো কাতল করা অইছে। ৫২ হায়রে লান্নতি আলিম অকল, তুমরা মানুশরেও আল্লার পথ চিনাইরায় না, নিজেও আল্লার বাদশাইত হামাইরায় না, আর যেরা হামাইতো চায়, তারারেও বাধা দিরায়ে।”

৫৩-৫৪ বয়ান বাদে ইছা ইখান থাকি রওয়ানা দিলাইলা। তেউ আলিম আর ফরিশি অকলে মিজাজ গরম করিয়া ইছারে ফান্দো ফালাইতা করি খুচাই-ফাড়াই মাতিলা। নানান নমুনার ছওয়াল করিয়া তানরে আটকানির সুযোগ তুকাইলা।

আখেরাতর ছামান কামাই করো

১২ অউ সময় আজার আজার মানুশ দলা অইগেলা, তারা ঠেলাঠেলি করি একে-অইন্যর উপরে পড়লা। ইছায় পয়লা তান সাহাবি অকলরে কইলা, “তুমরা ফরিশি মজহবর খামির থাকি হুশিয়ার রইও, অউ খামির অইলো তারার ভণ্ণামি। ১ ঠিক অউ খামিরর লাখান, ইলা লুকাইল কুস্তাউ নাই, যেতা জাহির অইতো নায়। ইলা গোপন কুস্তাউ নাই, যেতা জানা যাইতো নায়। ২ তুমরা আন্দাইর ঘরো যেতা মাতিছো, মানুশে ইতা ফরর মাজে হুনবো। ঘরর ভিতরে কানে-কানে যেতা কইছো, ইতা চালর উপরে রটাইল অইবো।

৪ “ও আমার দুস্ত অকল, আমি তুমরায়ে কইয়ার, যারা খালি শরিলরে বিনাশ করা ছাড়া আর কুস্তাউ করতো পারে না, তারারে ডরাইও না। ৫ তে কারে ডরাইতায় এওখানও কইরাম, মারার বাদে দোজখো হরানির খেমতাও যান আছে, খালি তানরেউ ডরাইও। আমি হিরবার কইরাম, তুমরা খালি তানেউ ডরাইও। ৬ মাত্র দুই আনায় পাচগু চড়া পাখি মিলে না নি? আল্লায় তো অউ চড়ার কথাও ফাউরইন না। ৭ আর কিতা কইতাম, তুমরার মাথার চুলর হিসাবও তান গেছে আছে। তুমরা ডরাইও না, বউত চড়া পাখি থনেও তুমরার দাম তান গেছে বেশি।

৮ “হুনো, আমি তুমরায়ে কইরাম, যে মানষে সমাজর ছামনে আমারে কবুল করে, আমি বিন-আদমেও আল্লার ফিরিস্তা অকলর ছামনে তারে কবুল করমু। ৯ অইলে যে মানষে সমাজর ছামনে আমারে অস্বীকার করবো, আমিও তারে আল্লার ফিরিস্তা অকলর ছামনে অস্বীকার করমু। ১০ আমি বিন-আদমর বিরুদ্ধে কেউ কুস্তা মাতিলেও মাফি পাইবো। অইলে কেউ যদি পাক রুহর বিরুদ্ধে কুফুরি করে, তে তার কুন্ মাফি নাই।

১১ “মানষে য়েবলা তুমরায়ে মছিদর পাঞ্চইতো, বিচারি অকলর ছামনে, বা থানাত নিবো, অউ সময় কিতা জুয়াপ দিতায় বা কিতা কইতায়, ইতা লইয়া কুন্ চিন্তা করিও না। ১২ কিতা মাতিতায় ইতা পাক রুহে তুমরায়ে হউ সময় বাতাই দিবা।”

১৩ ভিড়র মাজ থাকি একজনে ইছারে কইলো, “হুজুর, আপনে আমার ভাইরে কউক্কা, আমার বাবায় যেতা ধন-ছামানা থইয়া গেছইন, অতা বাট-বাটুরা করিয়া দিতা।” ১৪ ইছায় তারে কইলা, “ওবা, তুমরার বিচার করতাম আর ধন-ছামানা বাটিতাম, ইতা এখতিয়ার আমারে খেগুয়ে দিছে?” ১৫ তাইন মানষরে কইলা, “খবরদার! হক্কল নমুনার লোভ-লালছ থনে নিজরে বাচাও। কারন ধন-ছামানা বাইয়া গেলেও ইতায় মানষর জান বাচায় না।” ১৬ বাদে ইছায় তারারে অউ কিছা হুনাইলা, কইলা, “এক ধনি বেটার জমিনো বউত ধান ফলিছিল। ১৭ ধান দেখিয়া হে মনে মনে কইলো, অতো ধান অখন কিতা করতাম? আমার তো থইবারউ জাগা নাই। ১৮ তে আমি এক কাম করি, আমার উগার ভাংগিয়া বড় করি কয়টা উগার বানাইলাই। তেউ আমার হক্কল ধান আর মাল-ছামানা জাগা অইবো। ১৯ হেশে আমার জানরে কইমু, ও জান, বউত বছরর মাল-ছামানা আর খানি খুরাকির লাগি নিচিন্তা অইগেছো। অখন আরাম-আয়েশে

তুমি খাইয়া ফিন্দিয়া ফুর্তি করো। ২০ অইলে আল্লায় তারে কইলা, ওরে বেআখল, তোর জান তো আইজ রাইতউ কবজ করা অইবো। তে তুই যেতা জমাইছছ, ইতা খেগুয়ে খাইবো?” ২১ হেশে ইছায় কইলা, “যে মানষে খালি দুনিয়াবি ধন-ছামানা দলা করে, অইলে আখেরর ধন না জমায়, তার হালত অউলাউ অয়।”

২২ বাদে ইছায় তান সাগরিদ অকলরে কইলা, “এরদায়উ আমি তুমরা কইরাম, কিতা খাইয়া বাচতাম, আর কিতা ফিন্দিতাম, ইতা লইয়া তুমরা চিন্তা করিও না। ২৩ জান থাকি তো খানি বড় নায়, আর শরিল থাকি কাপড় বড় নায়। ২৪ অউ কাউয়া গুইন্তর বায় খিয়াল করো, তারা তো খেতও করে না, ফসলও কাটে না। তারার উগারও নাই, ভাভারও নাই। আল্লায় তারার রিজেক যুগাইয়া দেইন। তে তুমরা তো অউ কাউয়া থাকি বউত দামি। ২৫ কওছাইন, তুমরার মাজে কেউ চিন্তা-ভাবনা করিয়া তার হায়াতি এখান ঘন্টাও বাড়াইতো পারবো নি? ২৬ আর অউ হুরু কামখানউ যেবলা পারো না, তে কেনে বাড়তি চিন্তা করো?”

২৭ “তুমরা অউ জংলি ফুলর বায় চাও, ইতা কতো সুন্দর? ইতায় তো নিজর সুন্দরর লাগি কুস্তাউ করেনা, কুন্ রংগ সিলাইও করে না, বাইনও করেনা, এমনেউ অয়। তে আমি কইয়ার, বাদশা সুলাইমান অতো জাক-জমকর মাজে রইলেও তান লেবাছ তো অতা এগু জংলি ফুলর লাখানও সুন্দর আছিল না। ২৮ দেখরায়নি, জংগলর মাজে অউ যতো সুন্দর ফুল অখন আছে, কাইল অইলেউ মানষে ইতা দারু বানাইয়া আগুইনদি জলাইবো। আল্লায় যুদি অউ জংগলরে অলা সুন্দর করি হাজাইছইন, তে ও কমজুর ইমানদার অকল, তুমরাও তাইন সুন্দর করি হাজাইতা নায় নি? ২৯ তে কিলা খাইতাম, কিলা চলতাম, ইতা বেয়াপারে চিন্তা করিও না, বা অস্তির অইও না। ৩০ ই দুনিয়ার মানষে খালি অতা লইয়াউ ধান্দা করে। অইলে তুমরার বাতুনি বাফে তো এমনেউ জানইন, তুমরার কিতা কিতা লাগবো। ৩১ এরদায়উ তুমরা ইতা বাদ দিয়া, খালি আল্লার বাদশাইর ধান্দাত রও, তেউ ইতা হক্কলতাউ তাইন যুগাইবা।

৩২ “তুমরাউ আমার মেড়ার পাল, তুমরার দল হুরু-মুরু অইলেও ডরাইও না, তুমরার বাতুনি বাফর মর্জি অইলো, তুমরা তান বাদশাইর ভিতরো হামাও। ৩৩ তুমরার যততা আছে, হক্কলতা বেচিয়া গরিব অকলরে

বিলাই দেও, আর নিজর লাগি খালি অউলা এক কুথি-বেগ তিয়ার করো, যে কুথি কুন্দিয় পুরান অয় না। অউ বেহেস্তো ছামানা জমা করো, যেখনো ছামানা ক্ষয় অয় না, চুরেও নেয় না, পুকেও খায় না। ৩৪ কারণ তুমরার ধন যেনো রয়, মনও হনো রইবো।

হামেশা তিয়ার রইও

৩৫ “তুমরা কাপড়-চুপড় ফিন্দিয়া আর বাস্তি জালাইয়া তিয়ার রইও।
 ৩৬ তুমরা অউ জাত কামলার লাখান অও, যারা তারার মুনিবর লাগি বার চায়, তাইন বিয়ার দাওত থাকি ফিরত আইয়া দুয়ারো ঠুকা দিলেউ, লগে লগে দুয়ার খুলতো পারে। ৩৭ হউ গুলাম অকলউ কপালি, যেরারে তারার মুনিবে আইয়া হজাগ পাইবা। আমি হাছা কথা কইরাম, মুনিবে আইয়া হারি তান নিজর কমরো গামছা বান্দিয়া তারারে খানিত বওয়াইবা, আর নিজর আতে বাড়িয়া খাওয়াইবা। ৩৮ তারাউ বড় কপালি, যেরারে তারার মুনিবে আধা রাইত বা হেশ রাইতে আইয়া ডাক দিলেউ হজাগ পাইবা। ৩৯ মনো রাখিও, চুর কুন সময় আইবো, গিরস্তে ইখান জানলে তো হে হজাগ রইলো অনে, তার ঘরো হিং কাটতে দিলো না অনে। ৪০ অলা তুমরাও তিয়ার রইও, কারণ যে অখতর কথা তুমরা চিন্তাউ করতায় নায়, হউ সময়উ বিন-আদমে তশরিফ আনবা।”

৪১ তেউ সাহাবি পিতরে কইলা, “হুজুর, ই নছিয়ত খালি আমরার লাগি, না হকল মানষর লাগি?” ৪২ হুজুরে জুয়াপ দিলা, “আখলদার আর হক-হালালি অউ জন কে, যার আতো মালিকে তান গুলাম-বান্দিরে দেখা-হুনার ভার দিবা, হে অখতর কালো তারার খানি বাটিয়া দিব?
 ৪৩ হউ গুলামউ কপালি, যারে তার মুনিবে আইয়া অউ লাখান কাম করাত দেখবা। ৪৪ আমি তুমরারে হাছা কথা কইরাম, হউ মুনিবে তারে তান নিজর হকল ধন-ছামানা তদারকির এখতিয়ার দিবা। ৪৫ অইলে ধরিলোও, হউ গুলামে মনে মনে কইলো, আমার মুনিব আইতে তো বউত দেরি আছে, আর অউ ফাখে হে হক্কল বান্দি গুলামরে মাইর-ধইর করলো, খাইয়া দাইয়া ফুর্তি করিয়া, মদ খাইয়া টাল অইয়া পড়ি রইলো। ৪৬ বাদে যে দিন আর যে অখতর কথা হে চিন্তাউ করতো নায়, হউ দিন আর হউ অখতো তার মুনিব আইয়া আজির

অইবা। তাইন তারে এক ছেদে দুই টুকরা করিয়া নাফরমান অকলর কাতারো মিশাইবা।

৪৭ “আর যে গুলামে তার মুনিবর মর্জিরে বুজিয়াও তিয়ার অইছে না, তান হুকুম মাফিক কাম করছে না, তারে বেজুইতা মাইর মারা অইবো।

৪৮ অইলে না জানিয়া যদি হে সাজা পাইবার কাম করিলায়, তে তার সাজা কম অইবো। যারে বেশি দেওয়া অইছে, তার গেছ খনে বেশি চাওয়া অইবো, আর যার গেছে বেশি পরিমানে থওয়া অইছে, তার গেছেউ বেশি দাবি করা অইবো।

৪৯ “আমি তো দুনিয়াত আগুইন লাগানিত আইছি। অখন যদি ই আগুইনখান জলিযিতো, তে বড় ভালা অইলোঅনে। ৫০ আমি তো এক খাছ গোছল করাউ লাগবো। তে আমার দুখ-কষ্টর ই গোছল যতদিন না অইছে, অতো দিন আমার পেরেশানির কুনু সীমা নাই।

৫১ তুমরা মনো কররায় নি, আমি দুনিয়াত শান্তি দিতাম আইছি? না, মোটেউ নায়, আমি কইরাম, আমি তো দুনিয়াত এক মতোভেদ লাগানিত আইছি। ৫২ অখন থাকি এক ঘরর পাচ জন যারযির আলগ অইযিবো। তিনজন দুইজনর বিপক্ষে, আর দুইজন তিনজনর বিপক্ষে লাগব। ৫৩ বাফে পুয়ার বিপক্ষে আর পুয়া বাফর বিপক্ষে। মা পুড়ির বিপক্ষে আর পুড়িয়ে মার বিপক্ষে। হড়ি বউর বিপক্ষে আর বউয়ে হড়ির বিপক্ষে লাগবো।”

৫৪ বাদে ইছায় মানষরে কইলা, “তুমরা তো পইচমেদি কালনি দেখলেউ কও, মেঘ আইওর। আর হাছাউ মেঘ আয়। ৫৫ হিরবার দকিনা বাতাস চালু অইলে তুমরা কও, খরা অইবো, আর অলাউ অয়। ৫৬ ও ভন্ড অকল! তুমরা আছমান আর জমিনর ছুরত বুজতায় পারো, তে আখেরি জমানার হাল-হকিকত কেনে বুজো না?

৫৭ “কুনখান ঠিক, ইতা তুমরা নিজে নিজেউ বিচার করো না কেনে? ৫৮ কুনু নালিশ লইয়া হাকিমর ছামনে যাইবার আগে, বিপক্ষর লগে পথো বইয়াউ মিট-মাট করার চেষ্টা করিও। আরনায় হে তুমারে ধরিয়া হাকিমর ছামনে নিবো, হাকিমে পুলিশর আতো দিবো, আর পুলিশে নিয়া জেলো হরাইবো। ৫৯ হেশে শেষ পয়সাটা আদায় না করা পর্যন্ত, কুনুমন্তেউ জেল থাকি ছাড়া পাইতায় নায়, ইতা আমি তুমরারে কইরাম।”

তৌবা না করলে বিনাশ অইবায়

১৩

হজরত ইছায় বয়ান কররা, অউ সময় হনর কয়জন মানষে তানরে কইলা, “তুজুর, গালিল জিলার কিচু মানষে আল্লার পাক জাগাত গিয়া পশু কুরবানি দেওয়াত আছলা, অউ সময় হাকিম পিলাতে তারারে হউ পাক জাগাত কাতল করিয়া, তারার লউ আর কুরবানির লউ একলগে মিশাইছইন।” ২ ইখান হুনिया ইছায় কইলা, “অউ কুরবানি দেওয়ার মউত অলা অওয়ায়, তুমরা মনো কররায় নি, গালিলর অইন্য মানুষ থাকি এরা বেশি গুনাগার আছিল? ৩ আমি তুমরারে কইরাম, না, ইলা নায়, অইলে তুমরা যুদি গুনা থাকি তৌবা না করো, তে তুমরাও অলা বিনাশ অইবায়। ৪ হুনো, জেরুজালেমর শিলো এলাকার হউ উচা মিনারা ভাংগায় যে আঠারো জন মারা গেছিল, তারার বেয়াপারে কিতা মনো করো? জেরুজালেমর বাকি মানুষ থাকি এরা বেশি গুনাগার নি? ৫ আমি তুমরারে কইরাম, না, ইখান ঠিক নায়, অইলে তুমরা যুদি গুনা থাকি তৌবা না করো, তে তুমরাও অলা বিনাশ অইবায়।”

৬ বাদে তাইন অউ কিছা হুনাইলা, কইলা, “এক গিরস্তে তান বাগানো ডুমুরর একটা গাছ লাগাইলা। সময় আইলে এইন আইয়া গাছো ফল তুকাইলা, অইলে কুনু ফল পাইলা না। ৭ না পাইয়া বাগানর মালিরে কইলা, হুনো, আইজ তিন বছর ধরি অউ ডুমুর গাছো ফল তুকাইরাম, অইলে কুস্তাউ পাইরাম না। তে তুমি গাছগু কাটিলাও, ইগুয়ে খামোখা জমিনর রস টানের। ৮ মালিয়ে কইলো, ছাব, ই বছরখানও থাকউক। আমি অগুর চাইরো গালার মাটি কুড়িয়া সার দিমু। ৯ ছামনর বছর যুদি ফল ধরিলায়, তে তো ভাল, নাইলে কাটিলিমু।”

জুম্বাবারে কেরামতি

১০ এক জুম্বাবারে ইছা মছিদর ভিতরে নছিয়ত করাত আছলা। ১১ হুনো এক বেটি মানুষ আছিল, ই বেটির উপরে আঠারো বছর ধরি আতশি-দেওয়ে আছর করছিল। দেওয়ে বেটিরে গুজা বানাইলিছিল, বেটি সিদা অইয়া উবাইতো পারতো না। ১২ ইছায় বেটিরে ডাকদি কান্দাত আনিয়া কইলা,

“মাই গো, তুমি অখন ই বেমার থাকি রেহাই পাইছো।” ১৩ অখান কইয়াউ তাইন বেটিরে আতাই দিলা। লগে লগেউ বেটি সিদা অইয়া উবাইলো, আর আল্লার শুকুর-গুজার করলো।

১৪ অইলে জুম্মার দিন তাইন ই বেটিরে ভালা করায়, মছিদর মতল্লীয়ে গুছা করিয়া কইলা, “কাম করার লাগি তো বাকি ছয়দিনউ আতো আছে। তুমরা জুম্মার দিন না আইয়া অইন্য যেকুনু দিন আইয়া ভালা অইও।”

১৫ তেউ ইছায় হি মতল্লীরে কইলা, “ও ভন্ড অকল! জুম্মার দিন আপনারার গরু-গাধারে গোয়ালার বারে নিয়া পানি খাবাইন না নি?”

১৬ আইজ আঠারো বছর ধরি ইব্রাহিমর অউ আওলাদরে শয়তানে বান্দিয়া রাখছিল। অখন জুম্মাবারে ই বেটিরে আজাদ করা জাইজ অইছে না নি?”

১৭ ইখান হুনিয়া যেরা তান বিপক্ষে আছিল তারা হকলেউ শরমিন্দা অইলো। অইলে বাকি মুছল্লি অকলে তান হকল কেরামতি দেখিয়া খুশি অইলা।

ডেংগা বিছি আর খামিরর কিছা

১৮ বাদে ইছায় কইলা, “আল্লার বাদশাইরে আমি কিতার লগে তুলনা করতাম? ১৯ মনো করউক্কা, আল্লার বাদশাই অইলোগি এগু ডেংগা বিছির লাখান, কুনু গিরস্তে তার জমিনো নিয়া অউ বিছি বাইন দিলো, বাদে ইটা বড় অইয়া গাছ অইগেল, আর পাখিন্তে আইয়া গাছর ডালো বাদা বানাইলো।”

২০ তাইন হিরবার কইলা, “আল্লার বাদশাইর তুলনা আমি কিতার লগে করতাম? ২১ ধরউক্কা, আল্লার বাদশাই অইলোগি খামিরর লাখান, কুনু এক বেটিয়ে থুড়া খামির নিয়া এক মন ময়দার লগে মাখিলো, আর খামিরর ফাফে হকল ময়দা ফুলিয়া উঠিলো।”

নাজাতর বেয়াপারে তালিম

২২ হজরত ইছায় আটি আটি গাউয়ে গাউয়ে আর টাউনে টাউনে গিয়া তবলিগ করিয়া জেরুজালেমর বায় আগুয়াইলা। ২৩ এরমাজে একজন মানষে তানে জিকাইলো, “হুজুর, যেরা নাজাত পাইবা, এরা পরিমানে খুব কম নি?”

অউ ইছায় মানষরে কইলা, ﴿২৪﴾ “চিপা দুয়ারেদি হামানির লাগি দিলে-জানে ফিকির করো। হুনো, আমি তুমরারে কইরাম, বউত জন ইনো হামাইতে চাইলেও, হামাইতো পারতো নায়। ﴿২৫﴾ ঘরর মালিকে যেবলা দুয়ার বন্দ করিলিবা, তুমরা বারে উবাইয়া দুয়ারো ঠুকাইতে ঠুকাইতে কইবায়, হুজুর, আমরারে দুয়ার খান খুলিয়া দেউক্কা। অইলে তাইন জুয়াপ দিবা, তুমরা কুয়াই থাকি আইছো, আমি তো চিনিউ না। ﴿২৬﴾ তেউ তুমরা কইবায়, আমরা আপনার লগে খাইছি-বইছি, আপনে তো আমরার পথো-ঘাটো আইয়া আমরারে নছিয়ত করতা। ﴿২৭﴾ অইলে তাইন কইবা, হায়রে নাফরমান অকল, আমার গেছ থাকি বাগো। তুমরা কুয়াই থাকি আইছো, আমি তো চিনিউ না।

﴿২৮﴾ “তুমরা দেখবায় ইব্রাহিম, ইসহাক, ইয়াকুব আর তামাম নবী অকল আল্লার বাদশাইত দাখিল অইছইন, অইলে তুমরারে হরাইয়া ফালানি অইছে। তুমরার মাজে কেউ কান্দা-কাটি করবায় আর কেউ দাত কিড়িমিড়ি খাইবায়। ﴿২৯﴾ আরো দেখবায়, দুনিয়ার চাইরোবায় থাকি মানুষ আইয়া আল্লার বাদশাইত দাখিল অইয়া খানা-দানা খাইরা। ﴿৩০﴾ তে যেরা অখন খরর কাতারো আছে, তারা কেউ কেউ আগে আইবো, অইলে অখন যেরা আগর কাতারো আছে তারা কেউ কেউ খরে যাইবোগি।”

জেরুজালেমর লাগি আফছুছ

﴿৩১﴾ তাইন অতা মাতিরা, এরমাজে আখতাউ ফরিশি দলর কয়জন আইয়া ইছারে কইলা, “আপনে ইন থাকি হরিয়া যাইনগি, কারন রাজা হেরোদে আপনারে মারিলিতা চাইরা।” ﴿৩২﴾ ইছায় তারারে কইলা, “আপনারা গিয়া হউ হিয়ালর ছাওরে কউক্কা, আইজ আর কাইল আমি জিন্নাত ছাড়াইমু, বেমারি অকলর শিফা করমু, পরু দিন আমার কাম শেষ অইবো। ﴿৩৩﴾ তে যেলাউ অউক, আইজ, কাইল আর পরু, অউ তিন দিন আমার চলাউ লাগবা। আমি তো জানিউ, জেরুজালেমর বারে কুনু নবীরে কাতল করা অয় না।

﴿৩৪﴾ “জেরুজালেম! হায়রে জেরুজালেম! তুমি নবী অকলরে কাতল করো। তুমার গেছে যারারে বেজা অইছে, তুমি তারারে পাথর মারছো। মুরগিয়ে যেলা তাইর ছাওরে ডাখনার তলে আশ্রয় দেয়, আমি অউলা তুমার মানষরে আশ্রয় দিতাম চাইছি, অইলে তুমি রাজি অইলায় না। ﴿৩৫﴾ তে হুনো,

তুমার বাড়ি খালি-বাড়ি অইবো। আমি তুমরারে কইরাম, যতদিন তুমরা না কইবায়, আল্লার নাম লইয়া যেইন আইরা তাইনউ মুবারক, অতো দিন তুমরা আর আমারে দেখতায় না।”

খানির দাওতো বইয়া তালিম

১৪

হজরত ইছা ফরিশি দলর এক মুরস্বির বাড়িত কুন্ এক জুম্মাবারে দাওতো গেলা, গিয়া হারলে তারা তানবায় খুব ভালা করি চউখ রাখলো। ২ আখতাউ তান ছামনে এক বেমারি বেটা আইলো, তার আস্তা শরিল বেমারে ফুলিগেছিল। ৩ তেউ ইছায় হনর আলিম আর ফরিশি অকলরে জিকাইলা, “মুছা নবীর শরিয়ত মাফিক জুম্মাবারে কুন্ মানষর বেমার শিফা করা জাইজ নি?” ৪ ইখান হুনিয়া তারা হকল নিরাই রইলা, আর ইছায় হি বেমারিরে শিফা করিয়া বিদায় দিলাইলা। ৫ বাদে তারারে কইলা, “তুমরার মাজে ইলা কুন্ জন আছেন, যার কুন্ হুরুতা বা গরু-ছাগল জুম্মার দিন পানিত পড়িগেলে, হে ইগুরে পানি থাকি তুলে না?” ৬ ইখান হুনিয়া তারা কুন্ জুয়াপ দিতা পারলা না।

৭ আর যে মেহমান অকল দাওতো আইছইন, তারা হকলে ভালা ভালা জাগা তুকাই বইরা দেখিয়া, ইছায় তারারে অউ তালিম দিলা, ৮ “কুন্ মানষে তুমারে বিয়ার দাওত দিলে, তুমি মজলিছো হামাইয়া দামি জাগাত বওয়া ঠিক নয়। কারন মালিকে কিবান তুমার থাকি আরো ইজ্জতি কেউররে দাওত দিছইন। ৯ তে অইলে যেইন তুমারে দাওত দিছইন তাইন আইয়া কইবা, অউ সিট থাকি উঠিয়া আমার দামি মেহমানরে বইবার দেইন। তেউ তুমি শরমিন্দা আইয়া এমনেউ হকল থাকি নীচা জাগাত গিয়া বইবায়। ১০ এরদায় তুমি কুন্ দাওতো গেলে পয়লা নীচা জাগাত গিয়া বইও। তেউ যার বাড়িত দাওতো গেছো তাইন আইয়া কইবা, ভাইছাব, ইনো কেনে বইছইন, ভালা জাগাত তশরিফ আনউক্লা। এতে আরো মেহমান অকলর ছামনে তুমার ইজ্জত বাড়বো। ১১ আসলে যে নিজরে বড় মনো করে, তারে হুরু করা অইবো। আর যে নিজরে হুরু মনো করে, তারে বড় করা অইবো।”

১২ যে মৌলানায হজরত ইছারে দাওত দিছলা, ইছায় এনরে কইলা, “দিনর বা রাইতকুর খানির লাগি তুমি কুন্ অনুষ্ঠান করলে, তুমার বন্ধু-বান্ধব,

ভাই-বিরাদর, খেশ-কুটুম, আর ধারো কাছর খনি মানষরে দাওত দিও না। তারারে খাওয়াইলে বাদে তারাও তুমারে খাওয়াইয়া বদলা দিলাইবা। ১৩ এরলাগি তুমি কুনু মেহমানদারি করতে চাইলে, খালি গরিব মানুষ, আতুর, আন্দা, লুলা-লেংড়ারে দাওত দিও। ১৪ এরা তো ফিরিয়া তুমারে খাওয়াইতো পারতো নায়। এতে কিয়ামতর দিন তুমি পরেজগার অকলর লগে ইতার বদলা পাইবায়।”

১৫ ইতা হুনিয়া হউ খানির মজলিছর একজনে কইলা, “মুবারক হউ বন্দা, যেইন আল্লার বাদশাইত বইয়া খানা-পিনা খাইবা।” ১৬ তেউ ইছায় কইলা, “কুনু একজন মানষে খুব বড় এক মেজবানি করিয়া, বউত মানষরে দাওত দিলা। ১৭ খাওয়ার সময় অইলে তান গুলামরেদি কওয়াইলা, আপনারা আইউক্কা, খানা তিয়ার অইগেছে। ১৮ অইলে হকল দাওতিয়ে একেকটা উজর দেখাইলো। পয়লা জনে কইলো, আমি থুড়া জমিন খরিদ করছি, অখন দেখাত যাইতাম, তে হনো না গেলে অইতো নায়, এরলাগি আমারে মাফ করউক্কা। ১৯ দুহরা জনে কইলো, আমি আলর লাগি পাচ জুড়া বলদ লইছি। অখন গিয়া দেখতাম, ইতায় আল বাইন কি না, তে, আমারে মাফ করো। ২০ আরক জনে কইলো, আমি তো নয়া বিয়া করছি। অখন যাইতাম পারতাম নায়। ২১ হি গুলামে আইয়া তার মালিকরে হকলতা জানাইলো। ইতা হুনিয়া মালিকে গুছা করিয়া কইলা, তুই জলদি করি টাউনর অল্লিয়ে-গল্লিয়ে যা, গিয়া গরিব, আতুর, আন্দা, লুলা-লেংড়ারে আনগি। ২২ তেউ হে অলা করিয়া হারি বাদে আইয়া কইলো, হুজুর, আপনার হুকুমে হকলতা করা অইছে, অইলে অখনও জাগা খালি রইছে। ২৩ অউ তাইন কইলা, তে টাউনর বারে পথো-ঘাটো, আর চিপায়-চাপায় যা, গিয়া মিনত কাজ্জি করি মানষরে আন। মানুষ আইয়া মজলিছ ভরি যাউক্কা। ২৪ আর তুমরা খিয়াল করি হুনো, আগে যেতারে দাওত দিছলাম, ইতা কুনুগিয়ে যানু আমার খানি না পাইন।”

আল-মসীর উম্মত অওয়ার শর্ত

১ বাদে হজরত ইছার লগে অইয়া বউত মানুষ আটাত আছলা। অউ সময় তাইন এরার বায় চাইয়া কইলা, ২ “কেউ যদি আমার তরিকাত অইতো চায়, তে তার নিজর মা-বাবা, বউ-বাইচা, ভাই-বিরাদর, আর নিজর

জানরেও আমার থাকি হুরু মনে করতে অইবো। আরনায় হে আমার উম্মত অইতো পারতো নায়। ﴿২৭﴾ যে মানষে নিজর দুখ-কষ্টর সলিব কান্দো লইয়া আমার খরে খরে রয় না, হে আমার উম্মত অইতো পারে না।

﴿২৮﴾ “তুমরার কেউ যুদি উচা কুনু দলান বানাইতো চায়, তে হে পয়লা তার খরচর হিসাব মিলাইয়া দেখে, দলানর কাম শেষ করার লাগি তার টেকা আছে কি না। ﴿২৯﴾ না অইলে, ইয়ান দিয়া হারি কাম শেষ করতে না পারলে, মানষে টাট্টা করবা, ﴿৩০﴾ কইবা, বেটায় দলান তুলিয়া অখন শেষ করতো পারের না।

﴿৩১﴾ “আর যুদি এক রাজা আরক রাজার বিপক্ষে যুদ্ধ করাত লাগইন, তে পয়লা বইয়া পরামিশ করবা, তাইন কইবা, বিশ আজার ফৌজ লইয়া যেরা আমার বিপক্ষে আইরা, আমি দশ আজার ফৌজ লইয়া এর মুকাবিলা করতাম পারমু নি? ﴿৩২﴾ যুদি না পারইন, তে হামলা কররা রাজা দুরই থাকতেউ আপোসর লাগি কয়জন তিয়াইত পাঠাইবা। ﴿৩৩﴾ ঠিক অউলা, তুমরার মাজে কেউ যুদি তার হক্কলতার মায়া ছাড়তো না পারে, তে হে আমার উম্মত অইতো পারতো নায়।

﴿৩৪﴾ “নুন তো ভালা জিনিস, অইলে নুনর যুদি স্বাদ নষ্ট অইয়ায়, তে আর নুনতা করা যায় নি? ﴿৩৫﴾ ইতাদি সারও বানাইল যায়না, জমিনো দেওয়া যায় না, এরলাগি মানষে ইতা বারে ফালাই দেইন। হুনর মত যার কান আছে, হে হুনউক।”

আরাইল মেড়ার কিছা

১৫ হজরত ইছার বয়ান হুনর লাগি বউত ঘুষখুর খাজনা তুলরা আর বে-শরিয়তি আম-মানুষ তান গেছে দলা অইলা। ﴿১﴾ ইতা দেখিয়া ফরিশি দলর মানষে আর মৌলানা অকলে কানা-কানি করি কইলা, “ই মানুষগু খালি নাফরমান অকলর লগে উঠা-বওয়া আর খানা-পিনা খায়।”

﴿২﴾ তেউ ইছায় তারারে অউ কিছাইন হুনাইলা। তাইন কইলা, ﴿৩﴾ “মনো করউক্কা, আপনারা কুনু একজনর একশোটা মেড়া আছে। এরমাজর এগু মেড়া আরাই গেলে, হে বাকি নিরান্নব্বইটা বন্দো থইয়া হউ আরাইল অগু তুকানিত যায় না নি? ﴿৪﴾ গিয়া অগু তুকাইয়া পাইলে, খুশিয়ে ইটারে কান্দো করি আনে। ﴿৫﴾ বাদে বাড়িত গিয়া বন্ধু-বান্ধব আর আরি-ফরিরে

কয়, আও, আমার লগে ফুটি কৰো। আমার আরাইল মেড়াগু তুকাইয়া পাইলিছি। ৭ আমি আপনাবারে কইরাম, এক্কেরে অউ লাখানউ, যারা গুনা থাকি তৌবা করার জরুর মনো করে না, ইলা নিরান্নব্বই জন পরেজগার থাকি একজন গুনাগারে মন বদলাইয়া তৌবা করলে, বেহেস্তো আরো বেশি খুশি-বাসি অয়।

আরাইল টেকার কিছা

৮ “বা ধরউক্কা, কুনু এক বেটির গেছে রুপার দশটা টেকা আছিল। এরথাকি এগু টেকা যদি আরাইয়ায়, তে বেটিয়ে হি টেকার লাগি লেম জালাইয়া হুরুইনদি হুরিয়া আস্তা ঘর তুকায় না নি? ৯ বাদে তুকাইয়া পাইলিলে বন্ধু-বান্ধব আর আরি-ফরিরে ডাকিয়া কয়, আওনা, আমার লগে খুশিত সামিল অও। আমার আরাইল টেকাগু তুকাইয়া পাইলিছি। ১০ আমি আপনাবারে কইরাম, এক্কেরে অউ লাখানউ, একজন গুনাগার মানষে মন বদলাইয়া তৌবা করলে, আল্লার ফিরিস্তা অকলে অউলা খুশি করইন।”

আরাইল পুয়ার কিছা

১১ বাদে ইছায় কইলা, “এক গিরস্তর দুই পুয়া আছিল। ১২ একদিন হুরু পুয়ায় তার বাফরে কইলো, বাবা, আমি বাবাইতি জমি-জমা আর ধন-ছামানা যেতা পাইতাম, আমার অউ বাট-খান অখনউ আলগাইয়া দিলাউক্কা। অউ বাফে তান ছামানা দুইও পুয়ার নামে বাটিয়া দিলাইলা। ১৩ এর কয়দিন বাদে হুরু পুয়ায় তার হকল ছামানা বেচিয়া বিদেশ গেলগি। বিদেশ গিয়া বাদ পথে চলিয়া তার টেকা-পয়সা হকলতা খুয়াইলিলো। ১৪ হকলতা খুয়াইয়া হারলে হউ দেশর হকল জাগাত খুব নিদান দেখা দিলো এরদায় হে খুব কষ্টত পড়লো। ১৫ হে হউ দেশর এক গিরস্তর বাড়িত গিয়া চাকরি চাইলো। মালিকে তারে চাকরি দিয়া শূয়রর পাল রাখার লাগি বন্দো পাঠাইলো। ১৬ বন্দো গিয়া শূয়রে যেতা খায়, হেও অতা খাইয়া পেটর ভুক মিটাইতো চাইলো, অইলে অতাও কেউ তারে দিতো না।

১৭ “বাদে আখতা একদিন তার হুশ অইলো। হে মনে মনে কইলো, আমার বাবার বাড়িত তো বউত চাকর-বাকরে পেট ভরি ভাত খাইরা। তে

আমি অনো উপাসে মররাম কেনে? ﴿১৮﴾ আমি গিয়া আমার বাবারে কইমু, বাবা, আমি তো আল্লার গেছে আর তুমার গেছেও নাফরমান বনিগেছি। ﴿১৯﴾ তুমার পুয়া কইয়া আমি আর পরিচয় দিবার লাখ নয়। খালি তুমার চাকরর লাখান আমারে একজরা আশ্রয় দেও। ﴿২০﴾ অখান কইয়া হে তার বাড়িত রওয়ানা দিলাইলো। বাড়ির কান্দাত আইতেউ তার বাফে তারে দেখিলিলা। দেখিয়া তান দিল গলি গেল। তাইন দৌড়িয়া গিয়া তারে আইঞ্জা করি ধরিয়া হুংগা দিলা। ﴿২১﴾ তেউ পুয়ায় কইলো, বাবা, আমি তো তুমার পুয়া কইয়া পরিচয় দিবার লাখ রইছি না। আমি আল্লার গেছে আর তুমার গেছেও নাফরমান বনিগেছি। ﴿২২﴾ অইলে বাফে লগে লগে কামলাইন্তরে কইলা, হই, জলদি করি ঘর থাকি ভালা জুব্বাটা আনিয়া আমার পুয়াগুরে ফিন্দাও। তার আতো আংটি আর পাওত জুতা ফিন্দাই দেও। ﴿২৩﴾ আর হুনো, পালো থাকি তাজা ডেকা-বাহুরগু আনিয়া জবো করো। আও, আমরা হকলে মিলিয়া খুশি-বাসি করি খানা খাই। ﴿২৪﴾ আমার ই পুয়াগু তো মরিগেছিল, অখন হিরবার জিন্দা অইছে। অগু নাই অইগেছিল, অখন ফিরত পাইছি। তেউ হকলে মিলিয়া খুশি-বাসিত লাগলা।

﴿২৫﴾ “অউ সময় বেটার বড় পুয়া বন্দো আছিল। হে বাড়ির কান্দাত আইয়া নাচ-গান আর ডুল-ডপকির আওয়াজ হুনিয়া, ﴿২৬﴾ তারার এক চাকররে জিকাইলো, কিতারে, ইতা কিতা অর? ﴿২৭﴾ চাকরে কইলো, ছাব, আপনার হুরু ভাই বাড়িত আইছইন। আপনার আব্বায় তানরে ছহি-ছালামতে পাইয়া, তাজা অউ ডেকা-বাহুর জবো করছইন। ﴿২৮﴾ ইখান হুনিয়া বড় পুয়ায় গুছা করিয়া বাড়ির ভিতরে আইতো চাইলো না। তেউ তার বাফ বারইয়া আইয়া তারে মিনত কাজ্জি করলা। ﴿২৯﴾ হে তার বাফরে কইলো, দেখউক্কা, আমি অতো দিন ধরিয়া আপনার খেজমত কররাম, কুনুদিনউ আপনার হুকুম উল্টাইছি না। অইলে আমার বন্ধু-বান্ধব লইয়া খুশি করার লাগি এগু বকরির বাইচ্চাও কুনুদিন দিছইন না। ﴿৩০﴾ আর আপনার যে পুয়ায় নটি বেটিন্তর তলে হকল ছামানা খুয়াইছে, হে আইতেউ তাজা ডেকা-বাহুরগু আনিয়া জবো করিলাইলা! ﴿৩১﴾ বাফে কইলা, পুতরে, তুমি তো হামেশাউ আমার লগে আছো। আমার যেতা ছামানা রইছে, ইতা হকলতাউ তো তুমার। ﴿৩২﴾ অখন আমরা হকলে দিল ছাফ করিয়া খুশি-বাসি করা জরুর। তুমার ই ভাই তো মরিউ গেছিল, অখন হিরবার জিন্দা অইছে। অগু এক্কেরে নাই অইগেছিল, অখন ফিরত পাইছি।”

বেইমান মেনেজারর কিছা

১৬

বাদে হজরত ইছায় তান সাগরিদ অকলরে কইলা, “হুনো, কুন্
 এক জমিদারর এক মেনেজার আছিল। অউ মেনেজারর বদনাম
 বারইলো, হে বুলে তার মুনিবর ধন-ছামানা বিনাশ করিলার। ১ বদনাম
 হুনিয়া মুনিবে তারে আনাইয়া কইলা, তুমার নামে ইতা কিতা হুনরাম?
 তুমার হিসাব-নিকাশ হকলতা সমজাই দেও। তুমারে আর চাকরিত রাখতাম
 নায়া। ২ ইখান হুনিয়া মেনেজারে মনে মনে কইলো, অখন আমি কিতা
 করতাম? মুনিবে তো আমারে বিদায় দিলাইরা। আমি তো মাটি কামও
 করতাম পারতাম নায়া, ভিক করতেও শরম লাগে। অখন খাইমু কিলা?
 ৩ আইছা, এক কাম করি, যাতে আমার মেনেজারি গেলেগিও মানষর
 ঘরো আশ্রয় পাই। ৪ অউ হে কিতা করলো, যারার গেছে তার মুনিবর
 পাওনা আছিল, এক-এক করি এরায়ে আনাইলো। আনাইয়া পয়লা জনরে
 কইলো, তুমার গেছে আমার মুনিবর কত পাওনা আছে? ৫ হেইন কইলা,
 একশো মন তেল। মেনেজারে কইলো, জলদি করি তুমার খাতা বার
 করো, আর একশর বদলা পঞ্চাশ মন লেখিলাও। ৬ বাদে মেনেজারে
 দুহরা জনরে জিকাইলো, তুমার গেছে কত পাইন? হেইন কইলা, একশো
 ফুরার গম। মেনেজারে কইলো, তুমার হিসাবো আশি ফুরার লেখিলাও।
 ৭ ইতা হুনিয়া হি জমিদারে অউ বেইমান মেনেজারর তারিফ করলা।
 তাইন কইলা, হে ধান্দাবাজ অইলেও বউত বড় বুদ্ধিমানর কাম করছে।
 তে কিতা মনো করো, ইতায় বুজা যায় না নি, আল্লারাইয়া মানষর আখল
 থাকিও, ই জমানার দুনিয়াবি মানষর পেচ-পাইছা বেশি। ৮ হুনো, আমি
 কিতা কইরাম, তুমরাও নাফরমান অউ জগতর ছামানা দিয়া মানষর লগে
 দুস্তি পাতাও, যাতে ই ছামানা ফুড়াইগেলেও তুমরারে বেহেস্তর বাগানো
 ফুলর মালা দেওয়া অয়।

৯ “যে মানুষ সামাইন্য বেয়াপারে হক-হালাল রয়, হে বড় বেয়াপারেও
 হক-হালাল রয়। অইলে যে জনে সামাইন্য বেয়াপারে বেইমানি করে, হে
 বড় বেয়াপারেও বেইমানি করে। ১০ তে তুমরা যুদি দুনিয়াবি ধন-ছামানার
 বেয়াপারে হক না রও, তাইলে কে তুমরারে বিশ্বাস করিয়া আসল ধন
 দিবো? ১১ পরর ছামানা যুদি তুমরা ঠিক-ঠাক মতো বেবহার করতায় না

পারো, তে কে তুমরার নিজর ছামানা তুমরার আতো দিবো? ﴿১৩﴾ কুন্সু গুলামে একলগে দুই মুনিবর গুলামি করতো পারে না। তে অইলে হে একজনরে ইংসাইবো, আরক জনরে মায়া করব। একজনরে ইজ্জত দিব আর আরক জনরে এলামি করব। তুমরাও অউলা, আল্লাতালা আর ধন-ছামানা দুইওতার গুলামি একলগে করতায় পারতায় নায়।”

﴿১৪﴾ ইখান হুনিয়া ফরিশি মজহবর মানশে ইছারে লইয়া ডং তামশা লাগাইলা, তারা তো টেকা-পয়সারে খুব মায়া করতা। ﴿১৫﴾ ইছায় তারারে কইলা, “তুমরাউ তো মানষর ছামনে নিজর পরেজগারি দেখাও, অইলে আল্লায় তুমরার দিলর খবর জানইন। মানষর গেছে যেতা খুব দামি, আল্লায় ইতারে ঘিন্নাইন। ﴿১৬﴾ হুনো, এহিয়া নবীর সময় পর্যন্ত মুছার শরিয়ত, আর নবী অকলর ছহিফা জারি আছিল। অইলে অখন আল্লার বাদশাইর খুশ-খবরি তবলিগ করা অর, আর মানশেও দিলে-জানে অনো দাখিল অইতা চাইরা। ﴿১৭﴾ ই শরিয়তর একটা হরফ বাতিল অওয়ার চাইতে, আছমান-জমিন বিনাশ অওয়াখান বউত সুজা। ﴿১৮﴾ তে হুনো, যে বেটায় নিজর বউরে তালাক দিয়া আরক বেটিরে হাংগা করে, হে জিনাকুর। অউলা তালাক পাওয়া কুন্সু বেটিরে যেগিয়ে বিয়া করে, হে-ও জিনাকুর।”

লাছার হকির আর এক ধনি মানুষ

﴿১৯﴾ “এক ধনি বেটা আছিল, হে রাজা-বাদশা অকলর লাখান দামি দামি কাপড়-চুপড় ফিনতো, আর হামেশা জাক-জমক করিয়া ফুর্তি-আমোদ করতো। ﴿২০﴾ মানশে লাছার নামর এক হকির বেটারে হামেশা অউ ধনির দুয়ারর ছামনে বওয়াইয়া থইতা, তার আস্তা গতরো পচা-ঘা আছিল, ﴿২১﴾ আর পথর কুত্তাইন্তে আইয়া তার ঘা জিফরাদি লেইতা। অউ ধনিয়ে ভাত খাইয়া হারি আডিড-গুডিড গুড়া-গাড়া যেতা তলে ফালাইতা, অতা খাওয়ার লাগি তার খুব ইচ্ছা আছিল। ﴿২২﴾ একদিন অউ হকির বেটা মরিগেল, মরার বাদে আল্লার ফিরিস্তা অকলে তারে ইব্রাহিম নবীর কুলো নিয়া বওয়াইলা। এরমাজে হউ ধনি বেটাও মরিগেল, তারে দাফন করা অইল। ﴿২৩﴾ বাদে হে দোজখর আজাব থাকি আখতা উপরেদি চাইয়া দেখলো, দুই বেহেস্তর মাজে ইব্রাহিম নবী বই রইছইন, তান কুলো হউ লাছার। ﴿২৪﴾ দেখিয়াউ হে চিল্লাইয়া কইলো, বাবা ইব্রাহিম! আমারে রহম করউক্কা।

লাছাররে আমার গেছে পাঠাউক্কা, হে তার আংগুলির আগাখান পানিত বুড়াইয়া আমার জিফরারে ঠাঙা করউক। দোজখর ই আগুনিত আমার বড় আজাব অর। ﴿১৬﴾ ইব্রাহিমে কইলা, বাবারে, মনো করিয়া দেখো, তুমার সুখ তুমি দুনিয়াতউ কামাইলিছো, আর লাছারে বউত কষ্ট করছে। অখন ইনো আইয়া হে আরামে আছে, আর তুমি আজাবো আছ। ﴿১৭﴾ হুনো, ইতা ছাড়াও তুমরার আর আমরার মাজে অখন বউত বড় ফাখ রাখা অইছে। ইনর কেউ ইচ্ছা করলেও তুমরার গেছে যাইতো পারতো নায়, আর তুমরাও কেউ ইচ্ছা করলে ইনো আইতায় পারতায় নায়। ﴿১৮﴾ অউ হি ধনি বেটায় কইলো, বাবা, তে দয়া করি লাছাররে আমার বাবার বাড়িখানো পাঠাউক্কা। ﴿১৯﴾ হনো আমার আরো পাচগু ভাই রইছইন। হে গিয়া আমার ভাইয়াইনরে হুশিয়ার করউক, তারা যানু ই দোজখর আজাব থাকি বাচইন। ﴿২০﴾ ইব্রাহিমে জুয়াপ দিলা, তারার গেছে তো হজরত মুছা আর নবী অকলর উছিলায় বউত কিতাব বেজা অইছে, তারা অউ তালিম হুনউক। ﴿২১﴾ হউ ধনিয়ে কইলো, না, না, বাবা ইব্রাহিম! মুর্দা থাকি কেউ জিন্দা অইয়া তারার গেছে গেলেউ, তারা তোঁবা করবা। ﴿২২﴾ ইব্রাহিমে কইলা, তারা যুদি হজরত মুছা আর নবী অকলর কথা না হুনে, তে মুর্দা থাকি জিন্দা অইয়া গেলেও তারা মানতো নায়।”

নানান বেয়াপারে নছিয়ত

১৭ হজরত ইছায় তান সাগরিদ অকলরে কইলা, “গুনর পথে নেওয়ার লাগি উছকানি আইবোউ আইবো। অইলে লান্নত হউ জনর উপরে, যেগিয়ে গুনা করার লাগি উছকানি দেয়। ﴿১﴾ অউ বেবুজ অকলর একজনরেও যেগিয়ে গুনার পথে টানিয়া নেয়, অগুর লাগি আরো ভালা অইলোঅনে, অগুর গলাত পাথর বান্দিয়া দরিয়াত ফালাই দেওয়া। ﴿২﴾ তুমরাও যারযির বেয়াপারে হুশিয়ার রইও। তুমার কুনু ভাইয়ে তুমার গেছে দুষ করলে তারে বুজাইও। হে দিল বদলাইয়া মাফ চাইলে তারে মাফি দিও। ﴿৩﴾ হে দিনর মাজে সাতবার দুষ করিয়া, সাতবার আইয়া তুমার গেছে মাফ চাইলে, তারে মাফ করি দিও।”

﴿৪﴾ সাহাবি অকলে হজরত ইছার গেছে আবদার করলা, “হুজুর, আমরার ইমানি বল বাড়াই দেউক্কা।” ﴿৫﴾ তাইন কইলা, “তুমরার দিলো

যদি এগু ডেংগার বিছির পরিমান ইমান থাকে, আর তুমরা অউ হেওরা গাছরে কও, জড় সুদ্বা হুরিয়া গিয়া দরিয়াত গাড়িয়াও, তে হে তুমরার কথা হুনবো।

৭ “তুমরার মাজে ইলা কুনু গিরন্তু আছেনি, যার কামলায় আল-বাইয়া বা গরু রাখিয়া বন্দো থাকি বাড়িত আইতেউ, হে তার কামলারে কয়, তুমি জলদি আইয়া খানা খাও? ৮ না, কেউ ইলা কয় না। বরং অউলা কয়, ওবা, তুই আমার খানা জুইত কর। আমি যত সময় খানা খাই, তুই অনো উবাইয়া ভালামন্তে আমারে বাতাস দে। বাদে তুই খাইছ। ৯ আর হউ গুলামে তান হুকুম মানছে করি তাইন তারে কুনু ধইন্যবাদ দেইন নি? নিচয় না। ১০ অউ লাখান তুমরাও হকল হুকুম-আহকাম আদায় করলেও কইও, মালিক, আমরা তো তুমার নালায়েক গুলাম। আমরা যেতা কাম করা জরুর আছিল, খালি অতাউ কুনু রকমে আদায় করছি।”

দশজন পচা-কুষ্ঠ বেমারিরে শিফা করা

১১ হজরত ইছা জেরুজালেম টাউনো যাওয়ার বালা শমরিয়া আর গালিল জিলার মাজেদি আটিয়া যাইরা। ১২ অউ সময় এক গাউত হামানির পথর মুখো দশজন পচা-কুষ্ঠ বেমারিয়ে তানরে দেখাত আইলা। তারা দুরই উবাইয়া জুরে জুরে কইলা, ১৩ “ও হুজুর ইছা, আমরাে রহম করউক্বা।” ১৪ তারারে দেখিয়া তাইন কইলা, “যাও, ইমাম ছাব অকলরে গিয়া তুমরার হালত দেখাও।”

পথেদি যাইতে যাইতে তারা হকলর বেমার কমিগেল। ১৫ তারার মাজে একজনে যেবলা দেখলো, হে ভালা অইগেছে, দেখিয়াউ জুরে জুরে আল্লার তারিফ করি করি হে ফিরিয়া আইলো। ১৬ আইয়া ইছার পাওত পড়িয়া তানরে শুরিয়া জানাইলো। হে অইলো শমরিয়া জাতির মানুষ।

১৭ তেউ ইছায় কইলা, “দশো জনরেউ কুনু ভালা করা অইছে না নি? তে বাকি নয়জন কুয়াই? ১৮ আল্লার তারিফ করার লাগি অউ বিদেশি বেটা ছাড়া আর কেউ ফিরিয়া আইলো না নি?” ১৯ বাদে ইছায় তারে কইলা, “ভাই, তুমার ইমানর বলেউ তুমি ভালা অইছো। অখন ছহি-ছালামতে যাও।”

কিয়ামতর আলামত

২০ ফরিশি মজহবর কয়জন আইয়া হজরত ইছারে জিকাইলা, আল্লায় কুন সময় তান বাদশাই চালু করবা। তাইন কইলা, “আল্লার বাদশাই তো কেউররে জানাই-হুনাই আয় না। ২১ কেউ কওয়ার সাইধ্য নাই, আল্লার বাদশাই অনো বা হনো দেখছি। হুনউক্কা, আল্লার বাদশাই তো অখনউ আপনারার মাজে চালু আছে।”

২২ বাদে তান সাগরিদ অকলরে কইলা, “অমন এক সময় আইবো, যেবলা তুমরা আমি বিন-আদমর এখন দিন দেখতায় চাইবায়, অইলে পারতায় নায়। ২৩ মানষে তুমরারে কইবা, অনো দেখো, হনো দেখো। অইলে তুমরা তারার কথায় দৌড়িও না, কুনুখানো যাইও না। ২৪ হুনো, মেঘর জিলকির লগে আছমানর একমাথা থাকি আরক মাথা যেবলা ফর অয়, অউ সময় তো হকলে দেখে। তে আমি বিন-আদম যেবলা আইমু হউ সময়ও অলা হকলে দেখবো। ২৫ অইলেও পয়লা ই জমানার মানষর আতো আমি বউত কষ্ট পাইতাম অইবো, তারা আমারে দুৱ-দুৱ করবা।

২৬ “যেলা নুহ নবীর আমলো অইছিল, আমি বিন-আদমর জমানাতও অলা অইবো। ২৭ নুহ নবী জাজো উঠার আগ পর্যন্ত মানষে খানা-পিনা, বিয়া-শাদি আর ঘর-সংসার করতা, নুহ নবীর বইন্যা আইয়া ইতারে নিপাত করলো। ২৮ অউলা লুত নবীর আমলোও মানষে খানা-পিনা, খরিদ-বিকি, খেত-গিরিস্তি আর বাড়ি-ঘর বানানিত বেস্তো আছিল। ২৯ অইলে লুত নবী যেদিন ছাড়ুম টাউন ছাড়িয়া বিদায় অইগেলা, হউ দিনউ আছমান থাকি আগুইন আর গন্ধকর গজব লামিয়া ইতা হকলটিরে নিপাত করলো। ৩০ ঠিক অউলা, আমি বিন-আদম যেদিন জাইরা অইমু, হউদিনও অলা আখতা আইবো।

৩১ “হিদিন কেউ যুদি ঘরর চালর উপরে থাকে, তে তার ঘরর মাল-ছামানা নিবার লাগি, লামাত লামিয়া ঘরর ভিতরে না হামাউক। অউ লাখান কেউ যুদি বন্দো থাকে, হে-ও আর বাড়িত না আউক। ৩২ লুত নবীর বিবির ঘটনা ইয়াদ করো। ৩৩ মনো রাখিও, যে জনে জান বাচাইতো চায়, হে নিজর জিন্দেগি খুয়াইবো, অইলে যে জনে জান সপিয়া দেয়, হে জিন্দেগি পাইবো। ৩৪ হি রাইত একই বিছনাত দুইজন হুতিলেও, একজনরে নেওয়া

অইবো, দুছরা জন বাদ পড়িষিবো। ৩৫-৩৬ দুই বেটিয়ে একলগে বারা-বানাথ থাকলেও, এয়ার একজনরে নেওয়া অইবো, আরক জন বাদ পড়িষিবো।”

৩৭ সাহাবি অকলে কইলা, “হুজুর, ইতা কুয়াই অইবো?” তাইন জুয়াপ দিলা, “মরা লাশ যেখানো, হকুনও হনো দলা অয়।”

নিরাশ অইও না, হামেশা মুনাজাত কৰো

১৮

মুনাজাতর বেয়াপারে সাগরিদ অকল নিরাশ না অইয়া হামেশা যাতে মুনাজাত করইন, অখান বুজানির লাগি ইছায় এক কিছা হুনাইলা। ৩৮ কইলা, “কুনু এক টাউনো একজন হাকিম আছিল। এইন আল্লারেও ডরাইতা না, কুনু মানষরেও তোয়াক্কা করতা না। ৩৯ হউ টাউনো এক ডাড়ি বেটি আছিল। অউ বেটিয়ে আইয়া হামেশা তানরে কইতো, হাকিম ছাব, আমারে দুশমনর আত থাকি বাচাউক্কা, দয়া করি অউ ন্যায্য বিচার খান করউক্কা। ৪০ ই হাকিমে কয়দিন কুস্তা কইলা না। বাদে মনে মনে কইলা, আমি তো আল্লারে ডরাইনা, মানষরেও তোয়াক্কা করি না, ৪১ অইলে ই ডাড়িয়ে আইয়া তো হামেশা ছাতায়, অখন অগুর ন্যায্য বিচার খান করিলাই। নাইলে তাই আইয়া বার-বার ছাতাইবো।”

৪২ বাদে হুজুরে কইলা, “দেখলায়নি, অউ নাফরমান হাকিমে কিতা করছে? ৪৩ তে যেরা হামেশা দিনে-রাইতে আল্লার গেছে কান্দে, আল্লায় কিতা তান ই মায়ার বন্দা অকলর হক ফরিয়াদ হুনতা নায় নি? তাইন হুনতে কুনু আর দেরি করবা নি? ৪৪ আমি কইরাম, তাইন জলদি করিউ এয়ার হক ফরিয়াদ হুনবা। অইলে আমি বিন-আদম দুছরা বার যেবলা ই দুনিয়াত আইমু, হউ সময় দুনিয়াত কুনু ইমান পাইমু নি?”

ফরিশি আর খাজনা তুলরার দোয়া

৪৫ যেতা মানষে নিজরে খুব পরেজগার, আর বাদ-বাকি হকল মানষরে হুরু মনো করতো, হজরত ইছায় তারারে অউ কিছা হুনাইলা। ৪৬ কইলা, “দুইজন মানুষ দোয়া করার লাগি বায়তুল-মুকাদ্দছো গেল। এয়ার একজন ফরিশি দলর আর দুছরা জন ঘুষখুর খাজনা তুলরা। ৪৭ ফরিশি বেটায় আলগা উবাইয়া অউলা দোয়া করলো, ও আল্লা, আমি তুমার শুরিয়্যা আদায়

কররাম, আমি তো সমাজর মানষর লাখান নাফরমান, জালিম, আর জিনাকুর নায়, বা অউ ঘুষখুর খাজনা তুলরার লাখানও নায়। ১২ আমি হাশ্তাত দুইদিন রোজা রাখি, আর আমার হক্কল রুজির দশবাটর এক বাট তুমার নামে যকাত দেই। ১৩ অইলে অউ খাজনা তুলরা বেটায় দুরই উবাই রইলো, আল্লার আরশর বায় চউখ তুলার সাওসও তার অইলো না। হে বুকুত মারি-মারি কান্দি-কান্দি কইলো, ও আল্লা, আমি বড় গুনাগার, আমারে রহম করো।

১৪ “আমি তুমরারে কইরাম, অউ খাজনা তুলরা বেটাউ পরেজগার বনিয়া তার ঘরো গেল, হি ফরিশি নায়। আসলে যে নিজরে বড় মনো করে, তারে হুরু করা অইবো। আর যে নিজরে হুরু মনো করে, তারে বড় করা অইবো।”

হুরুতাইন্তর লাখান বনিয়াও

১৫ মানষে তারার হুরু হুরুতাইন্তরে লইয়া ইছার গেছে আইলো, তইন যানু হুরুতাইন্তরে আতাই দিয়া দোয়া করইন। ইতা দেখিয়া সাহাবি অকলে মানষর উপরে বিরক্ত অইয়া না করলা। ১৬ অইলে ইছায় হুরুতাইন্তরে তান কান্দাত নিলা, নিয়া কইলা, “হুরুতাইন্তরে আমার কান্দাত আইবার দেও, তারারে বাধা দিও না। আল্লার বাদশাই তো অউ নমুনার মানষর লাগিউ। ১৭ আমি হক কথা কইয়ার, হুরু হুরুতা বনিয়া আল্লার শাসন না মানলে, কনু জনউ আল্লার বাদশাইত হামাইতো পারতো নায়।”

হজরত ইছার গেছে এক ধনি

১৮ হজরত ইছার গেছে পাঞ্চগইতর এক মুরব্বি আইলা, আইয়া কইলা, “ও হক উস্তাদ, আমারে বাতাই দেউক্লা, কিতা করলে আমি আখের পাইমু?”

১৯ ইছায় কইলা, “আমারে কেনে হক কইরা? খালি এক আল্লা বাদে আর কেউ হক নায়। ২০ আপনে তো শরিয়তর হুকুম-আহকাম জানইন,

জিনা করিও না।

খুন করিও না।

চুরি করিও না।

মিছা কনু সাক্ফি দিও না।

তুমার মা-বায়রে ইজ্জত করিও।”

❧ হি মুরব্বিয়ে কইলা, “হুজুর, ই হকলতা তো হুরুমান থনেউ আদায় কররাম।”

❧ ইখান হুনিয়া ইছায় কইলা, “অখন খালি এখান কাম বাকি আছে, আপনার হকল ধন-ছামানা বেচিয়া গরিব অকলরে লিল্লা দিলাউক্কা। তেউ আপনে বেহেস্তো ধন পাইবা। বাদে আইয়া আমার উম্মত অউক্কা।” ❧ ইখান হুনিয়া হি মুরব্বি খুব বেজার অইগেলা, তাইন আসলে বউত বড় ধনি আছলা। ❧ তাইন বেজার অইগেছইন দেখিয়া ইছায় কইলা, “ধনি মানুষ আল্লার বাদশাইত হামানি বড় মশকিল। ❧ ধনি মানুষ আল্লার বাদশাইত হামানির চাইতে, ছুইর না’ বায়দি উট হামানি আরো সুজা।”

❧ ইখান যারা হুনলা, তারা আরজ করলা, “তে আর খেগিয়ে রেহাই পাইবো?” ❧ তাইন কইলা, “মানষর গেছে যেতা অসম্ভব, আল্লার গেছে তো ইতা সম্ভবা।”

❧ অউ সময় পিতরে কইলা, “হুজুর, আমরা তো হকলতা ফালাই থইয়া আপনার উম্মত অইছি।” ❧ তেউ ইছায় সাহাবি অকলরে কইলা, “আমি তুমরারে হাছা কথা কইরাম, আল্লার বাদশাইর লাগি যেরা নিজর বাড়ি-ঘর, মা-বাফ, বউ, পুয়া-পুড়ি, ভাই-বিরাদর, ফালাইয়া আইছে, ❧ তারা অউ দুনিয়াতউ এর বউত বেশি পাইবা, আর বাদর জিন্দেগিত আখেরও পাইবা।”

হজরত ইছার মউতর তিন নম্বর আগাম খবর

❧ বাদে ইছায় তান বারোজন সাহাবিরে ধারো বওয়াইলা। বওয়াইয়া কইলা, “হুনো, আমরা অখন জেরুজালেমো যাইরাম, তে আমি বিন-আদমর বেয়াপারে নবী অকলে যততা লেখিয়া গেছইন, ইতা অখন পুরা অইবো। ❧ আমারে বিধমী জাতির আতো সপি দেওয়া অইবো। মানষে লইয়া ডং-তামশা করবা, বেইজ্জত করবা, আর থু-থু করি মুখো ছেফ দিবা। ❧ আমারে চাবুক মারবা বাদে কাতল করবা। মউতর তিন দিনর দিন আমি হিরবার জিন্দা অইয়া উঠমু।” ❧ অইলে তান সাহাবি অকলে অউ মাতর কুন্ ভেদ বুজলা না। তাইন কিতা কইরা তারা সমজিতা পারলা না, কারন তারার গেছে গোপন রাখা অইছিল।

আন্দা হকিরে ভালা করা

ইছা যেবলা যিরিহো টাউনর কান্দাত আইলা, অউ সময় এক আন্দা বেটায় পথর কান্দাত বইয়া ভিক করাত আছিল। আখতাউ বউত মানষর পাওর তালি হুনিয়া বেটায় জিকাইলো, “কিতাবা, কিতা অর?” মানষে কইলা, “নাছারতর ইছায় অউ পথেদি তশরিফ নিরা।” অউ হে চিল্লাইয়া উঠলো, “ও দাউদর আওলাদ ইছা, আমারে দয়া করউক্কা।” চিল্লানি হুনিয়া ভিড়র ছামনর কাতারর মানষে তারে ধমক দিলা, “চুপ করো, নিরাই রও।” অইলে হে আরো জুরে চিল্লাইয়া কইলো, “ও দাউদর আওলাদ, আমারে রহম করউক্কা।”

তেউ ইছা উবাই গেলা। উবাইয়া আন্দা বেটারে তান কান্দাত আনাইলা। বেটা ধারো আইয়া হারলে তাইন জিকাইলা, “কিতাবা, তুমারে কিতা করতাম?” বেটায় কইলো, “হুজুর, আমি খালি চউখে দেখতাম চাই।”

ইছায় তারে কইলা, “আইছা তে দেখো। তুমার ইমানর বলেউ তুমি ভালা অইলায়।”

লগে লগেউ বেটার চউখ খুলি গেল, দেখার শক্তি পাইলো। বেটায় আল্লার শুরিয়া আদায় করি করি তান খরে অইয়া রওয়ানা দিলাইলো। ইতা দেখিয়া হকল মানষে আল্লার তারিফ করলা।

ধনি জাকিরর তৌবা

হজরত ইছা যিরিহো টাউনর মাজেদি আটিয়া যাইরা, হনো জাকির নামর বড় এক ধনি মানুষ আছিল। এইন অইলা খাজনা তুলরা অকলর পরধান। ইছারে দেখার লাগি তান খুব খাইশ আছিল, অইলে তাইন বাট্টি মানুষ, এরদায় অতো ভিড়র মাজে দেখার উপায় অইলো না। অউ দৌড়িয়া আগেদি গেলা, গিয়া ইছা যে পথেদি আইরা অউ পথর কান্দার এক ডুমুর গাছো উঠলা। ইছা যেবলা হউ ডুমুর গাছর তলে আইলা, তাইন উপরেদি চাইয়া জাকিররে ডাক দিলা, “জাকির, জলদি লামিয়া আও। আমি আইজ তুমার বাড়িত রইতে অইবো।”

৬ জাকির লগে লগেউ লামিয়া আইলা। তাইন খুশি অইয়া ইছারে তাজিম করিয়া তান বাড়িত নিলা। ৭ ইতা দেখিয়া হকলে কানা-কানি করি কইলা, “তাইন কেনে এক নাফরমান বেটার বাড়িত রাইত কাটানিত গেলা?”

৮ জাকিরে হকলর ছামনে উবাইয়া কইলা, “হুজুর দেখউক্কা, আমি অখনউ আমার ধন-ছামানার অর্ধেক গরিবরে লিল্লা দিলাইরাম। আর যেরার হক টগিয়া আনছি, তারারে চাইর অতখান ফিরত দিলাইমু।” ৯ তেউ ইছায় কইলা, “আইজ থাকি ই বাড়িত নাজাত আইছে। এইনও তো ইব্রাহিমর খান্দানর একজন। ১০ অউ লাখান বে-পখি অকলরে তুকাইয়া বার করিয়া, তারারে বাচানির লাগিউ তো আমি বিন-আদম ই দুনিয়াত আইছি।”

রাজা আর দশ গুলামর কিছা

১১ হজরত ইছায় তারার লগে অতা মাতিরা, অউ সময় তাইন জেরুজালেম থাকি থুড়া দুরই রইছইন। তারা মনো করলা, জেরুজালেম পৌছিয়াউ তাইন আল্লার বাদশাই জাহির করিলিবা। এরলাগি ইছায় তারারে অউ কিছা হুনাইলা, ১২ “নবাব পরিবারর একজন বেটা মানুষ বউত দুরই এক দেশো সফরো গেলা। তান খিয়াল আছিল হনো গিয়া রাজা অইয়া ফিরত আইবা। ১৩ যাইবার আগে তান দশজন গুলামরে আনিয়া পরতেক জনরে একটা করি সোনার মহর দিয়া কইলা, আমি আইবার আগ পর্যন্ত অগুইনদি তুমরা কায়-কারবার করো।

১৪ “অইলে তান প্রজা অকলে তানরে পছন্দ করতা না। এরলাগি তারা তান খরে অইয়া গুইয়া পাঠাইয়া হউ বাদশারে জানাইলা, আমরা চাই না, এইন আমরা রাজা অউক্কা। ১৫ অইলেও তাইন রাজা বনিয়া ফিরত আইলা। আইয়া হউ যে দশজন গুলামরে তাইন মহর দিছলা, তারারে আনাইয়া জিকাইলা, কায়-কারবার করিয়া তারা কে কত লাভ করছইন। ১৬ পয়লা জনে আইয়া কইলো, হুজুর, আপনার এক মহরদি আমি দশ মহর রুজি করছি। ১৭ রাজায় তারে কইলা, ভালা করছো! তুমি তো ভালা গুলাম, তুমি খুব সামাইন্য বেয়াপারেও হক আছো। তে তুমি অউ দশ পরগনার উপরে জমিদারি করো। ১৮ দুহুরা জনে কইলো, হুজুর, আপনার মহরদি আমি পাচ মহর রুজি করছি। ১৯ তাইন কইলা, তুমিও পাচ পরগনার উপরে জমিদারি করো। ২০ বাদে আরক জনে কইলো, হুজুর,

অউ নেউক্লা, আপনার হি মহর। আমি আপনারে ডরাইয়া আপনার মহর রুমালো বান্দিয়া থই দিছি। ২১ আপনে তো কড়া মিজাজর মানুষ। জমানা করিয়াও আদায় করইন, খেত না করিয়াও ফসল কাটইন।

২২ “তেউ রাজায় কইলা, ও খবিছ গুলাম! তোর মুখর কথায় আমি তোর বিচার করমু। তুই তো জানছউ আমি কড়া মিজাজর মানুষ, জমানা করিয়াও আদায় করি, খেত না করিয়াও ফসল কাটি! ২৩ তে আমার মহর তুই বেপারির গেছে থইলে না কেনে? তে তো আমি আইয়া মুল মহরর লগে কিছু লাভও পাইলাম অনে। ২৪ রাজায় তান উজির-নাজিররে কইলা, অগুর গেছ থাকি অউ মহর ফিরত আনো, আর যার দশ মহর আছে তারে দেও। ২৫ তেউ হকলে কইলা, হুজুর, তার তো এমনেউ দশ মহর আছে। ২৬ রাজায় কইলা, আমি তুমরারে কইরাম, যার আছে তারে আরো দেওয়া অইবো। যার নাই, তার যেতা আছে অতাও কাড়িয়া নেওয়া অইবো। ২৭ আর আমার যেতা দুশমনে চাইছইন না আমি রাজা অইতাম, অতারে অনো ধরিয়া আনিয়া আমার ছামনে মারিলাও।”

জেরুজালেম টাউনো হজরত ইছা
(১৯:২৮-২১:৩৮)

হজরত ইছা জেরুজালেমো হামাইলা

২৮ অখান কইয়া হরি ইছায় তারার আগে অইয়া জেরুজালেমর বায় তশরিফ নিলা। ২৯ তাইন জয়তুন পাড়র কান্দাত বায়ত-ফাইজ্জা আর বায়ত-আনিয়া গাউর গালাত আইয়া হারলে, তান দুইজন সাহাবিরে অখান কইয়া পাঠাইলা, “তুমরা অউ ছামনর গাউত যাও। ৩০ গাউত হামাইয়াউ দেখবায়, এগু গাধার বাইচ্চা বান্দা আছে। অগুর উপরে কেউ কুনুদিন চড়ছে না। তুমরা অগুর বান খুলিয়া অনো লইয়া আইও। ৩১ কেউ যদি জিকায়, ইগুর বান খুলো কেনেবা? তে কইও, হুজুরর গরজ আছে।”

৩২ যে সাহাবি অকলরে পাঠাইছলা, তারা গিয়া তান কথামত হকলতা পাইলা। ৩৩ তারা যেবলা গাধার বাইচ্চার বান খুলরা, অউ সময় মালিকে জিকাইলা, “ওবা, দড়ি খুলরায় কেনে?” ৩৪ তারা কইলা, “হুজুরর গরজ

আছে করি খুলরাম।” ৩৫ বাদে গাধার বাইচা লইয়া ইছার কান্দাত আইয়া, এরার গতরর চাদ্দরদি গাধার পিঠিত গদি বানাইয়া ইছারে বওয়াইলা। ৩৬ তাইন যেবলা গাধা চড়িয়া পথেদি রওয়ানা দিলা, পথর মাজে মানষে তারার যারযির চাদ্দর বিছাই দিলা।

৩৭ ইছা জেরুজালেমর কান্দাত জয়তুন পাড় থনে লামার পথো আইয়া আজিলা, অউ সময় তান উম্মত অকলও লগে আছলা, এরা তান যেতা কেলামতি কাম দেখছিল্লা, অতার লাগি তারা খুশিয়ে জুরে জুরে চিল্লাইয়া আল্লার তারিফ করিয়া কইলা,

৩৮ “মুবারক হউ বাদশা, যেইন মাবুদর নামে তশরিফ আনরা।
বেহেস্তো শান্তি, আল্লার আরশো গৌরব!”

৩৯ ভিড়র মাজে ফরিশি দলর কয়জনে ইছারে কইলা, “হুজুর, আপনার উম্মত অকলরে ধমক দেউক্কা।” ৪০ ইছায় কইলা, “আমি আপনারারে কইরাম, এরার মুখ বন্দ করিল্লেও, পাথর অকলে চিল্লাইয়া উঠবো।”

৪১ তাইন যেবলা জেরুজালেমর কান্দাত আইলা, অউ সময় জেরুজালেম টাউন দেখিয়া কান্দি দিলা। ৪২ তাইন কইলা, “হায়রে হায়! আইজ যুদি তুমি বুজতায়, শান্তি কিলা কাইম অয়! অইলে অখন ইতা তুমার চখুর আওড়ে রইছে। ৪৩ তুমার উপরে ইলা সময় আজির অইবো, যেবলা দুশমন অকলে দেওয়ালর চাইরো গালাবায় মাটির টেকি বান্দিবো। তুমারে বেরিলিবো, আর হক্কলবায় আটক করবো। ৪৪ তারা তুমারে আর তুমার পেটর আওলাদ অকলরে মাটির লগে মিশাইবো। তুমার এক পাথরর উপরে আরক পাথর রইতো নায়। কারন আল্লায় তুমারে বাচাইতা করি যে সুযোগ দিছইন, তুমি ই সময়-সুযোগরে চিনলায় না।”

জেরুজালেমর কাবা শরিফো হজরত ইছা

৪৫ বাদে তাইন বায়তুল-মুকাদছো হমাইলা। হমাইয়া হনো যেতায় ব্যবসা করাত আছলা, অতা হক্কলটিরে খেদাই দিলা। ৪৬ তাইন কইলা, “পাক কালামো লেখা আছে, আমার ঘর অইবো মুনাজাতর ঘর, অইলে তুমরা ইখানরে ডাকাইতর আখড়া বানাইলিছো।”

৪৭ হজরত ইছা পরতেকদিন বায়তুল-মুকাদছো গিয়া নছিয়ত করতা। অউ সময় বড় ইমাম, মৌলানা আর সমাজর মুরক্বি অকলে তানরে মারিলিতা চাইলা। ৪৮ অইলে কিলা তানরে মারা যায়, এর কুনু ফন্দি তারা পাইলো না। কারন হকল মানষে আশিক অইয়া দিলে-জানে তান বয়ান হুনতা।

হজরত ইছা দুশমনর মুকাবিলা অইলা

২০

অউ সফরর কালো একদিন হজরত ইছা বায়তুল-মুকাদছর মাজে, মানষর গেছে আল্লাই খুশ-খবরি তবলিগ করাত আছলা। আখতাউ বড় ইমাম আর আলিম অকল তারার মুরক্বি অকলরে লইয়া আইয়া কইলা, ১ “আচ্ছা কওছাইন, তুমি কুন খেমতায় ইতা কাম কররায়, তুমারে ইতার এখতিয়ার খেগিয়ে দিছে?” ২ ইছায় জুয়াপ দিলা, “তে আমিও আপনাইন্তরে জিকাইরাম, কউক্বাছাইন, ৩ এহিয়া নবীয়ে তৌবার গোছল করানির খেমতা পাইছলা, মানষর গেছ থাকি না আল্লার গেছ থাকি?”

৪ অউ তারা একে-অইন্যে যুক্তি-পরামিশ করলো, “যুদি কই আল্লার গেছ থাকি, তে হে কইবো, তাইলে তান উপরে ইমান আনলায় না কেনে? ৫ আর যুদি কই মানষর গেছ থাকি, তে মানষে আমরারে পাথরদি মারবা। এহিয়ারে তো তারা আল্লার নবী কইয়া মানইন।”

৬ অউ তারা কইলো, “ই খেমতা কুয়াই থাকি পাইছলা, আমরা জানি না।” ৭ ইছায় তারারে কইলা, “তে আমিও কইতাম নায়, কুন খেমতায় ইতা কররাম।”

আংগুর বাগান বাগিদারর কিছা

৮ বাদে ইছায় মানষরে অউ কিছা হুনাইলা, “এক গিরস্তে আংগুরর বাগান করলা, বাদে তান বাগানরে খেতাল অকলর গেছে বাগি দিয়া বউত দিনর লাগি বিদেশ গেলাগি। ৯ আংগুর পাকার সময় অইলে মালিকে তান বাট নিবার লাগি এক গুলামরে পাঠাইলা। অইলে খেতাল অকলে তারে মাইর-ধইর করিয়া খালি আতে ফিরাই দিলো। ১০ বাদে তাইন আরক গুলামরে পাঠাইলা। তারা ই গুলামরেও মাইর-ধইর করি বেইজ্জত করিয়া খালি

আতে ফিরাই দিলো। ১২ বাদে তিন নম্বর গুলামরে পাঠাইলে, তারা এও গুলামরে মারিয়া জখম করিয়া বারে ফালাই দিলো। ১৩ তেউ বাগানর মালিকে কইলা, আমি কিতা করতাম? অখন আমি আমার মায়ার পুতরে পাঠাইমু, তেউ তারা মানতো পারে। ১৪ অইলে মালিকর পুয়ারে দেখিয়া খেতাল অকলে কইলো, অউ পুয়াউ তো তার বাফর হকলতার মালিক অইবো। আও, এরে মারিয়া ফালাই দেই। তেউ মালিকর হকলতা আমরা পাইলিমু। ১৫ অখান কইয়া হারি তারে বাগানর বারে নিয়া খুন করিলাইলো।

“অখন কউক্লা ছাইন, বাগানর মালিকে ই বাগিদার অকলরে কিতা করবা? ১৬ তাইন আইয়া তারারে নিপাত করিলিবা না নি? আর তান বাগান দুছরা মানষর গেছে দিবা না নি?” ইতা হুনিয়া তারা কইলা, “নাউজুবিল্লা! আল্লায় ফানা দেউক!”

১৭ তেউ ইছায় তারার বায় চাইয়া কইলা, “তে আল্লার কালামো কেনে ইলা লেখা আছে,

রাজ মেস্তইর অকলে যে পাথররে বেকামা কইয়া ফালাই দিছিল,
অকটা দিয়াউ ঘরর ইয়ান খুটি অইলো।

১৮ ই পাথরর উপরে কেউ পড়লে, ই জন ভাংগিয়া টুকরা টুকরা অইযিব, আর ই পাথরও কেউরর উপরে পড়লে, হে-ও জন চুরমার অইযিব।”

১৯ অখান হুনিয়াউ মৌলানা আর বড় ইমাম অকলে ইছারে ধরিলতা চাইলা। তারা বুজিলিলা, ইছায় ই কিচ্ছা তারার নিয়তেউ কইরা। অইলে মানষরে ডরাইয়া তারা কুস্তা করলা না।

বাদশার খাজনা দেওয়া জাইজ নি

২০ এরলাগি তারা ইছারে চউখে-চউখে রাখলা, তান খরে কয়জন গুইয়া লাগাইলা। গুইয়া অকলে মুমিনি বেশ ধরিয়া চললেও, তারার নিয়ত অইলো ইছারে কথার ফান্দো ফালাইতা, যাতে তানে দেশর পরধান হাকিমর আদালতো চালান করাইল যায়। ২১ অউ গুইয়া অকলে ইছারে কইলা, “হুজুর, আপনে তো হকলরে হমান চউখে দেখইন। আপনে হক মাত মাতইন, হক তালিম দেইন। কেউররে তোয়াক্কা না করিয়া, মানষরে

আল্লার হক পথ দেখাইন। ২২ তে কউক্কা ছাইন, রোমান বাদশা কৈছররে খাজনা দেওয়া জাইজ নি, না নাজাইজ?”

২৩ ইছায় তারার কু-মতলব বুজিলিলা। বুজিয়া কইলা, ২৪ “দেখি, আমারে একটা দিনার দেখাও।” দিনার দেখিয়া কইলা, “ইগুর উপরে কার ছবি আর নাম আছে?” তারা কইলা, “বাদশা কৈছরর।” ২৫ ইছায় কইলা, “তে কৈছররতা কৈছররে দেও, আর আল্লারতা আল্লারে দেও।”

২৬ তান জুয়াপ হুনিয়া তারা তাইজ্জুব বনিয়া নিরাই অইগেলা। গুইয়া অকলে মানষর ছামনে তানরে কথার ফান্দো ফলাইতো পারলো না।

আখেরাতর বেয়াপারে প্রশ্ন

২৭ বাদে সিদ্দেকিয়া মজহবর কিছু মানুষ ইছার গেছে আইলা। অউ মজহবর মানষে মনো করইন, মরার বাদে কুন্সু জানদারউ আর জিন্দা অইতা নায়।

২৮ তারা ইছারে জিকাইলা, “হুজুর, মুছা নবীয়ে আমরার লাগি অউ নিয়ম লেখিয়া গেছইন, কুন্সু মানষে তার বউ থইয়া নিআওলাদি হালতে মরিগেলে, তার ভাইয়ে অউ বউরে বিয়া করিয়া মরা ভাইর ওয়ারিশ পয়দা করবো।

২৯ অখন মনো করউক্কা, এক ঘরো সাত ভাই আছিল। পয়লা জনে বিয়া করিয়া নিআওলাদি হালতে মরিগেল। ৩০-৩১ বাদে দুই নম্বর আর তিন নম্বর ভাইয়ে অউ বেটিরে বিয়া করলো। অউ লাখান তারা সাতো ভাইয়েউ অউ বেটিরে বিয়া করিয়া নিআওলাদি হালতে মরিগেল। ৩২ হেশে অউ বেটিও মরিগেল। ৩৩ তে কিয়ামতর দিন ই বেটি কার বউ অইবো? সাতো জনেউ তো ই বেটিরে বিয়া করছিল।”

৩৪ ইছায় কইলা, “ই দুনিয়ার মানষে বিয়া-শাদি করইন, আর বিয়া-শাদি দেইন। ৩৫ অইলে মউতর বাদে জিন্দা অইয়া ঘেরা আখেরাতো কামিয়াবির লাখ অইয়ায়, তারা আর বিয়া-শাদি করতা নায়, বা বিয়া-শাদি বইতাও নায়। ৩৬ তারার কুন্সু মউতও অইতো নায়, তারা ফিরিস্তার লাখান অইযিবা। মউতর বাদে আখের পাওয়ায় তারা আল্লা পাকর আওলাদ বনিযিবা। ৩৭ তুর পাড়র জালাইল জংলার বয়ানির মাজে মুছা নবীয়ে বুজাইছইন, মুর্দা অকল তো জিন্দা অইয়া উঠইন, এরলাগিউ বউত আগে যে নবী অকল মারা গেছইন মুছায় মাবুদরে হউ নবী অকলর আল্লা কইয়া ডাকিলা। তাইন মাবুদরে কইলা, ইব্রাহিমর আল্লা, ইসহাকর আল্লা আর

ইয়াকুবর আল্লা। ৩৮ তে আল্লা তো মুর্দা অকলর আল্লা নায়, তাইন জিন্দা অকলর আল্লা। তান নজরো হক্কল মানুষট জিন্দা আছইন।”

৩৯ তেউ কয়জন আলিমে কইলা, “হুজুর, আপনে তো খাটি মাত মাতছইন।” ৪০ হেশে তারা ইছারে আর কুনু ছওয়াল করার সাওস পাইলো না।

আলিম অকলরে হেদায়ত

৪১ এরমাজে ইছায় অউ আলিম অকলরে জিকাইলা, “মানষে কেনে আল-মসীরে দাউদ নবীর আওলাদ কইন? ৪২-৪৩ জবুর শরিফর মাজে দাউদে নিজেউ তো অখান কইরা,

মাবুদে আমার মুনিবরে কইলা,
যতদিন তুমার দুশমন অকলরে
তুমার পাওর তলে না ফালাই,
অতো দিন তুমি আমার ডাইন গালাত বইরও।

৪৪ দাউদে তো আল-মসীরে তান মুনিব কইয়া ডাকিলা, তে আল-মসী কেমনে দাউদর আওলাদ অইবা?”

৪৫ মানষে ইছার বয়ান হুনরা, অউ সময় তাইন সাগরিদ অকলরে কইলা, ৪৬ “আলিম অকলর বেয়াপারে হুশিয়ার অও। তারা লাম্বা-লাম্বা জুব্বা ফিন্দিয়া ঘুরিতে খুব ভাল পাইন। বাজার-আটো গিয়া ছালাম পাইতে পছন্দ করইন। মছিদো গিয়া ছামনর কাতারো বইতে আর মজলিছো গিয়া দামি জাগাত বইতে পছন্দ করইন। ৪৭ তারা মানষরে দেখানির লাগি লাম্বা-লাম্বা দোয়া করইন। হিরবার ডাড়ি বেটিস্তর ঘর-বাড়ি দখল করইন। কিয়ামতর দিন এরার বড় কঠিন সাজা অইবো।”

ডাড়ি বেটির দান-খয়রাত

২১ হজরত ইছায় চাইয়া দেখলা, ধনি অকলে বায়তুল-মুকাদ্দছর লিল্লার ডেগর মাজে দান-খয়রাত দিরা। ৪৮ এরমাজে দেখলা, খুব গরিব এক ডাড়ি বেটিয়েও আইয়া ডেগর মাজে দুইটা পয়সা দান

করলো। ৩ দেখিয়া তান সাহাবি অকলরে কইলা, “আমি তুমরাে হাছা কথা কইরাম, অউ গরিব ডাড়ি বেটিয়ে হকল থাকি বেশি দান করছে। ৪ কারণ বাকি হকলে খরচ করার বাদে যেতা দেড়িয়া রইছে, অন থাকি থুড়া অংশ ডেগর মাজে দান করছে। অইলে ই বেটিয়ে নিজর অভাব-অনটন থাকলেও, তাইর কামাইল হকলতাউ দান করিলিছে।”

কিয়ামতর আগর আলামত

৫ কয়জন সাহাবিয়ে বায়তুল-মুকাদছ কাবা শরিফর বেয়াপারে মাতিলা, কইলা, “দেখরানি, অতো সুন্দর সুন্দর পাথরদি আর দান-খয়রাতদি ঘরখানরে হাজাইল অইছে।” ৬ ইছায় তারারে কইলা, “তুমরা অউ যততা দেখরায়, অলা এক দিন আইবো, যেবলা ইতা এক পাথরর উপরে আরক পাথর রইতো নায়। হকলতা মাটির লগে মিশিযিবো।”

৭ সাহাবি অকলে তানরে জিকাইলা, “হুজুর, ইতা কুন জমানাত অইবো? কুন আলামত দেখলে বুজা যাইবো, হি সময় অইগেছে?” ৮ তাইন কইলা, “হুশিয়ার রইও, কেউ যানু তুমরাে বে-পথে না নেয়। বউত জনে আমার নাম ধরি আইয়া কইবো, সময় অইগেছে, আমিউ আল-মসী। অইলে তুমরা ইতার খরে যাইও না। ৯ তুমরা যেবলা যুদ্ধ আর গন্ডগোলর খবর হুনবায়, ডরাইও না। কারণ পয়লা ইতা অইবোউ অইবো, অইলে ইতা তো শেষ নায়।”

১০ বাদে তাইন কইলা, “জাতিয়ে জাতির বিপক্ষে, রাজায় রাজার বিপক্ষে যুদ্ধ করবো। ১১ বড় বড় ভৈছাল অইবো, জাগায় জাগায় নিদান আর বেজুইতা বেমার-আজারে মানুষ মরবা। আছমানোও খুব ডর-খফর নিশানা আর আজব-আজব কুদরতি লিলা জাহির অইবো।

১২ “অইলে ইতা ঘটর আগে মানষে তুমরাে খেদাইবো, ধরবো। বিচারর লাগি মজলিছর ছামনে আজির করবো, জেলো হারাইবো। আমার নামর লাগি তুমরাে রাজা-বাদশা আর হাকিম অকলর ছামনে নেওয়া অইবো। ১৩ তেউ আমার নামে তবলিগ করার লাগি তুমরা সুযোগ পাইবায়। ১৪ অইলে তুমরা মনো রাখিও, কিতা জুয়াপ দিতায়, ইতা আগে চিন্তা করার কুনু জরুর নায়। ১৫ কারণ আমি তুমরাে অউলা জবান আর হেকমত যুগাইয়া দিমু, তুমরার বিপক্ষ অকলে ইতা ফিরাইতো পারতো

নায়, এর জুয়াপ দিবারও তাক্কত অইতো নায়। ১৬ তুমরার মা-বাফ, ভাই-বিরাদর, খেশ-কুটুম আর দুস্ত অকলেও তুমরারে ধরাইয়া দিবা। তারা তুমরার কুনু কুনু জনরে জানে মারাইলিবা। ১৭ আর আমার নামর লাগি তুমরারে হকলে ঘিন্নাইবো। ১৮ অইলেও কুনুমন্তেউ তুমরার মাথার একছা চুলরও খেতি অইতো নায়। ১৯ তুমরা ইমানে মজবুত রইলে, নিজর হাছারর জিন্দেগি হাছিল করবায়।

২০ “তুমরা দেখবায়, সিপাই অকলে আইয়া চাইরোবায় খনে জেরুজালেমরে ঘেরাও করিলিরা, তেউ বুজিলিও, জেরুজালেমর বিনাশ আইছে। ২১ হি সময় যারা এহুদিয়া জিলাত থাকবা, তারা পাড়েদি গিয়া বাগউক। যারা অউ জেরুজালেমো থাকবা, তারা টাউনর বারে যাউক। যারা গাউ গেরামো থাকবা, তারা যানু কুনুমন্তেউ টাউনো না আইন। ২২ কারন ই অখত অইলো আল্লাই গজবর অখত, আল্লার কালামর আয়াত অকল পুরা অইবার অখত। ২৩ ইস! ই সময় যেতা বেটিস্তর পেটো হুরুতা থাকবা, যেরা হুরুতারে বুকুর দুখ খাওয়াইবা, এরার বউত কষ্ট অইবো! দেশর উপরে বেজুইতা দুর্গতি, আর ইহুদি অকলর উপরে গজব নাজিল অইবো।

২৪ তলোয়ারর তলে তারা জান খুয়াইবা, বন্দি আইয়া হকল জাতির মাজে যাইবা। অউ বিধমী জাতির খেমতার সময় পুরা অওয়ার আগ পর্যন্ত, ই জেরুজালেম তারার পাওর তলে রইবো।

২৫ “চান-সুরুজ আর আছমানর তেরার মাজে নানান আলামত দেখা যাইবো। দুনিয়ার হকল দেশর মানষর কষ্ট অইবো। দরিয়ায় উতাল-পাতাল করবো। চেউর আওয়াজে মানুষ বেদিশা লাগবা। ২৬ দুনিয়াত কুন দশা ঘটিবো অতা চিন্তা করিয়া ডরর চুটে মানুষ বেউশ অইযিবো, আছমানি চান-সুরুজ, তেরা হকলতা আউলা-জাউলা অইযিবো। ২৭ অউ সময় দেখবায়, আমি বিন-আদমে আল্লার কুদরতি শক্তি আর নুরর মহিমায় মেঘর চাকাত আইয়া দুনিয়াত তশরিফ আনিয়ার। ২৮ ইতা হাল-হকিকত দেখলে তুমরা মজবুত অইও, মাথা উচা করিও, বুজিলিও তুমরার নাজাত ধারো আইছে।”

২৯ ইছায় তারারে অউ মিছাল হুনাইলা, কইলা, “তুমরা ডুমুরর গাছ আর অইন্য গাছাইস্তর বায় দেখো, ৩০ ইতার নয়া কুড়ি-পাতা বারনি দেখলেউ তুমরা বুজিলাও, গরমর দিন আইছে। ৩১ অউলা তুমরা য়েবলা দেখবায়, ইতা হাল-হকিকত ঘটের, তে বুজিলিও আল্লার বাদশাই নজদিক আইছে। ৩২ আমি তুমরারে হাছাউ কইরাম, ইতা হকলতা না ঘটার আগে, ই জমানার

মানুষ ক্ষয় অইতা নায। ﴿٣٣﴾ আছমান-জমিন ক্ষয় অইযিবো, অইলে আমার কালাম কুনুদিনও ক্ষয় অইতো নায।

﴿٣٤﴾ “তুমরা নিজে হুশিয়ার রইও, যাতে মজার মজার খানি, মদ খাইয়া টাল অওয়া আর রুজি-রোজগারর নেশায় আউলা-জাউলা না অও, আরনায় হউ দিন আইয়া আখতাউ তুমরারে ফান্দো হারাইতো পারে। ﴿٣٥﴾ দুনিয়ার তামাম মানষর উপরেউ হি দিন আজির অইবো। ﴿٣٦﴾ অইলে তুমরা হামেশা হজাগ রইও, আর দোয়া করিও, যাতে অউ যেতা জাহির অইবো অতা পারইয়া হারি আমার ছামনে উবানির বল পাও।”

﴿٣٧﴾ ইছায় পরতেক দিন বায়তুল-মুকাদছো আইয়া নছিয়ত করতা। বাদে রাইত অইলে তাইন বারইয়া জয়তুন পাড়ো যাইতাগি। ﴿٣٨﴾ হকল মানষে তান বয়ান হুনর নিয়তে বিয়ান-ছবরে বায়তুল-মুকাদছো আইতা।

হজরত ইছার দুখ-কষ্ট আর মউত (২২:১-২৩:৫৬)

হজরত ইছা আল-মসীরে কাতল করার ফন্দি

২২ ইহুদি অকলর খামির ছাড়া রুটির ইদ কাছাত আইলো, অউ ইদর নাম আজাদি ইদ। ﴿٣٩﴾ ইবায় মৌলানা আর বড় ইমাম অকলে পরামিশ করলা, হজরত ইছারে আম মানষর গেছ থাকি লুকাইয়া কিলা কাতল করতা। তারা আম মানষরে খুব ডরাইতা।

ইহুদা ইষ্কারিয়াতর বেইমানি

﴿٤٠﴾ অউ সময় তান বারোজন সাহাবির মাজর একজন, এন নাম ইহুদা ইষ্কারিয়াত, এন ভিতরে শয়তান হামাইলো। ﴿٤١﴾ এইন ইছারে ধরাইয়া দেওয়ার লাগি লুকাইয়া বায়তুল-মুকাদছো গেলা। গিয়া হনর দারোগা আর বড় ইমাম অকলর লগে পরামিশ করলা, কুন নমুনায় ইছারে তারার আতো ধরাই দেওয়া যায়। ﴿٤٢﴾ তেউ ইমাম অকল খুব খুশি অইয়া ওয়াদা করলা, তানরে ধরাইয়া দিলে তারে বখশিশ দিবা। ﴿٤٣﴾ এতে ইহুদাও রাজি অইয়া মানষর আফরখে, তানরে ধরাই দেওয়ার সুযোগ তুকানিত রইলো।

হজরত ইছার আখেরি মেজবানি

৭ বাদে আজাদি ইদ আইলো, অউ ইদর দিন মেড়ার বাইচা কুরবানি দেওয়া অয়। ৮ তেউ ইছায় সাহাবি পিতর আর হান্নানরে হুকুম দিলা, “তুমরা গিয়া আমরার লাগি ইদর খানি তিয়ার করো, আমরা হকল আইয়া একলগে খাইমু।” ৯ এরা জিকাইলা, “হুজুর, আপনার খিয়াল কিতা, আমরা কুনানো গিয়া খানা তিয়ার করতাম?” ১০ তাইন কইলা, “হুনো, টাউনো হামাইয়া হারলে তুমরা দেখবায়, এক বেটায় পানির খৈলা ভরিয়া লইয়া যাইরা। তুমরা এন খরে খরে যাইও, গিয়া এইন যে ঘরো হামাইবা, ১১ হউ ঘরর মালিকরে কইও, হুজুরে জিকাইছইন, তান সাহাবি অকলরে লইয়া আজাদি ইদর খানি যে ঘরো খাইতা, ই মুছাফির খানা কুয়াই? ১২ হে তুমরারে উপরর তালাত হাজাইল-পাড়াইল বড় এক কুঠা দেখাইয়া দিব। হনো গিয়া তুমরা রান্দা-বাড়া করিও।” ১৩ হাছাউ তারা গিয়া তান কথা মাফিক হকলতা পাইলা, পাইয়া আজাদি ইদর খানিও তিয়ার করলা।

১৪ বাদে সময় আইলে ইছায় তান বারো জন সাহাবি লইয়া খানিত বইলা। ১৫ বইয়া কইলা, “আমার বড় খিয়াল আছিল মহিবতর মুখা-মুখি আইবার আগে, আখেরি ইদর খানি খান তুমরারে লইয়া খাইতাম। ১৬ আমি তুমরারে কইরাম, আল্লার বাদশাইর আসল মর্জি-মুনশা পুরাপুর হাছিল না অওয়া পর্যন্ত, আমি আর কুনু ইদর খানি খাইতাম নায়া।”

১৭ বাদে তাইন শরবতর পিয়ালা লইয়া আল্লার শুকরিয়া জানাইয়া কইলা, “অউ ফুটাইন তুমরা বাটিয়া খাইলাও। ১৮ আর হুনো, আমি তুমরারে কইরাম, আল্লার বাদশাই না অওয়া পর্যন্ত, আমি আর আংপুরর কুনু শরবত খাইতাম নায়া।”

১৯ এরবাদে রুটি আতো লইয়া আল্লার শুকরিয়া জানাইলা। রুটি টুকরাইয়া সাহাবি অকলরে দিলা, কইলা, “মনো করিও ইটা আমার কায়া, অউ কায়া আমি তুমরার লাগি সপি দিমু। আমারে মনো করার লাগি তুমিতাইনও অলা করিও।

২০ খাওয়ার বাদে শরবতর পিয়ালা আতো লইয়া কইলা, “আমার লউর জরিয়ায় আল্লার লগে মানষর মিলনর যে নয়া উছিলা নাজিল অর, অউ পিয়ালা আইলো এর নিশানা। আমার অউ লউ তুমরার নাজাতর লাগি

দিমু। ২১ তে দেখরায়নি! আমরা যেগিয়ে ধরাইয়া দিবো, হে অখন আমার লগে অউ দস্তারখানাত বইয়া খার। ২২ আল্লায় যেলা হুকুম করছইন, আমি বিন-আদমর মউত তো অলাউ অইবো। হায়রে হায়! লান্নতি হউ আদম, যেগিয়ে আমরা ধরাইয়া দিবো।” ২৩ সাহাবি অকলে একে-অইন্যরে জিকাইলা, “তে আমরার মাজর কুন মানষে ইলা কাম করব?”

কুন জন হকল থাকি বড়

২৪ অউ সময় সাহাবি অকলর মাজে কুন জন হকল থাকি বড়, অতা লইয়া তারার মাজে তর্কা-তর্কি লাগিগেল। ২৫ তেউ ইছায় তারারে কইলা, “বিধমী দেশর রাজা অকলে তারার প্রজার উপরে মুনিবগিরি দেখাইন। তারার জমিদাররে কওয়া অয় জনগনর দুস্ত। ২৬ অইলে তুমরা ইলান অইও না। তুমরার মাজে যেইন হকল থাকি বড়, এইন হকলর হুরু অউক। আর যেইন নেতা, এইন খাদিমদারর লাখান অউক। ২৭ কওছাইন কুন জন বড়? যেইন খানা খাইন, না যে খাদিমদারি করে? যেইন খানা খাইন এইনউ নায় নি? তে আমি নিজেউ তো তুমরার খাদিমদারি করিয়ার।

২৮ “হুনো, আমার হকল বালা-মছিবতো তুমরা আমার লগে লগে আছলায়। ২৯ আর আমার বাতুনি বাফে আমারে যেলা গদি আর খেমতা দান করছইন, আমিও অউলা তুমরারে খেমতা দান কররাম। ৩০ অউ খেমতা পাইয়া, তুমরাও আমার বাদশাইত দাখিল অইয়া আমার লগে বইয়া খানা-পিনা খাইবায়, আমার লগে গদিত বইয়া বনি ইসরাইলর বারো গুপ্তির বিচার-আদালত করবায়।

হজরত পিতরর বেয়াপারে আগাম খবর

৩১ “সাইমন, সাইমন, হুনো, খান-চাউল যেলা চাইনদি চানিয়াইন, শয়তানেও তুমরারে অলা চানিয়াইতো চাইছে। ৩২ অইলে তুমার লাগি আমি আরজ করছি, তুমার ইমান যানু কমজুর না অয়। তে তুমি একবার গেলেগিও তৌবা করিয়া যেবলা ফিরত আইবায়, অউ সময় তুমার অউ ভাইয়াইন্তর ইমানি বলও মজবুত করিও।” ৩৩ পিতরে কইলা, “হুজুর, আমি তো আপনার লগে অইয়া জেলো যাইতে, বা জান দিতেও তিয়ার আছি।”

৩৪ তাইন কইলা, “পিতর, আমি তুমারে কইরাম, আইজ পতাবালা মুরগায় বাং দিবার আগেউ, তুমি তিন-তিনবার কইবায়, তুমি আমারে চিনো না।”

৩৫ বাদে তান সাহাবি অকলরে জিকাইলা, “কওছাইন, আমি যেবলা তুমরারে টেকার থলি, গাইট-বুছকি ইতা কুস্তা না দিয়া খালি পাওয়ে পাঠাইছলাম, হি সময় তুমরার কুস্তার অভাব অইছিল নি?” তারা কইলা, “জি-না, কুনু অভাব অইছে না।” ৩৬ ইছায় কইলা, “তে অখন আমি কই, অখন যার টেকার থলি বা গাইট-বুছকি আছে, হে অতা লগে রাখউক। যার তলোয়ার নাই, হে তার চাদ্দর বেচিয়া তলোয়ার খরিদ করউক। ৩৭ পাক কালামর আয়াতো তো লেখা আছে, তনরে নাফরমান অকলর কাতারো মিলাইল অইবো। ই আয়াত তো আমার উপর দিয়াউ ফলিবো। আমার বেয়াপারে যততা লেখা আছে, ইতা হক্কলতা অখন ফলিয়ার।” ৩৮ তেউ সাহাবি অকলে কইলা, “হুজুর দেখউক্কা, ইনো দুখান তলোয়ার আছে।” তাইন কইলা, “অতাউ তো বউত।”

জয়তুন পাড়ো হজরত ইছার তকলিফ

৩৯ খানা-পিনার বাদে ইছা বারইয়া বরাবরকুর লাখান হউ জয়তুন পাড়ো গেলা, সাহাবি অকলও তান খরে খরে গেলা। ৪০ হনো গিয়া হারলে ইছায় তারারে কইলা, “তুমরা দোয়া করো, যাতে কুনু পরিম্কাত না পড়ো।” ৪১ কইয়া হারি সাহাবি অকলর গেছ থাকি চাইর নল পরিমান দুরই গিয়া, জানু পাতিয়া দোয়া করাত বইলা। ৪২ তাইন কইলা, “বেহেস্তি বাবা, তুমার ইচ্ছা অইলে মছিবতর ই পিয়ালাটা আমার গেছ খনে হরাইলাও। অইলে আমার ইচ্ছায় নায়, তুমার ইচ্ছায়উ অউক।” ৪৩ তেউ বেহেস্ত থাকি এক ফিরিস্তা আইয়া ইছারে দরশন দিয়া তান বল বাড়াইলা। ৪৪ বাদে তাইন মনর দুখে পেরেশান বনিয়া আরো কাতর অইয়া দোয়া করলা। এরলাগি তান গতরর ঘাম লউর ফুটার লাখান মাটিত পড়তো লাগলো। ৪৫ দোয়া শেষ করিয়া সাহাবি অকলর কান্দাত আইয়া দেখলা, মনর দুখে কাতর অইয়া তারা ঘুমাই গেছইন। ৪৬ দেখিয়া তারারে কইলা, “ঘুমাইরায় কেনে? উঠিয়া দোয়া করো, যাতে পরিম্কাত না পড়ো।”

৪৭ ইছা মাতো রইছইন, অউ সময় আখতাউ হিকানো বউত মানুষ আইলা। এরার হক্কলর আগে আছিল ইহুদা, হে ইছার বারোজন সাহাবির

মাজর একজন। ইহুদায় তানরে হুংগা দিবার লাগি কান্দাত আইলো।
 ৪৮ ইছায় তারে কইলা, “ইহুদা, আমি বিন-আদমরে হুংগা দিয়া ধরাই দিরায়ে নি?”

৪৯ অউ সময় ইছার কান্দাত যেরা আছলা, তারা বুজিলিলা কিতা অর। বুজিয়া কইলা, “হুজুর, অতারে আমরার তলোয়ারদি মারতাম নি?”

৫০ কইয়াউ এক সাহাবিয়ে তলোয়ারদি ছেদ মারি পরধান ইমামর গুলামর ডাইনর কান কাটিলিলা। ৫১ অইলে ইছায় কইলা, “বাদ দেও, আর মারিও না।” অখান কইয়া তাইন হি গুলামর কান আতাই দিয়া তারে ভালা করিল্লা।

৫২ হজরত ইছারে আটক করাত যতো বড় ইমাম, বায়তুল-মুকাদছর দারোগা, আর মুরব্বি অকল আইছলা, ইছায় তারারে জিকাইলা, “মানষে চুর-ডাকাইত ধরতে যেলা লাঠি-ছুলফি লইয়া যাইন, তুমরা আমারে ধরাত অউলা আইছো নি? ৫৩ আমি তো পরতেক দিনউ বায়তুল-মুকাদছো তুমরার ছামনে আছলাম, হি সময় আমারে ধরলায় না কেনে? ও, অখন নিচয় তুমরার সময়, আন্দাইরর রাজত্ব চালু আইছে।”

হজরত পিতরর অস্বীকার

৫৪ দুশমনর দলে ইছারে আটক করিয়া পরধান ইমামর বাড়িত লইয়া গেলাগি। সাহাবি পিতর দুই হরি হরি ইছার খরে অইয়া গেলা। ৫৫ উঠানর মাজে বাক্বা মানষে আগুইন ধরাইয়া থাবানিত লাগলা, পিতরও অনো আইয়া শরিক অইলা। ৫৬ অউ সময় এক বান্দি বেটিয়ে আগুনির ফরর মাজে পিতররে দেখিয়া ভালা করি চাইয়া কইলো, “অউ বেটাও হগুর লগে আছিল।”

৫৭ পিতরে কইলা, “না বেটি, আমি এরে চিনিউ না।” ৫৮ খুড়া বাদে আরক জনে পিতররে দেখিয়া কইলো, “তুমিও অতার লগর একজন।”

তাইন কইলা, “না-বা, আমি নায়।” ৫৯ আরো একদ ঘণ্টা বাদে আরক জনে বড় গলায় কইলো, “অয়, অয়, অগুও এর লগে আছিল, এ-ও তো গালিলর মানুষ।” ৬০ তাইন কইলা, “দুর বেটা! তুমি ইতা কিতা মাতো, কুস্তা বুজি না।”

পিতরে অতা কইরা, এরমাজে আখতাউ মুরগায় বাং দিলাইলো।

৬১ তেউ ইছায় মুখ ফিরাইয়া পিতরর বায় চাইলা। চাইতেউ পিতরর মনো

অইগেলগি, হুজুরে তো আগেউ কইছলা, “আইজ পতাবালা মুরগায় বাং দিবার আগেউ, তুমি তিন বার কইবায়, তুমি আমারে চিনো না।” ৬২ তেউ পিতর বারে গিয়া খুব কান্দন কান্দিলা।

দেশর ফতোয়া কমিটির ছামনে হজরত ইছা

৬৩ হজরত ইছারে ধরিয়া আনিয়া পারাদার অকলে তানরে ঠাট্টা-মশকরা আর মাইর-ধইর করলো। ৬৪ তান চউখ বান্দিয়া কইলো, “হই, তুই বলে নবী, তে অখন গাইবি কওছাইন, তোরে খেগিয়ে মারলো?” ৬৫ অউলা আরো বউততা কইয়া তানরে বেইজ্জত করলো।

৬৬ রাইত পুয়ানির বাদে দেশর ফতোয়া কমিটির মুরক্বিয়ান, বড় ইমাম আর আলিম অকল দলা অইলা, আর ইছারে তারার ছামনে আনাইয়া ৬৭ কইলা, “তুমি যুদি আল্লার ওয়াদা করা হউ আল-মসী অও, তে আমরা কও।” ইছায় কইলা, “আমি কইলেও তো তুমিতাইন একিন করতায় না। ৬৮ কুস্তা জিকাইলেও জুয়াপ দিতায় না। ৬৯ অইলে আমি বিন-আদম অখন থাকিউ আরশে-আজিমো আল্লার ডাইনর কুরছিত বইমু।” ৭০ তেউ হক্কে জিকাইলো, “তে তুমিউ কিতা আল্লার খাছ মায়ার জন ইবনুল্লা নি?” তাইন কইলা, “অয়, তুমিতাইনউ তো কইরায়, আমিউ হেইন।” ৭১ তেউ তারা হক্কে কইলো, “তে আর সায়-সাম্বিদি কিতা করতায়? আমরা নিজর কানেউ তো তার জবানবন্দি হুনলাম।”

রোমান হাকিমর ছামনে হজরত ইছা

২৩

তারা হকলে একলগে দল বান্দিয়া ইছারে লইয়া রোমান হাকিম পিলাতর গেছে গেলা। ২ গিয়া ইছার বিপক্ষে নালিশ দিলা। তারা কইলা, “আমরা দেখছি, অউ বেটায় আমরার দেশর মানষরে বিগড়াই দেৱ, হে মানষরে নিষেধ করে আমরার বাদশা কৈছররে খাজনা দিতা না। হে নিজেউ বলে আল-মসী নামর এক বাদশা।” ৩ পিলাতে ইছারে জিকাইলা, “তুমি কিতা ইহুদি অকলর বাদশা নি?” তাইন জুয়াপ দিলা, “আপনে যেলা কইন, অলাউ।” ৪ তেউ পিলাতে বড় ইমাম আর হকল মানষরে কইলা, “আমি তো ই আসামির কুনু দুষউ পাইরাম না।”

৫ অইলে তারা জিদ করিয়া কইলো, “ই বেটায় গালিল জিলা থাকি আরন্ত করিয়া আস্তা এহুদিয়া জিলার মানষরে বিগড়াইয়া, অখন আমরার অনো আইয়াও হক্কলরে বিগড়াইলার।”

৬ ইখান হুনিয়া পিলাতে জিকাইলা, “হে কিতা গালিলর মানুষ নি?”

৭ হাকিমে য়েবলা হুনলা, ইছার বাড়ি অইলো রাজা হেরোদর অধীনর গালিল জিলাত, হুনিয়া তাইন ইছারে হেরোদর গেছে পাঠাই দিলা, কারন হেরোদও অউ সময় জেরুজালেমো আছিল।

৮ ইছারে দেখিয়া হেরোদ খুব খুশি অইলা। তাইন বউত দিন ধরি ইছারে দেখতা চাইরা। আগে তাইন ইছার বেয়াপারে বউততা হুনছিল, এরলাগি তান মনর আশা আছিল, ইছায় তানরে কুনু কেরামতি-মোজেজা দেখাইবা।

৯ তাইন ইছারে বউত নমুনার প্রশ্ন করলা, অইলে ইছায় ইতার কুনু জুয়াপ দিলা না। ১০ আদালতো উবাইয়াও বড় ইমাম আর মৌলানা অকলে খুব গরম অইয়া ইছার বিপক্ষে নালিশ হুনানিত রইলা।

১১ এরলগে হেরোদে আর তান সিপাই অকলেও ইছারে ঠাট্টা-মশকরা, বেইজ্জতি করলা, হেশ-মেশ তানরে বাদশাই চকচকা লেবাহ ফিন্দাইয়া হাকিম পিলাতর গেছে ফিরত পাঠাই দিলা। ১২ এর আগে রাজা হেরোদ আর হাকিম পিলাতর মাজে দুশমনি আছিল, অইলে অউ দিন থাকিউ তারার মাজে দুস্তি অইগেল।

১৩ বাদে পিলাতে বড় ইমাম, মুরকিব অকল, আর আম মানষরে এখানো দলা করিয়া, ১৪ কইলা, “অউ আসামিরে তুমরা ধরিয়া আনিয়া আমার গেছে নালিশ দিলায়, হে হক্কল মানষরে বিগড়াইলার, অইলে আমি তো তুমরার ছামনেউ তারে জেরা করলাম, তে তুমরা য়েলা নালিশ দিছো, তার মাজে তো ইলা কুনু দুষউ পাইলাম না। ১৫ আর রাজা হেরোদেও নিচয় তার কুনু দুষ পাইছইন না, এরলাগিউ তাইন তারে আমার গেছে ফিরত পাঠাইছইন। আমি দেখরাম, মউতর সাজার জুকা কুনু দুষউ হে করছে না। ১৬ তে আমি তারে ছিংলাদি মারিয়া ছাড়ি দিমু।” ১৭ আসলে হাকিম পিলাতর রেওয়াজও আছিল, তাইন আজাদি ইদর অখতো একজন কয়দিরে খালাছ দিতা।

১৮ অইলে মানষে একলগে চিল্লাইয়া কইলো, “না, না, অগুরে মারিলাও। বারাক্বারে ছাড়ি দেও।” ১৯ অউ বারাক্বারে আগে জেলো হারাইল অইছিল, হে জেরুজালেম টাউনো খুন আর সন্তাস করছিল। ২০ অইলে পিলাতে ইছারে

ছাড়ি দেওয়ার নিয়তে হিরবার তারার লগে বাতচিত করলা। ২১ তা-ও তারা একলগে চিল্লাইয়া উঠলো, “অগুরে সলিবো দেও, সলিবো দেও।” (সলিব অইলো লাখড়িদি বানাইল মানষের লটকাইয়া মারার এক জিনিস।) ২২ পিলাতে তিন-তিনবার তারারে জিকাইলা, “কেনে? ই আসামিয়ে কিতা দুষ করছে? মউতর সাজার জুকা তার কুনু দুষউ আমি পাইরাম না। আমি খালি ছিংলাদি মারিয়া তারে ছাড়ি দিমু।” ২৩ অইলে তারা মাইরমুখি অইয়া, চিল্লাইয়া, মিছিল লাগাইলা, “অগুরে সলিবো লটকাও, সলিবো লটকাও।” চিল্লানির চুটে তারার দাবি পুরা অইলো। ২৪ তারার দাবি মাফিকউ পিলাতে রায় দিলাইলা। ২৫ তাইন হজরত ইছারে তারার বদ খাইশ মাফিক তারার আতো ছাড়ি দিলা আর হউ খুনি-সল্লাসিরে খালাছ দিলাইলা।

সলিবর উপরে হজরত ইছা আল-মসীর মউত

২৬ হাকিমর রায় পাইয়া সিপাই অকলে ইছারে কাতল করাত লইয়া যাইরা। অউ সময় সাইমন নামর কুরিনিয়ার একজন মানুষ গাউ থাকি টাউনো আওয়াত আছিল। তারা অউ বেটারে ধরিয়া লাখড়িদি বানাইল সলিব তার কান্দো তুলিয়া দিয়া কইলো, হে অগু লইয়া ইছার খরে খরে যাইতো। ২৭ ইছার খরে খরে বউত মানুষ আছিল, এরার লগে বউত বেটিনও আছিল। তারা তান লাগি বিলাপ আর আহাজারি করিয়া বুকুত থাবাইয়া কান্দন লাগাইলা। ২৮ অইলে ইছায় তারার বায় চাইয়া কইলা, “ও জেরুজালেমর মাই অকল, আমার লাগি কান্দিও না। তুমরা নিজর লাগি আর নিজর পুয়া-পুড়ির লাগি কান্দো। ২৯ হুনো, অমন এক দিন আইবো, যেবলা মানষে কইবা আটখুরা বেটিনউ বড় কপালি। যেরার কুনু হুরুতাউ অইছে না, বুকর দুধও কুনুদিন খাওয়াইছে না, তারাউ কপালি। ৩০ হি সময় মানষে বড় বড় পাড়রে কইবো, তুমরা আইয়া আমরার উপরে পড়ো। পাড়র টিল্লা অকলরে কইবো, আমরারে লুকাইয়া রাখো। ৩১ তুমরা দেখরায় না নি, তাজা-গাছরেউ ইতায় অউ হালত কররা, তে হুকনা গাছর কুন দশা অইবো।”

৩২ হজরত ইছার লগে করি মারার লাগি সিপাই অকলে দুইজন দাগি আসামিরে লইয়া আইলো। ৩৩ বাদে মাথার-খুলি নামর জাগাত আনিয়া, তারা ইছারে আর হউ দুইও দাগি আসামিরে গাছর টুকরাদি বানাইল

সলিবো লটকাইলো, একজনরে তান ডাইন গালাত, আরক জনরে বাউ গালাত লটকাইলো। ৩৪ অউ সময় ইছায় কইলা, “বাবা, এরােরে মাফ করি দিলাও। তারা তো বুজের না তারা ইতা কিতা করেৱা।”

বাদে তারা তান কাপড়-চুপড় নিতা করি লটারি মারিয়া বাটা-বাটি করলা। ৩৫ বউত মানষে উবাইয়া ইতা দেখলা, অইলে তারার মুরকি অকলে ইছারে টিটকারি মারিয়া কইলা, “হে তো বউত মানষর জান বাচাইতো, হে যুদি হাছাউ আল্লার ওয়াদা করা হউ আল-মসী অয়, তে অখন তার নিজর জানও বাচাউক।” ৩৬ রোমান সিপাই অকলেও তানরে লইয়া মশকারি করলো, তারা টেংগা আংগুরর শরবত লইয়া তান কান্দাত গিয়া, ৩৭ কইলা, “তুমি যুদি ইহুদি অকলর হাছারর বাদশা অও, তে অখন নিজর জান বাচাওনা।” ৩৮ তান মাথার উপরে এখান সাইনবোর্ড লাগাইল অইলো, হনো লেখা আছিল, “হে ইহুদির বাদশা।”

৩৯ অউ সময় তান লগে আরো যে দুইজন আসামিরে সলিবো লটকাইল অইছিল, অতা একজনে তানরে টিটকারি মারিয়া কইলো, “তুমি বুলে হউ আল-মসী? তে অখন আমরাে আর তুমােও বাচাওনা।” ৪০ অখান হুনিয়া দুছরা জনে এরে ধামকি দিয়া কইলো, “তুমি কিতা আল্লােও ডরাও না নি? তুমিও তো অউ হমান সাজা পাইয়া। ৪১ আর আমরা তো পাইরাম আমরার উচিত সাজা, আমরা যেলান কাম করছি অউলান পাইরাম। অইলে এইন তো কনু দুষউ করছইন না।” ৪২ বাদে হে কইলো, “ও ইছা, আপনে ফিরিয়া আইয়া যেবলা নিজে বাদশাই করবা, অউ সময় খানো আমাে ইয়াদ রাখইন যানু।” ৪৩ তাইন কইলা, “আমি তুমাে হক কথা কইরাম, তুমি আইজ থাকিউ আমার লগে আরশে-আর্জিমো থাকবায়া।”

৪৪ অউ সময় বেইল অনুমান দুইফর, এরবাদ থাকি জোহরর বাদ পর্যন্ত তিন ঘন্টা ধরি আস্তা দেশ আন্দাইর অইগেল। ৪৫ সুরুজর ফর নিভিগেল। এরমাজে জেরুজালেমো কাবা ঘরর পবিত্র হেরেম শরিফর পর্দাখান, উপরে থাকি তল পর্যন্ত ছিড়িয়া দুই টুকরা অইগেল। ৪৬ হেশে ইছায় জুরে আওয়াজ করিয়া কইলা, “বাবা, আমার রুহ তুমার আতো সপিয়া দিলাইলাম।” অখান কইয়াউ আখেরি দম ফালাইয়া ইস্তেকাল করলা। ৪৭ রোমান সিপাইর যে বড় অফিসার হনো পারা দেওয়াত আছলা, এইন ইছার মউতর ই হালত দেখিয়া আল্লার তারিফ করিয়া কইলা, “নিচ্চয়, ই বেচাড়া খাটি দীনদার মানুষ আছলা।” ৪৮ আর ইতা দেখার লাগি যতো মানুষ দলা অইছলা,

তারাও ই হালত দেখিয়া বুকুত মারি-মারি আহাজারি করিয়া ফিরিয়া গেলা।
 ৪৯ ইছার পরিচিত জন অকলে, আর গালিল জিলা থাকি যেতা বেটিন তান লগে আইয়া আইছলা, তারা হক্লেলে দুরই উবাইয়া ইতা দেখলা।

হজরত ইছার কয়বর

৫০-৫১ দেশর ফতোয়া কমিটির একজন ইজ্জতি মেম্বার আছলা, এন নাম ইউছুফ, এন বাড়ি অরিমাথিয়া গাউত। এইন তো পরেজগার আর হক মানুষ, ইছারে কাতল করার অউ কু-খান্দাত তাইন তারার লগে রাজি আইলা না। তাইন আল্লার বাদশাইর লাগি বার চাওয়াত আছলা। ৫২ অউ ইউছুফ হাকিম পিলাতর গেছে গেলা, গিয়া ইছার লাশ নিতা চাইলা। ৫৩ বাদে হজরত ইছার লাশ সলিব থাকি লামাইয়া, কাফন ফিন্দাইলা, আর পাথর খুদিয়া বানাইল অউলা এক কয়বরর মাজে দাফন করলা, ই কয়বরো কুন্দির আর কেউররে দাফন করা আইছে না।

৫৪ ই দিন আছিল ইহুদির জুম্মার আগর দিন, খুড়া বাদেউ জুম্মাবার শুরু আইষিবো। ৫৫ আর যেতা বেটিন গালিল থাকি ইছার লগে আইয়া আইছলা, তারা ইউছুফর খরে খরে গিয়া হউ কয়বর দেখলা, আর কিলাখান তান লাশ দাফন করা আইলো এওতা দেখলা। ৫৬ বাদে তারা ফিরিয়া গিয়া হারি আতর-গোলাপ আর চন্দন-মলম বানাইলা, হেশে শরিয়তর হুকুম মাফিক জুম্মার দিন জিরাইলা।

মউতর বাদে জিন্দা আইলা হজরত ইছা

(২৪:১-৫৩)

হজরত ইছা জিন্দা অওয়ার সাক্ফি-পরমান

২৪

অউ বেটিন্তে যেতা আতর-গোলাপ তিয়ার করছলা, হাণ্ডার পয়লা দিন খুব ছবরে তারা অতা লইয়া, ইছার কয়বরর কান্দাত আইলা। ১ আইয়া দেখলা, কয়বরর মুখর পাথরখান হরাইল আইগেছে। ২ দেখিয়া তারা কয়বরর ভিতরে হামাইয়া দেখইন, ইছার লাশ তো কয়বরো নাই। ৩ তেউ তারা চিন্তাত পড়িগেলা। অউ সময়

ধলা চকচকা কাপড় ফিন্সো দুই জন আইয়া তারার কান্দাত উবাইলা।
 ৫ এরাৱে দেখিয়া বেটিন্তে ডরাইয়া মাথা নোয়াইলিলা। অউ দুইওজনে
 তারারে কইলা, “ওগো, তুমিতাইন জিন্দারে কেনে মুর্দা অকলর মাজে
 আইয়া তুকাইরায়? ৬ তাইন তো অনো নাই, তাইন জিন্দা অইগেছইন।
 তাইন গালিলো থাকতে তুমরার গেছে কিতা কইছলা, মনো করিয়া দেখো।
 ৭ তাইন কইছলা না নি, বিন-আদমরে নাফরমান মানষর আতো ধরাই
 দেওয়া অইবো। তানরে সলিবো লটকাইয়া কাতল করা অইবো, অইলে
 মউতর তিন দিনর দিন হিরবার জিন্দা অইয়া উঠবা?”

৮ অখান হুনতেউ ইছার আগর কথা অকল তারার মনো অইগেল।
 ৯ তারা কবরস্থান থাকি ফিরিয়া গিয়া, হউ এগারো জন সাহাবিরে আর
 বাকি হকলর গেছে খবর জানাইলা। ১০ মগদিলিনী মরিয়ম, সোহানা,
 ইয়াকুবর মা মরিয়ম আর তারার লগে যেতা বেটিন আছলা, এরা হকলে
 গিয়া ই খবর কইলা। ১১ অইলে যেরা ইতা হুনলা, এরা মনো করলা ইতা
 নিচয় বাজে মাত, ইতা বেটিন্তর মাত তারা একিন করলা না। ১২ অইলে
 পিতর দৌড়াইয়া কয়বরর কান্দাত গেলা। গিয়া উন্দা অইয়া দেখলা, খালি
 কাফনখান পড়ি রইছে। ইতা দেখিয়া তাইন তাইজ্জুব বনিয়া ফিরত আইলা।

দুইজন সাগরিদে জিন্দা ইছারে দেখলা

১৩ অউ দিনউ দুইজন সাগরিদ জেরুজালেম থাকি সাত মাইল দুরই ইমুয়াছ
 নামর এক গাউত যাওয়াত আছলা। ১৪ পথো তারা অতা বেয়াপার অকল
 লইয়াউ মাতি মাতি যাইরা। ১৫ তারা মাতে রইছইন অউ সময় আখতাউ
 ইছা নিজে তারার কান্দাত আইয়া একলগে আটা ধরলা। ১৬ অইলে তারার
 চখুত ছাটা লাগি গেছিল, তারা ইছারে দেখিয়াও চিনলা না। ১৭ ইছায় তারারে
 জিকাইলা, “আটি আটি আপনারা ইতা কিতার বাতচিত কররা?” ইখান
 হুনিয়া এরা মুখ বেজার করি উবাই গেলা। ১৮ এরমাজে কিলিওফাছ নামে
 একজনে ইছারে কইলা, “আপনেউ একমাত্র জন, যেইন হুনছইন না ই
 কয়দিনে জেরুজালেমো কিতা ঘটছে?”

১৯ ইছায় তারারে জিকাইলা, “কিতা ঘটছে বা?” তারা কইলা,
 “নাছারতর ইছারে লইয়া যততা ঘটছে। তাইন তো আল্লার নবী, তান
 মুখর জবান আর কামে-কাজে আল্লার নজরো আর হকল মানষর চখুতও

খুব তাক্কতি আর মরতুবাআলা নবী আছিল। ﴿২০﴾ আমরার বড় ইমাম আর মুরাব্বি অকলে তানরে জানে মারার লাগি রোমান অকলর আতো ধরাইয়া দিলাইলা, তারা তানরে নিয়া সলিবর উপরে কাতল করিলিছে। ﴿২১﴾ অইলে আমরার আশা আছিল, তাইন বনি ইসরাইলরে আজাদ করবা। আইজ তিন দিন অইলো ই ঘটনা ঘটিছে। ﴿২২﴾ আর আমরার লগর কয়জন বেটি মানষে আইয়া আমরাে তাইজ্জুব বানাইলিছইন। তারা খুব ছবরে ইছার কয়বরো গেছলা, ﴿২৩﴾ গিয়া দেখছইন, তান লাশ নাই। তারা ফিরত আইয়া কইলা, তারা ফিরিস্তার দরশন পাইছইন, আর ফিরিস্তা অকলে তারারে কইছইন, ইছা জিন্দা আছইন। ﴿২৪﴾ বাদে আমরার লগে যারা আছিল, তারার মাজেও কেউ কেউ কয়বরো গিয়া দেখলা, বেটিস্তর কথাউ হাছা, ইছার লাশ কয়বরো নাই।”

﴿২৫﴾ হকলতা হুনিয়া ইছায় তারারে কইলা, “আপনারা তো কুস্তাউ বুজইন না। আপনাইস্তর দিল অলা অসাড বনিগেছে নি? আল্লার নবী অকলে যেতা বাতাইয়া গেছইন, অতারেও আপনারা একিন কররা না। ﴿২৬﴾ নবী অকলে কইছইন না নি, আল্লার ওয়াদা করা আল-মসীয়ে দুখ-মছিবত সহয্য করিয়া হারি তান জালাল আর গৌরব হাছিল করবা?” ﴿২৭﴾ বাদে তাইন মুছা নবীর তৌরাত কিতাব থাকি শুরু করিয়া, হক্কল নবীর কিতাবর মাজে তান বেয়াপারে যততা লেখা আছে, অতা তারারে বুজাইলা।

﴿২৮﴾ আর যে গাউত যাইতা করি তারা রওয়ানা দিছলা, হউ গাউর কান্দাত আইলে ইছায় আরো দুরই যাওয়ার ভাব দেখাইলা। ﴿২৯﴾ অইলে তারা খুব মিনত কাঞ্জি করিয়া তানরে কইলা, “অখন তো বেইল গেছেগি, হাইঞ্জা অইয়ার, তে রাইতখান আপনে আমরার গেছে রই যাউক্কা।” অউ তাইন রওয়ার লাগি বাড়িত হমাইলা। ﴿৩০﴾ বাদে য়েবলা খানিত বইলা, অউ সময় ইছায় রুটি লইয়া টুকরাইয়া আল্লার শুকরিয়া আদায় করিয়া তারারে দিলা। ﴿৩১﴾ তেউ তারার চউখ খুলিগেল, তারা ইছারে চিনিলিলা। চিনার লগে লগেউ তাইন এরার গেছ থাকি আউড়ি দিলাইলা। ﴿৩২﴾ বাদে তারা একে-অইন্যরে কইলা, “পথো য়েবলা তাইন আমরার লগে বাতচিত করছলা, আমরাে আল্লার কালাম বুজাইয়া দিছলা, হউ সময় আমরা দিলর মাজে এক এশকি পয়দা অইছিল না নি?”

﴿৩৩﴾ লগে লগে তারা দুইওজন বারইয়া জেরুজালেম আইলা। আইয়া হউ এগারো জন সাহাবি আর বাকি হক্কলরে এখানো বওয়াত পাইলা। ﴿৩৪﴾ তারা

অনো বইয়া অতা মাতিরা, হজরত ইছা আসলেউ জিন্দা অইগেছইন, জিন্দা অইয়া সাইমন-পিতররে দেখা দিছইন। ৩৫ অউ সময় হউ দুইও জনেও এরায়ে কইলা, পথর মাজে তারা কিলা ইছার দেখা পাইলা, রুটি টুকরাইবার সময় কিলা তানরে চিনলা, ইতা হকলতা জানাইলা।

জিন্দা ইছারে হকল সাগরিদে দেখলা

৩৬ সাহাবি অকলে তো অতা লইয়া বাতচিত কররা, অউ সময় আখতাউ ইছা নিজে অনো আইয়া তারার মাজখানো উবাইয়া কইলা, “আছছালামু আলাইকুম।” ৩৭ তানে দেখিয়া তারা খুব ডরাইগেলা, মনো করলা ভুত আইছে। ৩৮ ইছায় তারারে কইলা, “তুমরা অতো অস্থির অইগেলায় কেনে? কেনে তুমরার দিলো সন্দয় হামাইলো? ৩৯ আমার আত-পাও ভালামন্তে দেখো, দেখোনা, ই তো আমি। আমারে আতাইয়া দেখো, ভুতর তো আমার লাখান আড্ডি-মাংস নাই।” ৪০ অখান কইয়া তাইন নিজর আত-পাও তারারে দেখাইলা। ৪১ অইলে তারা তানে দেখিয়া অতো বেশি খুশি অইলা, খুশির চুটে বেদিশা বনিগেলা, কুস্তা বিশ্বাস করতা পারলা না। তেউ ইছায় তারারে কইলা, “ইনো খাইবার কুস্তা আছে নি?” ৪২ তারা এক টুকরা বিরান মাছ তানরে দিলা। ৪৩ অউ মাছ তাইন হকলর ছামনে খাইলা।

৪৪ খাইয়া এরায়ে কইলা, “আমি য়েবলা তুমরার লগে আছলাম, হউ সময় তুমরারে কইছলাম না নি, মুছা নবীর তৌরাত শরিফ, নবী অকলর ছহিফা, আর জবুর শরিফর মাজে যেতা লেখা আছে, ইতা হকলতা নিচ্চিত ফলিবো।” ৪৫ অখান কইয়া হারি, তাইন সাহাবি অকলর দিলর দুয়ার খুলি দিলা, যাতে আল্লার কালামর মানি এরা বুজতা পারইন। ৪৬ তাইন কইলা, “আল্লার কালামো লেখা আছে, আল-মসীয়ে বউত কঠিন দুখ-তকলিফ পাইবা, মউতর তিন দিনর দিন তাইন মুর্দা থাকি জিন্দা অইযিবা। ৪৭ যেকুনু মানষে তান নামে তৌবা করলে, গুনার মাফি মাগিলে মাফি পাইবো, অউ বয়ানি জেরুজালেম থাকি শুরু অইয়া আস্তা দুনিয়ার হকল জাতির কানো পৌছানি লাগবো। ৪৮ তুমরাউ ই হকলতার সাক্ষি। ৪৯ আর হুনো, আমার বাতুনি বাফে যেতা দান করার ওয়াদা করছইন, আমি ইতা তুমরার গেছে বেজিমু। অইলে বেহেস্তু থাকি বল-তাক্কত না পাওয়া পর্যন্ত, তুমরা অউ জেরুজালেমো রইও।”

হজরত ইছারে বেহেশ্তো তুলিয়া নেওয়া অইলো

❦ বাদে ইছায় সাহাবি অকলরে লইয়া বায়ত-আনিয়া গাউর মুখো গেলা, গিয়া তাইন আত তুলিয়া তারারে দোয়া দিলা। ❦ আর অউ দোয়ার হালতেউ তাইন তারার গেছ থনে আলগ অইগেলা, তানরে বেহেশ্তো তুলিয়া নেওয়া অইলো। ❦ তারা হকলে তানরে সহজদা করিয়া, খুব খুশি অইয়া জেরুজালেমো ফিরত অইলা। ❦ আর বায়তুল-মুকাদ্দছর মাজে হামেশা আল্লার হামদ-তারিফ করাত রইলা। আমিন॥